

SAN MATEO

Jesucristupä gellgangan

Mateum cay libruta gellgangan. Jucag jutinmi cargan Levi. Payga Israel runa carpis Roma nacionpä impuestu cobracogmi cargan. Tsaypitam Mateutaga Jesus acrargan apostolnin cananpä. Jesuswan purirmi rurangancunata ricargan y willacungancunata wiyargan. Tsaymi cay libruta Mateo gellgangan Tayta Dios cachamungan salvacog canganta musyanantsicpä. Mateupä masta musyanayquipä liyinqui Mateo 9.9-13; Marcos 2.13-17; Lucas 5.27-32.

Cay libruchöga Mateo tantiyatsimantsic Señor Jesus ima castapita yuringantam (1.1-17), yuricuptin Egiptuman Josewan Maria apayangantam (1.18-pita 2.23-yag), y Jesus Galileachö yachatsicur gallaycungantam (capítulo 3-pita 4-yag).

Tsaynömi Mateo tantiyatsimantsic Señor Jesus runacunata jircanchö yachatsingancunata (capítulo 5-pita 7-yag). Jesus imaycatapis Tayta Dios munangancunatam runacunata yachatsirgan, geshyagcunatam allitsirgan, supaycunata runacunapitam gargurgan, y imayca milagrutapis rurarganmi (capítulo 8-pita 18-yag).

Israel autoridäcuna wanutsiyänapä cagta musyarpis Jesusga Jerusalemman aywarganmi nänicunachöpis runacunata yachatsirnin (capítulo 19-pita 23-yag). Jerusalemchöpis willacurganmi manarä ciëlupita cutimuptin imacunapis päsananpä cagta (capítulo 24-pita 25-yag).

Tsaynömi Mateo tantiyatsimantsic Señor Jesus wanunganpita cawarimushga canganta (capítulo 26-pita 28-yag).

**Jesucristo Abrahampa
ayllun cangan**
(Lucas 3.23-38)

1 ¹Jesucristoga yurishga rey
*Davidpa ayllun aywaragpitam.
Davidnam cashga *Abrahampa
ayllunpita aywarag. Cay runacunam
cayashga Abrahampa y Davidpa
aylluncuna.^a

- ² Abrahampa tsurinmi cargan Isaac.
Isaacpa tsurinmi cargan Jacob.
Jacobpa tsurinmi cargan Juda y mas
waquin waugincuna.
- ³ Judapa tsurincunam cayargan
Fareswan Zara. Paycunapa
mamanmi cargan Tamar.
Farespa tsurinmi cargan Esrom.
Esrompa tsurinmi Aram.
- ⁴ Arampa tsurinmi Aminadab.

a 1.1 Ayllu ninanga “castan miragcunapita aywaragnincuna” ninanmi. Tsaynömi
Jesucristupis Abrahampa y Davidpa aylluncunapita cargan.

Aminadabpa tsurinmi Nahason.
Nahasonpa tsurinmi Salmon.

- ⁵ Salmonpa tsurinmi cargan Booz.
Boozpa mamannam cargan Rahab.
Boozpa tsurinmi cargan Obed.
Obedpa mamannam cargan Rut.
Obedpa tsurinmi cargan Jese.
⁶ Jese pa tsurinnam cargan rey David.

Rey Davidpa tsurinmi cargan
Salomon. Salomonga yurigan
Uriaspa viüdanchömi.

- ⁷ Salomonpa tsurinmi cargan Roboam.
Roboampa tsurinmi Abias.
Abiaspa tsurinmi Asa.

- ⁸ Asapa tsurinmi Josafat.
Josafatpa tsurinmi Joram.
Jorampa tsurinmi Uzias.

- ⁹ Uziaspa tsurinmi Jotam.
Jotampa tsurinmi Acáz.
Acázpa tsurinmi Ezequias.

- ¹⁰ Ezequiaspa tsurinmi Manases.
Manasespa tsurinmi Amon.
Amonpa tsurinmi Josias.

- ¹¹ Josiaspa tsurinmi cargan Jeconias y
mas waquin waugincuna.
Jeconias yuringan witsancunam
*Israel runacunata Babilonia
soldäducuna prësu tsariscärir
apayargan Babilonia nacionman.

- ¹² Tsaychönám Jeconiaspa tsurin
Salatiel yurigan.
Salatielpa tsurinmi cargan Zorobabel.

- ¹³ Zorobabelpa tsurinmi Abiud.
Abiudpa tsurinmi Eliaquim.
Eliaquimpa tsurinmi Azor.

- ¹⁴ Azorpa tsurinmi Sadoc.
Sadocpa tsurinmi Aquim.
Aquimpa tsurinmi Eliud.

- ¹⁵ Eliudpa tsurinmi Eleazar.
Eleazarpa tsurinmi Matan.
Matanpa tsurinmi Jacob.

- ¹⁶ Jacobpa tsurinnam cargan Mariapa
runan Jose. Y Mariapa wawanmi
cashga Jesus, Tayta Dios
cachamungan salvamagllantsic.

¹⁷ Tsaynömi ari Abraham cawangan
witsanpita hasta David yuringanyag
chunca chuscu (14) runacunarä
cayashga Abrahampa ayllun
aywaragcuna. Tsaynöllam David
cawangan witsanpitapis Israel
runacunata Babiloniaman apayangan
witsanyag chunca chuscu runacunarä
cayashga Davidpa ayllun aywaragcuna.
Tsaynöllam Babiloniaman apayangan
witsanpitapis Jesucristo yuringanyag
chunca chuscu runacunarä cayashga
tsay aywaraglla.

Jesucristo yuringan

(Lucas 2.1-7)

¹⁸ Salvamagnintsic Jesucristo caynömi
yurigan. Mariawan Jose täyānanpäna
willanacushga caycarpis manam
juntacäyarganrätsoga. Tsaynö
caycaptinpis *Espiritu Santupa
munayninwanmi Mariaga geshyag
ricacurgan. ¹⁹ Geshyagna ricacuptin
Josega llänu runa carmi Mariapä
imatapis parlargantsu. Payga mana
quejacuyllapam jagiriyta munargan.
²⁰ Tsaynö jagiriyta munaycaptinmi Tayta
Diospa *angelnin Joseta suëñuyninchö
nirgan: “Unay rey Davidpa castan Jose,
Mariaga manam ima runawanpis
tincucashgarätsu geshyag ricacunanpä,
sinöga Espiritu Santupa munayninwanmi
geshyag ricacushga. Tsaynö caycaptinga
mana ajayllapa Mariata goricuy. ²¹ Ollgu
wamratam Maria geshyacunga. Paypa
jutinmi canga Jesus, runacunata jutsa
ruraynincunapita perdonar salvananpä
captinmi” nir.^b

²²Tsaycuna päsanan captinmi Tayta Diospa willacognin *profëta caynö gellgargan:

²³ “Jipashmi, virgenllarä caycar, geshyacunga ollgu wamrata. Tsay wamrapämi niyanga ‘Emanuel’ canganta. Emanuel ninanga ‘Diosnintsic nogantsicwan caycan’ ninanmi”.

²⁴Tsaypita Jose punuycanganta riccharcamurnam angel ningannö Mariata ädisirpis goricurgan. ²⁵Mariaga Josewan taycarpis manam punuyargantsu. Wawan yuriyuptinnam Josega nirgan: “Jesusmi jutinga canga” nir.

**Estrëllacuna estudiag runacuna
Belenman Jesusta adorag
châyangan**

2 ¹Israel nacionchö *Herodes rey caycangan witsanmi Judea provinciapa Belen marcanchö Jesus yurigan. Yurisquiptinnam Jerusalemman châyargan juclä nacionpita musyag estrëlla estudiag runacuna caynö tapupacurnin: ²“Israel runacunapa mandagnin rey cananpä llullu yureg ñmaychötä caycan? Rupay yargamunan cag lädupita estrëlla yargamogta ricashga carmi shayämurgö payman adoragnin” nir.

³Tsayta wiyaycurga rey Herodes chiquicurninmi yarpachacurgan paylla rey cacuyta munar. Tsaynöllam Jerusalemchö tag runacunapis pasaypa mantsariyargan caynö nir: “Cananga ñimanörä cashun Herodeswan?” nirnin.

⁴Tsaynam Herodesga mandag *sacerdöticunata y *Moises gellgangan ley yachatsicogcunata gayaycatsimur tapurgan: “ñMaychötä

salvacogniquicuna Cristo yurinan cargan?” nir.

⁵Paycunanam niyargan: “Judea provinciapa Belen marcanchö yurinänpämi Tayta Diospa willacognin profëta gellgargan caynö:

⁶ ‘Belenchömi Israel runacunapa mandacognin rey yuringa Judea provinciachö jatusag marcacunapita tsay marca tacshalla caycaptinpis’ nir”.

⁷Tsayta wiyaycurnam Herodesga pacayllapa gayatsirgan tsay estrëlla estudiagcunata. Paycuna chaycuyaptinmi tapurgan yargamog estrëllata imaypitana ricayangantapis. ⁸Imaypita ricayangantapis willayaptinnam Herodes nirgan: “Belenman aywar tsay wamrata ashiyämuy. Tarirninga willayämanqui nogapis adoragnin aywanäpä” nir.

⁹Tsaynö rey Herodeswan parlar usharirnam estrëlla estudiag runacuna aywayargan. Aywaycâyaptinnam tsay ricayangan estrëllapis ñöpancunallata Belenman aywargan wamra caycangan wayiman châyanganyag. Chaycuyaptinnam tsay pushag estrëlla pärasquirgan wayi janan derëchachö. ¹⁰Tsay wayi jananchöna pärasquegta ricäirnam itsanga estrëlla estudiagcuna feyupa cushicuyargan. ¹¹Tsaymi tsay wayiman yaycurirnin tariyargan llullu Jesus maman Mariawan caycagta. Tsaychö ricaycurnam ñöpanman gonguricuycur llulluta adorarargan. Nircurnam apayangancunata churapäyargan öruta, *inciensiuta, y “*mirra” ningan perjümita. ¹²Tsaynam paycunata Tayta Dios suënuynincunachö parlapargan Herodes cagman manana cutiyänapä. Tsaynö willashgana carmi juclä nanipana marcancunaman cuticuyargan.

**Egipto nacionman Jesusta
Jose geshpitsingan**

¹³Estrëlla estudiag runacuna marcancunaman cuticuyaptinmam Joseta suëñuyninchö Tayta Diospa angelnin nirgan: “Rey Herodesmi llulluta wanutsinanpä ashitsinga. Canantä ras sharcur Jesusta mamantinta Egiptuman geshpitsiy cutimunayquipä willangäyag” nir.

¹⁴Tsaynö niptinmi Josega pagas ricchacarcamur Jesusta mamantinta pusharcur Egiptuman aywacurgan. ¹⁵Tsaychömi paycuna täcuyargan Herodes wanunganyag. Tsaynö päsanan captinmi Tayta Dios unay tantiyatsirgan willacognin profëta. Tsay profëtam gellgargan caynö: “Egiptupitam gayamurgä wamräta” nir.

**Herodes mandaptin Belenchö
wamracunata wanutsiyangan**

¹⁶Estrëlla estudiag runacuna Jesus maychö cangantapis willag mana cutiyaptinmam rey Herodesga pasaypa ajargan. Tsaynö ajarnam Jesusta wanutsiyta munar soldäduñcunata cachargan Belen marcachö y ñöpan quinran marcacunapitapis ollgu wamracunata wanutsiyänanpä. Estrëlla estudiag runacuna imaypitana estrëllata ricayanganta willapäyashga captinmi Herodes tantiyacurgan Jesus juc o ishçay watayogna canganta. Tsaymi wamracunata wanutsiyargan yurishgapita ishçay watayogyag. ¹⁷Tsaycuna päsapinmi Tayta Diospa unay willacognin profëta Jeremias gellgangan cumpticargan. Paymi caynö gellgargan:

¹⁸ “‘Ramah’ ningan marcachömi llapancunapis pasaypa llaquicurnin wagaycäyan.

Wawancuna ushacäyaptinmi shogayaptinpis manana päraypa Raquel wagaycan”.

**Egiptupita Jesusta
Jose cutitsimungan**

¹⁹Tsaypitaga Egiptuchö Jose caycällaptinrämi rey Herodes wanusquirgan. Tsaynam suëñuyninchö Tayta Diospa angelnin Joseta nirgan: ²⁰“Jose, cananga mamantinta Jesusta pushacurcur Israelman cuticuy. Jesusta wanutsiyta munagcuna wanuyashganam” nir.

²¹Angel tsaynö niptinmi jinan öra Josega Israelman cuticurgan mamantinta wamrata pushacurcur. ²²Tsaynö cutirnam Jose mayasquirgan Judea provinciachö Herodespa tsurin Arquelaua troquinchö rey caycanganta. Tsaynam Jose mantsarirgan Judeaman cutiyta. Tsaynö mantsariptinmi Tayta Dios suëñuyninchö nirgan Judeaman aywananpa rantin Galilea provinciamanna aywacunanpä. ²³Galilea provinciaman chaycurnam Nazaret marcaman aywargan tsaychöna täcuyänanpä. Tsaycuna päsanan captinmi Tayta Diospa unay willacognin profëta caynö gellgargan: “Salvacogga Nazaret marcapita cangantam niyanga” nir.

**Juan Bautista salvacog
chämunanpäna willacungan**
(Marcos 1.1-8; Lucas 3.1-9, 15-17;
Juan 1.19-28)

3 ¹Señor Jesus yachatsicur manarä gallaptinmi Juan Bautista Tayta Diospa willacuyninta willacur gallaycurgan. Judea provincia quinran tsunaygcunapa puriptinmi runacuna tsayman aywayargan willacunganta

wiyayānanpä. Tsaychö willacurmi caynö nirgan: ²“Tayta Dios cachamungan salvacog rey chāmunganam. Tsaynö caycaptinga jutsa rurayniquicunata jagirir Diosnintsic munangannöna cawayay” nir.

³Tsaynö Juan Bautista willacunanpä captinmi Tayta Dios nirgan unay willacognin profëta Isaiasta caynö gellganapä:

“Tsayyagchömi gayaraypa gayarar willacunga:

‘Jutsa rurayniquicunata jagirir alistacuyay Señornintsicta chasquicuyānayquipä.

Mandacog runa shamuptin chasquicuyānayquipä nānicunata limpiapacur puestucog cuenta salvacogta chasquicuyānayquipä alistacuyay’ nir”.

⁴Juan Bautistapa röpanga cargan *camëllupa cerdanpita rurashgam. Wachäcanpis cargan camëllupa garanpita rurashgam. Juanpaga micuyninpis cargan chuclushnö curucunam y chumpac mishquicunam.

⁵Willacur puringanta wiyarnam Jerusalenpita y Judea provinciapa maytsay marcancunapita atscā runacuna Juan caycanganman aywayargan willacunganta wiyayānanpä. ⁶Tsaynö willacunganta wiyarmi runacuna tantiyacuyargan jutsa rurag cayanganta. Jutsa rurag cayanganta tantiyacur Tayta Diosta perdonta mañacuyaptinnam Juan bautizargan Jordan mayuchö.

⁷Tsaymannam *fariseo y *saduceo cagcuna bautizacuyānanpä shayämurgan.

Jinatanam tsay runacunata Juan nirgan: “iCulebra casta runacuna! ¿Imanirtä gamcuna yarpāyanqui jutsata rurayangayquipita Tayta Dios infiernuman mana gaycuyāshunayquipä cagta? ⁸Tayta Dios infiernuman mana gaycuyāshunayquipä jutsa rurayniquicunata jagirir pay munanganta rurarna cawayay. ⁹Ama yarpāyaytsu unay *Abraham casta cayangayquipita Tayta Dios salvayāshunayquipä cagta. Tayta Dios munarga Abraham casta runacunaman cay rumicunatapis ticscāratsinmanmi. ¹⁰Mana alli wayog jachacunata cuchupita muturir ninaman gaycognömi Tayta Dios jutsa ruragcunata infiernuman gaycunanpäna caycan”.

¹¹“Nogaga yacullawanmi bautizaycä jutsa rurayniquicunata jagirir Tayta Dios munangannö cawayānayquipä. Peru salvacog shamogta chasquicogcunamanmi itsanga Espiritu Santuta Tayta Dios cachamunga y mana chasquicogcunataga infiernumanmi gaycunga. ^c Tsaynö captin salvacogmanga ni ichicllapis manam nogaga iwalätsu. ¹²Payga triguta wayrananpä jurquitan aptashganam caycan. Nircur triguta wayrarirnam päjantaga ninaman gaycunga y triguntanam wayinman apacunga. Tsaynömi jutsa ruragcunataga imaypis mana upeg ninaman gaycunga y Tayta Dios munanganman cawagcunatanam gloriaman apacunga”.

Jesucristo bautizacungan
(Marcos 1.9-11; Lucas 3.21,22)

¹³Galilea provinciapitam Jesuspis aywargan Jordan mayuman Juan bautizananpä. ¹⁴Tsayman chasquiptinga

c 3.11 “Mana chasquicogcunataga infiernuman gaycunga” ninanpa rantinga griegu idiömachöga “ninawan bautizanga” nirmi gellgaraycan. Ninawan bautismupäga waquin runacuna niyan infiernuman gaycucayānanpä cagta. Waquincunanam niyan Espiritu Santupa munayninwan bautizacuy canganta, Hechos 2.3-chö ningannö.

bautizayta Juan manam munargantsu caynō nīnin: “Tayta Dios cachamungan salvacog caycaptiquega ñimanōpatā canan gamta bautizāman? Antis nogatachir gam bautizaycamanquimanga” nīr.

¹⁵Tsaynō nīptinnam Jesus nīrgan: “Imanō captinpis bautizamaylla. Gam bautizamanayquitam Tayta Diosga munan”.

Tsaynō nīptinmi Juan bautizargan. ¹⁶Bautizacusquir yacupita yarguraycarnam Jesus ricasquirgan ciēlu quichacasquiptin Espiritu Santo palumanō payman uraycāmogta. ¹⁷Y nīrcurmi ciēlupita Tayta Dios caynō nīmungan wiyacāmurgan: “Paymi cuyay tsurī. Noga munangānō cumpliptinmi cushishga caycā” nīr.

**Jesucristuta Satanás
tentayta munangan**

(Marcos 1.12,13; Lucas 4.1-13)

4 ¹Tsaypitanam Jesusta Espiritu Santo tsunyag jircaman pushargan tsaychō *Satanas tentayta munaptin Jesus poderninwan gargunānpā.

²Tsay jircachōga chuscu chunca (40) junag y chuscu chunca pagas imatapis mana micuypam Tayta Diosman mañacur Jesus cargan. Tsaypitaga pasaypam mallagacuycurgan. ³Tsaynō caycaptinnam Satanás yurisquir nīrgan: “Diospa tsurin caycarga mā, cay rumicunata tantaman ticratsiy” nīr.

⁴Tsaynō nīptinnam Jesus nīrgan: “*Diospa palabran gellgaranganchō caynōmi nīcan: ‘Manam tantata micurllatsu runacuna cawayan, sinōga Dios nīngancunata cāsucuyanganwanpis allimi cawayan’ nīr”.

⁵Tsaypitanam wap Jerusalen *templu jananchōna Jesusta Satanás ricacascatsirgan. ⁶Nīrcurmi nīrgan: “Diospa tsurin caycarga caypita patsaman mā jegarpuy. Diospa palabran gellgaranganchōga caynōchā nīn:

‘Gamta cuīdashunayquipā
angelnīncunatam Dios
cachamunga.

Paycunam tsariyāshunqui patsaman
jegaptiquipis rumicunachō
mana tacacunayquipā’”.

⁷Nīptinmi Jesus nīrgan: “Manam gam nīmangayquita rurashātsu. Diospa palabran gellgaranganchōga caynōmi nīcan: ‘Ama Tayta Dios nīngancunata manacagman churayta yarpaytsu munangayquita ruranayquipā’” nīnin.

⁸Tsaypitaga jirca puntan altuchōnam Satanás Jesusta wap ricacascatsimurgan. Tsaypitanam maytsay nacioncunata y tsaychō imayca riquēzacunata ricascāratsirgan. ⁹Nīrcurmi nīrgan: “Gonguriycur nogata adoramaptiquega cay ricangayqui nacioncunata y llapan riquēzacunatam goycushayqui munaynīquichōna tsarācunayquipā” nīr.

¹⁰Tsaynō nīptinmi Jesus nīrgan: “iWiticuy, Satanás! Diospa palabran gellgaranganchōga caynō nīrmi nīcan: ‘Tayta Diosllatam adoranayqui y payllatam sirvinayqui’ nīr”.

¹¹Tsaynō nīycuptinmi Satanás illacasquirgan. Tsaypitanam angelcuna yuripasquir Jesusta yanapayargan.

Galileachō Jesus

yachatsicur gallaycungan

(Marcos 1.14,15; Lucas 4.14,15)

¹²Juan Bautista carcelchō wichgaraycaptinnam Jesus Galilea provinciachō marcan Nazaretman cuticurgan. ¹³Tsaypitanam Capernaum marcaman aywacurgan tsaychōna tēcunānpā. Tsay marcaga cargan Galilea gocha cuchunchō, Zabulon y Neftali castacuna tēcuyangan marcacunachōmi. ¹⁴Tsaychō Señornintsic tēnanpā captinmi Tayta Diospa willacognin profēta Isaías caynō gellgargan:

¹⁵ “Galilea gochapa ñöpancunachö tag mana Israel runacuna, Jordan mayupa wac-tsimpanchö tag runacuna, Zabulon y Neftali casta runacunapis llapayqui wiyayämay.

¹⁶ Tsacäpacushganö llutan ruraychö cawag runacunam Tayta Diospa alli willacuyninta wiyayashga.

Tayta Dios ninganta mana cäsucogcunamanmi rupay atsicyagnörä Tayta Diospa alli willacuynin chashga”.

¹⁷Isaias gellgangannö Capernaumchö taycarninmi Jesus willacur gallaycorgan: “Tayta Dios cachamungan salvacog rey chämunganam. Tsaynö caycaptinga jutsa rurayniquicunata jagirir Tayta Dios munangannöna cawayay” nir.

Chuscu runacunata discipuluncayänanpä Jesus gayangan
(Marcos 1.16-20; Lucas 5.1-11)

¹⁸Juc junagnam Galilea gocha cuchunpa aywaycanganchö Jesus ricasquirgan ishcay pescag runacuna mällancunata yacuman mashtaycayagta. Paycunaga cayargan Simon y waugin Andres. Simonpa jucag jutinmi cargan Pedro. ¹⁹Paycunatam Jesus nirgan: “*Discipulücuna cayänayquipä nogawan aywacushun. Gamcunata yachatsiyäshayqui pescäduta tsariyänayquipa rantin Diospa alli willacuyninta runacunata willapâyänayquipä cagtana”.

²⁰Tsaynö niptinmi mällancunata jagisquir jinan öra Jesuswan aywacuyargan.

²¹Tsaypita yargur mas washaläninta aywaycayanganchönam ricasquirgan

Santiagutawan Juantana. Paycunaga papänincuna Zebedeuwanmi

*büquiman jamaycur mällancunata allitsaycayargan. Paycunatapis Jesus gayargan discipuluncuna cayänanpämi. ²²Tsaynö gayariptin paycunapis jucllam Jesuswan aywayargan papänincunata büquichö jagisquir.

Atsca runacunata Jesus allitsingan
(Lucas 6.17-19)

²³Tsaypitanam Jesus purirgan Galilea provincia quinran marcacunapa. Tsay marcacunachömi runacuna *goricäcuyänan wayicunachö Tayta Diospa alli willacuyninta willacur yachatsicorgan. Tsaynömi tucuyläya geshyawan geshyagyashgacunatapis allitsirgan. ²⁴Siria nacion marcacunachöpis mayayarganmi geshyagcunata Jesus allitsinganta. Tsaymi Jesus caycanganman apayämurgan imaycaläya geshyacunawan geshyagyashgacunata, *supaycuna löcuyätsingan runacunata, wanuy geshyawan ñacagcunata, y paraliticucunata. Tsay llapan geshyagyashga runacunatam Jesus allitsirgan.

²⁵Feyupam runacuna Jesusta gatiräyargan Galilea marcacunapita, Decapolis marcacunapita, Jerusalenpita, Judea marcacunapita, y Jordan mayu wac-tsimpan quinranpitapis.

Runacunata jircanchö Jesus yachatsir gallaycungan
(Lucas 6.20-23)

5 ^{1,2}Tsaypita juc junagnam atsca runacunata ricarnin juc jircanman Jesus discipuluncunawan witsargan tsaychö yachatsinanpä. Tsaychö Jesus jamaycurmi yachatsicorgan caynö:^d

d 5.1,2 Runacunata jircanchö Jesus yachatsingan gellgaraycan Mateo capitulu 5-pita 7-yag.

³ “Cushishgam cawayanga Tayta Diosllaman imaypis mañacur cawag runacunaga. Paycunataga Tayta Diosmi ñöpanman pushanga.

⁴ Cushishgam cawayanga cay vïdachö llaquicogcuna. Paycunataga Tayta Diosmi consulanga llaquicuychö mana cayänapä.

⁵ Cushishgam cawayanga llänu shonguyog car runa mayincunawan alli cawagcuna. Paycunaga gloriachömi herenciata chasquiyanga.

⁶ Cushishgam cawayanga mallagaypanörä yacunaypanörä Tayta Dios ninganman cawayta munagcunaga. Paycunataga Tayta Dios mana dejaypam yanapanga.

⁷ Cushishgam cawayanga runa mayinta cuyapagcuna. Paycunata Tayta Dios cuyapangam.

⁸ Cushishgam cawayanga jutsata mana ruraypa Tayta Dios munangannö cawagcuna. Paycunam Tayta Diospa ñöpanman chäyanga.

⁹ Cushishgam cawayanga runa mayinta amishtatsegcuna. Paycunataga Tayta Dios ‘Gamga wamrämi canqui’ ningam.

¹⁰ Cushishgam cawayanga Tayta Dios munangannö cawayanganpita chiquishga cagcuna. Paycunaga gloriachö pipis mana chiquishgam cawayanga”.

¹¹ “Nogaman criyicayämungayquipita runacuna ashlliyäshuptiqui, chiquiyäshuptiqui, y llullacurcur imaycatapis manacagcunata tumpayäshuptiqui cushicuyay. ¹²Noga

raycur ñacagcunataga Tayta Diosmi ciëluchö premiuta goyäshunqui. Gamcunatanömi unay profëtacunatapis ñacatsiyargan. Tayta Dios tsay profëtacunata premiuta gongannöllum gamcunatapis goyäshunqui. Tsaynö cananpä caycappinga ñacarpis cushicuyay”.

**Cachiman y actsiman iwalatsicur
Jesus yachatsicungan**

(Marcos 9.50; Lucas 14.34,35)

¹³ “Gamcunaga cay patsachö cachinömi cayanqui. Micuyta cachi gustuta manana gor imapäpis mana välegnömi gamcunapis Tayta Dios munangannö mana cawarga imapäpis väliyanquitsu. Gamlagyashga cachita pipis maypis jichariyangannömi gamcunatapis infiernuman gaycuyäshunqui”.

¹⁴ “Tsaynöpis gamcunaga Tayta Dios munangannö cawarnin runacunapä actsi cuentam caycäyanqui. Juc marca jircan niragchö carga maytsaymanpis ricacanmi. ¹⁵Tsaynöllum actsita tsaritsirpis alëriman churantsic wayichö atsicyänapä. Manam imaypis tsaritsintsictu catri jawancunaman churanantsicpäga. ¹⁶Runacuna ricayänapä actsi atsicyagnömi gamcunapis runacuna ricayäshunayquipä Dios munangannö cawayänayqui. Tsaynö cawagta ricayäshurmi paycunapis tantiyacuyanga Tayta Dios munangannöna cawayänapä”.

**Moises y profëtacuna
gellgayangancuna ruracänapä
Jesus ningan**

¹⁷ “Ama yarpäyaytsu Moises gellgangan leycunata y profëtacuna gellgayangancunata imapäpis mana cuentaycangäta. Nogaga shamurgö tsay

leycuna imapä cangantapis tantiyatsinäpämi. ¹⁸Ciëlpupis cay patsapis manarä ushacaptinmi Moises gellgangan y profëtacuna gellganganga llapanpis cumplinga Tayta Dios munangannölla. ¹⁹Tsaynö caycaptinga pipis tsay gellgashgacunachö ningancunata mana cäsür y juccunatapis mana cäsunanpä yachatsirga Tayta Diospa ñöpanchö manam imapäpis cuentashgatsu canga. Pipis tsay gellgashgacunachö ningancunata cäsür y juccunatapis cäsunanpä yachatsirmi itsanga Tayta Diospa ñöpanchö alli ricashga canga. ²⁰Tsaynö caycaptinga gamcuna Tayta Dios ningancunata cumpliyay. Fariseucunanö y ley yachatsicogcunanö cumpleg tucurga Tayta Diospa ñöpanman manam imaypis chäyanquitsu”.

**Runa mayintsicta mana
ajanapänapä Jesus yachatsicungan**

²¹“Gamcuna musyayanquim Moises gellganganchö caynö ninganta: ‘Ama runa mayiquita wanutsinquitsu. Runa mayinta wanutsegcunaga juzgashgam canga’. ²²Tsaynö niptinpis nogaga caynömi ni: Manam runa mayinta wanutseg cagllatatsu Tayta Dios juzganga, sinöga runa mayinta ajanapag cagtapis, ashleg cagtapis, y ‘Gamga imapäpis manam välinquitsu’ neg cagtapis Tayta Diosmi juzgarnin infernuman gaycunga”.

^{23,24}“Tsaynö caycaptinga runa mayiquiwan resentitsinacushga carga Tayta Diospä ofrendata apaycangayquitapis ofrendayquita dejaycur puntataga resentitsinacungayquiwanrä amishtag ayway. Tsaypita itsanga tsay apaycangayqui ofrendata Tayta Diospä goycunqui”.

²⁵“Tsaynölla imapitapis chiquinacungayqui quejashuyta yarpaptinga autoridäman manarä char arreglanqui. Tsaynö mana arreglaptiquega juezman apatsishuptiqui juezga wardiyacunawanmi carcelman wichgatsiyäshunqui. ²⁶Tsaypitaga manam rasllaga yargunquitsu jaga cayniquita llapanta mana pägacurga”.

**Adulteriu jutsata mana
rurayänapä Jesus yachatsicungan**

²⁷“Gamcuna musyayanquim Moises gellganganchö caynö ninganta: ‘Nagana majayog carga ama adulteriu jutsata rurayaytsu’. ²⁸Tsaynö niptinpis nogaga caynömi ni: Yarpayniquicunallachöpis juc warmita munaparga adulteriu jutsataga maynam rurayarguyquina”.

²⁹“Tsaynö carnin juc warmita ricäriirninnllapis munaparga ñawiquita jipirir jitariycuy. Infernuman gaycushga canayquipa rantinga mas allim canman tsulla ñawillapis gloriaman chaptiqui. ³⁰Tsaynölla juc warmita munaparnin maquiqui yatapaptinga tsay maquiquita rogurir jitariycuy. Infernuman gaycushga canayquipa rantinga allim canman tsullan maquillapis gloriaman chaptiqui”.

**Majancunapita mana
raqicäyänapä Jesus
yachatsicungan**

(Mateo 19.19; Marcos 10.11,12;
Lucas 16.18)

³¹“Gamcuna musyayanquim Moises gellganganchö caynö ninganta: ‘Pipis warminpita raquicayta munarga divorciu papelta ruratsun raquicangan musyashga cananpä’. ³²Tsaynö niptinpis nogaga caynömi ni: Pipis warminpita ama raquicätsuntsu. Warmin juc

runawan mana puriycaptin raquicarga quiquin ollgu cagmi jutsayog caycan warmin juc runaman aywananpäpis. Tsaynöllam ollgu cagpis raquicashga warmiwan tarninga adulteriu jutsata ruraycan”.

Mana juranapä Jesus yachatsingan

³³“Tsaynömi gamcuna musyayanqui Moises gellganganchö caynö ninganta: ‘Imatapis ruranyquipä Diospa jutinchö aunicurga mana gongayllapa cumplinqui’. ^{34,35}Tsaynö niptinpis nogaga caynömi nï: Ama nunca juranquitsu Diospa jutinta jayarir ‘Por Dios’ nïr. Tsaynölla ama juranquitsu ‘Por mi ciëlu’ nïr o ‘Por Jerusalem’ nïr. Ciëloga Tayta Dios jamaräcunan *trönnunmi. Jerusalenga Tayta Dios acrangam. Tsaymi ‘Por mi ciëlu’ o ‘Por Jerusalem’ nïr jurarninga Tayta Diospa jutinta llutalla jayareg cuenta caycäyanqui. ³⁶Waquinnam ‘Por mi vida’ nïr jurayan. Ni imata nïr nïr nïr ama jurayanquitsu. Tayta Diosllam munayyog caycan hasta agtsayquita yanaman ni yuragman ticsatsinanpäpis. Tsaymi ‘Por mi vida’ nïr juranin Tayta Diospa jutinta llutalla jayareg cuenta caycäyanqui. ³⁷Jurayänayquipa rantin imatapis aunicurga aunicuyanqui cumpliyanayquipä. Y mana aunicur itsanga ama aunicuyanquitsu. Imatapis jurayparä aunicurga llutantam nicäyanqui”.

**Runa mayintsic mana allita
ruramaptintsic mana ajanapänapä
Jesus yachatsicungan
(Lucas 6.29,30)**

³⁸“Musyayanquim Moises gellganganchö caynö ningantapis: ‘Pipis ñawiquita jipiptinga quiquinpa ñawintapis jipisquinqi. Tsaynölla

quiruyquita jipishuptiquipis quiquinpa quiruntapis jipisquinqi’. ³⁹Tsaynö niptinpis nogaga caynömi nï: Runa mayiqui imachöpis mana allita rurashuptiqui ama nanaparanquitsu. Lagyaycushuptiquipis jucag lädu cag cärayquitana camapaycunqui. ⁴⁰Pipis demandashur camisayquita gechushuptiqui punchuyquitapis apacunanpä cachaparinqui. ⁴¹Juc runa gepinta juc läwa aywayyag apapänayquipä obligashuptiqui juc läwa masyagpis päsatpisasquinqirä. ⁴²Imatapis mañacushuptiquega garaycunqui. Tsaynöpis imatapis ‘Mañaycallamay’ nishuptiquega mañaycunqui”.

**Chiquimagnintsicuta cuyanapä
Jesus yachatsicungan
(Lucas 6.27,28,32-36)**

⁴³“Tsaynöllam musyayanqui runacuna caynö niyanganta: ‘Cuyanacungayquiwanga cuyanacunqui. Chiquishogniquitaga chiquinqi’ nïr. ⁴⁴Tsaynö niyaptinpis nogaga caynömi nï: Chiquiyäshogniquicunataga cuyayanqui. Chiquishur contrashogniquicunapäpis Tayta Diosman mañacuyay cawayninchö yanapanapä. ⁴⁵Chiquishogniquicunata tsaynö cuyarga Tayta Diospa wamrancunam caynqui. Tayta Diosga alli runacunapä y mana alli runacunapäpis rupayta ñawitsimunmi. Tsaynöllam alli rurag runacunapä y mana alli rurag runacunapäpis tamyatapis tamyatsimun. ⁴⁶Cuyanacuyangallayquiwana cuyanacuyaptiquega manam ima premiutapis Tayta Dios goyashunquitsu. Runacunapita chiquishga *impuestu cobracogcunapis cuyanacuyangallanwanga cuyanacuyanmi. ⁴⁷Cuyanacuyangallayquiwana

saludanacurga ñima allitatä
ruraycäyanqui? Tayta Diosman mana
criyicogcunapis
cuyanacuyangallanwanga
saludanacuyanmi. ⁴⁸Tayta Dios cuyacog
cangannö gamcunapis cuyacog cayay”.

**Alli ruraychö cawayänapä
Jesus yachatsicungan**

6 ¹“Runacunata yanapar ama
rurayaytsu tsayta ricayäshur
alabayäshunayquillapäga. Tsaynö
cayaptiquega Tayta Dios manam ima
premiutapis goyäshunquitsu”.

²“Faltapacogcunata yanapayangayquita
alabacurnin ama jucta juctarä
willacuyanquitsu waquin runacunanöga.
Paycunaga pillatapis yanapayangantaga
willacurnin puriyan cornëtata tucar
gayarätsegnöran goricäcuyänan
wayicunachöpis y cällicunachöpis. Tsaynö
cayaptinmi paycunapäga runacuna
alabayangan premiulla canga. ³Gamcuna
faltapacogcunata yanaparninga pitapis
manam willapäyanayquirätsu. ⁴Pitapis
mana willapaypa faltapacogcunata
yanapayangayquipitam Tayta Dios
premiuta goyäshunqui”.

**Tayta Diosman mañacuypä
Jesus yachatsicungan
(Lucas 11.2-4)**

⁵“Runacuna ricayänallanpämi waquin
yachag tucogcunaga Tayta Diosman
mañacuyan goricäcuyänan
wayicunachöpis y cällicunachöpis.
Gamcunaga paycunanö ama yachag
tucuyanquitsu. Tsaynö yachag
tucuyanganpitam paycunaga runacuna
alabayangan premiullawanna cayanga.
⁶Gamcunaga Tayta Diosman
mañacurnin pipis mana
ricayäshunayquipä wayi quicunaman
wichgacurcur mañacuyanqui. Tsay
mañacuyangayquita Tayta Dios wiarmi

imaycachöpis yanapayäshunqui. Y
gloriachönam premiuta goyäshunqui”.

^{7,8}“Waqin runacuna Tayta Diosman
mañacur yaparir yaparir juc
niyanganllatam mañacuyan tsaynö
mañacuyaptin Tayta Dios mas
wiyananta yarpap. Gamcuna ama
tsaynöga mañacuyanquitsu. [Tsaypa
rantinga mañacuyay mana llaquicuyäp.]
Tayta Diosga manarä mañacuyaptiquim
imata miñishtiyangayquitapis
musyaycanna. ⁹Gamcunaga Tayta
Diosman mañacuyay caynö:

‘Ciëluchö caycag Tayta Dioslläcuna,
llapan runacuna gamta
adorayälläshuy.

¹⁰ Munangayquinö llapan runacunapis
gamllaman yäracamur
cawaycuyätsun.

Ciëluchö munangayquinölla cay
patsachöpis camacaycullätsun.

¹¹ Cada junapä micuylläcuna ama
faltaycatsillaytsu ari.

¹² Runa mayi mana alli ricamaptinpis
noga perdonangänölla
jutsäcunapita perdonaycayämay.

¹³ Jutsaman Satanas ishquitsiyämayta
munaptinpis tsapaycayällämay,
y yanapaycayällämay llutancunata
imaypis mana rurayänäpä.
Tsaynö caycullätsun”.

¹⁴“Gamcuna runa mayi quicunata
perdonayaptiquega Tayta Dios
gamcunatapis perdonayäshunquim. ¹⁵Si
gamcuna runa mayi quicunata mana
perdonayaptiquega jutsata
rurayangayquicunata Tayta Dios
manam perdonayäshunquitsu”.

**Ayünuchö imanö cayänapäpis
Jesus yachatsicungan**

¹⁶“Tayta Diosman mañacuyänapä
ayunarga ama waquin runacunanö

cayanquitsu. Paycunaga ayunar caycäyanganta runacuna tantiyäyananllapämi wamayashga puriycäyan. Tsayta ricar Tayta Diosman mañacog cayanganta runacuna alabayaptinnam paycunaga tsay premiullawanna cayanga. ¹⁷Gamcuna ayunarninga imaypis cacuyangayquinö cärayquicunata shüpacur y agtsayquicunata nagtsacur cacuyay. ¹⁸Tsaynö rurayaptiquega runacuna manam musyayangatsu ayünuchö caycäyangayquita. Tsayta Tayta Dioslla musyarmi ayunar mañacuyangayquipita premiuta goyëshunqui”.

**Rïcuyayllapä mana
yarpachacunantsicpä cagta
Jesus yachatsicungan
(Lucas 12.33,34)**

¹⁹“Cay patsachö imaycayogpis cayllapä cagta ama yarpachacuyaytsu. Cay patsachöga imayca riquëzatam puyupis ushan, ismurpis ushacan, y runapis suwan. ²⁰Cay patsachö rïcuyayllapä yarpachacuyänaquipa rantinga yarpachacuyay faltapacogcunata yanaparcuyänaquipä cagta. Tsaynö yanapanacur cawarga jana patsamanna imayca riquëzatapis churacog cuentanam caycäyanqui. Jana patsachöga mananam puyupis ushangatsu, ni ismurpis ushacangatsu, ni runapis suwangatsu. ²¹Imaycayogpis cayllapä cagta yarpachacurmi manana Tayta Diosmanga yarpäyanquinatsu”.

**Ningancunata cäsuyänapä
Jesus yachatsicungan
(Lucas 11.34-36)**

²²“Mas alli canman cay ningäcunata cäsucuyaptiquim. ²³Nogata mana cäsumarninmi Tayta Dios munangantaga ruraycäyanquitsu.

Tsaymi tantiyacuyanquitsu tsacaychönö jutsa rurag cayangayquita”.

**Tayta Diosllata cäsuyänapä
Jesus yachatsicungan
(Lucas 16.13; 12.22-31)**

²⁴“Manam pipis ishçay patrontaga sirvinmantsu. Ishçay patronyog carga jucninta cäsucur jucagtaga manam cäsunnatsu. Jucninta cuyarnin jucagtaga mananam cuyannatsu. Tsaynöllam rïcuyayllapä yarpachacogcunapis ‘Tayta Diospa sirvegninmi cä’ nicarpis pay munangannöga mana cawayantsu”.

**Tayta Diosman imaypis
yäracuyänapä Jesus
yachatsicungan
(Lucas 12.22-34)**

²⁵Tsaynö parlapasquirpis caynömi niran: “Ama yarpachacuyanquitsu: ‘Canan ñimatarä micushä? ñimatarä upushä? ñimatarä jaticushä?’ nirnin. Micuynintsic mana captinpis röpantsic mana captinpis cushicushun Tayta Dios cawayta gomangantsicpita. ²⁶Shumag tantiyacuyay pishgucuna imanö cawayangantapis. Paycunaga manam murucuyantsu, manam cosichayantsu, ni tröjacuyantsu. Tsaynö caycaptinpis Tayta Diosmi micuynincuna faltätsintsu. Gamcunaga tsay pishgucunapitapis mas välegmi cayanqui Tayta Diospäga. ²⁷Tsaynö imaycapä mayläya yarpachacurpis ñipirächi tamäñunpita masllataga jatunyarcunman?”

²⁸“Tsaynö caycaptinnga ñimanirtä gamcuna yarpachacuyanqui alli röpushga cayänaquipä cagllatarä? Tantiyacuyay waytacuna imanö cuyaypä tuctuyangantapis. Tsaycunaga manam aruyantsu ni putsacuyantsu. Peru nicarpis imanö cuyayllapämi ricacuyan. ²⁹Waytacuna cuyayllapä

tuctuyangannöga manam unay rey Salomon jaticungan röpancunapis iwalargantsu. ³⁰Tsay waytacuna tsaquirinanlla caycaptinpis Tayta Diosga ima shumagtam tuctutsin. Tsaynö cuyayllapäta tuctuycätsirga ñmanatsurä gamcunatanäga yanapayäshunquiman röpushga cayänayquipä, yäracuyninag runacuna?”

³¹“Tsaynö caycaptinga ama yarpachacur puriyaytsu: ‘¿Imatarä micushä? ¿Imatarä upushä? ¿Imatarä jaticushä?’ nirnin. ³²Tsaycunata yarpachacurga puriyan Tayta Diosman mana yäracog runacunallam. Gamcunaga tsay mana yäracog runacunanö ama yarpachacuyaytsu. Tayta Diosga musyaycanmi imata miñishtiyangayquitapis. ³³Ima miñishtiyangayquipäpis yarpachacuyänayquipa rantinga Tayta Dios munanganta rurar cawayänayquipä cagta yarpachacuyayga. Pay munangannö cawayaptiquega imata miñishtiyangayquitapis Tayta Dios manam faltätsingatsu”.

³⁴“Tsaynö caycaptinga ama yarpachacuyaytsu waray junagpä cagtaga. Tayta Dios canan junag yanapayäshungayquinölla cada junagpis manam dejayäshunquitsu”.

**Runa mayintsicta mana
juzganantsicpä Jesus yachatsicungan**
(Lucas 6.37,38,41,42)

7 ¹“Ama runa mayiquipa vidanta ashiyanquitsu, gamcunapis Tayta Diospita mana juzgashga cayänayquipä. ²Runa mayi quicunapa wasan rimayaptiqui tsay wasarima cayangayquillamanmi Tayta Dios gamcunatapis niyashunqui mana alli rurag cayangayquita”.

³“Gamcunaga ñmanirtä runa mayi quicunapa ñawinchö shucata

jipicuriyänanta munar ricapäyanqui, quiqui quicunapa ñawiquicunachö geru cuentatarä jipicuriyänayqui caycaptin? ⁴Ñawiquicunachö geru cuenta caycaptinga ñmanöparä runa mayiquitarä niyanquiman: ‘Ñawiquichö shucata jipipasquishayqui’ nirnin? ⁵¡Yachag tucogcuna! Puntataga ñawiquicunachö cagtarä jipicuyay. Tsayrämi ricayta puëdiyanqui runa mayiquipa ñawinchö caycagta jipipäyänayquipäga”.

⁶“Tayta Diospa alli willacuyninta willapäcuyaptiqui mana chasquicuyaptinga mejor ama willapäyanquinatsu. Willapar sigiyaptiquega ajacurcuyangallanam. Tsaynö mana chasquicuycagta willaparninga alläpa chaniyog aläjata cuchi llutscananpä jitapaycog cuentam caycäyanqui”.

**Tayta Diosman mañacunanantsicpä
Jesus yachatsicungan**
(Lucas 11.9-13)

^{7,8}“Imaypis Tayta Diosman mañacuyay. Imata miñishtirpis rugacuyay. Puncupita gayacognörä mañacuyay. Tayta Diosman mañacogcunaga chasquiyanmi. Imata miñishtirpis rugacogcunaga tariyanmi. Gayacogcunataga Tayta Dios wiyanmi”.

⁹“Gamcunata maygayquitapis wamrayquicuna tantata mañacuyäshuptiqui ¿rumitatsurä aptaparcuyanquiman? ¹⁰Y tsaynölla pescäda mañacuyäshuptiquipis ¿culebratsurä aptaparcuyanquiman?

¹¹Gamcunaga mayläya yaga carpis wamrayquicunataga alli cagllatam garayanqui. Tsaynö gamcunapis caycäyaptiquega ciëluchö caycag Tayta Diosga masrämi imaycatapis allicunallata faltätsiyäshunquitsu”.

¹²“Runa mayiqui alli ricashunayquita munarga gamcunapis paycunata alli

ricayay. Runa mayintsicwan tsaynö alli ricanacur shumag cawanantsicpämi Moises gellganganchöpis y profetacuna gellgayanganchöpis nin”.

**Ciëlupa aywana cag nänita
acranantsicpä Jesus yachatsicungan**
(Lucas 13.24)

13,14“Ciëلمان aywag nänega llanullam. Tsay näniman yaucuyänayquipäga puncupis quichquim. Peru infernuman aywag nänim itsanga anchu. Tsay nänipaga puncupis jatunmi. Tsaynö captinmi infernumanga atscá runacuna aywaycäyan. Ciëلمانmi itsanga wallcaglla. Gamcunaga imaycanöpapis ciëلمان chátsicog cag nänipa aywayay”.

**Llutan yachatsicogcunapä
Jesus musyatsicungan**
(Lucas 6.43,44)

15“Diospa willacogninmi cá’ nir shamog llutan yachatsicogcunata ama chasquipäyanquitsu. Paycunaga Tayta Diosman criyicog tucullarmi runacunata yaycapäyan üshacunaman atog yachayllapa yacognölla. 16Imanö cawayangantapis ricarmi musyayanqui mana alli willacog cayanganta. ¿Acásu casha jachapitacu üvata pallantsic? Ni higustapis manam cardun jachapitatsu pallantsic. 17,18Chirimöyaga manam goyrumshatatsu wayun. Tsaynöllam goyrumshapis mana wayuntsu chirimöyataga. 19,20Ima jachapis mana allita wayungannömi mana alli willacogcunapis mana allicunata rurar cawayan. Tsaynö cawayaptinmi musyayanqui llutan yachatsicogcuna cayanganta. Chacracunachö goyrumsha captin siquipita muturir rupatseg cuentam paycunapis infernuman gaycucäyanga rupayänanpä”.

**Tayta Diosta cäsucogcunalla
gloriaman aywayänanpä
Jesus willangan**
(Lucas 13.25-27)

21“Manam jutita jayarir ‘Señorllá’ niyanganllawantsu pipis gloriaman yaucuyanga. Gloriamanga yaucuyanga Tayta Dios munanganta rurar cawagcunallam. 22Fisyu final junagchöga atscagmi niyámanga: ‘Señorllá, gampa willacuyniquitam willacur purirgä. Y gamman criyicurmi supaycunatapis runacunapita gargurgä. Tsaynöllam gamman yäracuyniwan milagrucunatapis rurargä’. 23Tsaynö niyámaptinpis nogaga caynömi nishä: ‘Gamcunaga manam cäsuyämarguyquitsu. iÑöpäpita witicuyay, mana alli rurag runacuna!’ nirinmi”.

**Wayita shäritseg
runaman iwalatsingan**
(Lucas 6.47-49)

24“Noga ningänö pipis cawag cagga alli cimientushga wayi shäritsishganömi caycäyanqui. 25Pasaypa tamyaptin gashgay yacu shamurpis y vientuptionpis cimientushga wayega manam imananpistsu. 26Noga yachatsingäcunata mana cäsucog runacunam itsanga allpa janallanchö shäritsishga wayinölla cayan. 27Tsay cimientuynag wayitaga yacu goricar shamurninpis y feyupa vienturninpis juchuratsinmi”. 28Jesus tsaynö yachatsicuptinmi tsaychö runacuna espantacur cushicuyargan: 29“¡Moises gellgangen leycunata yachatsicogcunapitapis Jesusga mas yachagmi!” nirin.

**Leprawan geshyag runata
Jesus allitsingan**
(Marcos 1.40-45; Lucas 5.12-16)

8 1Jircanchö yachatsicunganpita Jesus urämuption atscag runacunam

gaträyargan. ²Tsay uraycämogmanmi juc leprosu Jesuspa ñöpanman gonguricuycur rugacurgan: “Taytay, cay geshyäpita alliyatsillamay” nirin.

³Tsaynö rugacur niptinmi Jesus yataycurgan: “Cananpitaga allisquishganam canqui” nir.

Tsaynö nisquiptinmi jinan öra tsay *Iepa geshyan allisquirgan. ⁴Nircurmi Jesus niran: “Ama pitapis willanquitsu noga allitsingäta. Tsay willacunayquipa rantinga Moises gellganganchö ningannölla templuman ayway Diospä ofrendata apacurcur sacerdoti ricashunayquipä.” ^eSänuna cangayquita sacerdoti nishuptiquim itsanga llapanpis musyayanga rasunpa allishgana cangayquita”.

**Romapita capitampa wätayninta
Jesus allitsingan**

(Lucas 7.1-10; Juan 4.43-54)

⁵Tsaypita Capernaum marcaman Jesus chäriptinnam *Roma soldäducunapa juc capitannin Jesusman aywaycur rugar caynö niran: ⁶“Taytay, wätaynichä pasaypa antsa wayichö ujuraycan. Mananachä cuyupacunnapistu”.

⁷Tsaynö niptinmi Jesus niran: “Canantämi aywä allitsinäpä” nir.

⁸Tsaynö niptinmi capitana niran: “Taytay, Israel runacunawan mana chänacuycäyaptëga imanöparächi wayiman aywanquiman? Tsaypa rantinga cayllapita niycullay wätayni allisquinanpä. ⁹Nogapis mandamagnipa munayninchömi callä. Tsaynöllum nogapa munaynichö caycäyan mandangä soldäducunapis. Maygantapis imamanpis mandaptëga aywanmi. Maygantapis ‘Gam shamuy’ niptëga

shayämunmi. Imatapis rurananpä mandaptëga wätaynipis rurayanmi. [Gamga nogapitaga imaycawanpis mas munayyogmi canqui. Noga musyämi imapis ningayquega ruracasquinanpä cagta]” nir.

¹⁰Capitan tsaynö niycuptin Señor Jesusga feyupam cushicurgan. Tsaynam gatragnin runacunata niran: “Cay runanö rasunpa yäracuyyog runawannöga manam Israel runacunachöpis tincurgötsu.

¹¹Gloriamanga atscagmi chäyanga rupay ñawimunan cag lädupita y rupay jeganan cag lädupitapis. May tucuypitapis chaycur gloriachömi *Abrahamwan, Isaacwan y Jacobwan jamacuyanga micuyänapä. ¹²Peru waquin runacunam itsanga Diospa willacuyninta yacharpis nogaman mana yäracayämunganpita gloriama chäyangatsu. Gloriaman mana chagcunaga pasaypa tsacayman gaycushgam cayanga. Tsaychömi pasaypa wagarnin imanö caytapis manana puëdir quiruncunatapis uchuyangarä”.

¹³Tsaynö nisquirnam capitanta Jesus niran: “Cananga wayiquipa cuticuy. Yäracamungayquinöllum wätayniqui allishgana caycan” nir. Tsay nigan öram capitampa wätaynin allisquirgan.

Pedrupa suegranta Jesus allitsingan

(Marcos 1.29-31; Lucas 4.38,39)

¹⁴Tsaypita Pedrupa wayinman Jesus aywarnam tarirgan Pedrupa suegran pasaypa antsa achacharnin cämachö ujuraycagta. ¹⁵Tsaynam geshyagpa maquina Jesus yataycuptin jinan öra allisquirgan. Allisquirnam juclla cusnacurgan paycunata garanapä.

e 8.4 Leprawan geshyag runacuna allisquir ima ofrendatapis apayänapä cagta musyanayquipä liyinqi Levitico 14.1-32.

**Imaycaläya geshyawan
geshyagcunata Jesus allitsingan**
(*Marcos 1.32-34; Lucas 4.40,41*)

¹⁶Patsa tsacaycaptinnam
apayämurgan Jesusman supay
geshyatsingan runacunata. Tsay
supaycunatam Jesusga juc shimillachö
runacunapita garguran. Tsaynöllam
imaycaläya geshyawan
geshyagcunatapis allitsirgan.

¹⁷Tsaycuna ruracänan captinnam
Diospa unay willacognin profëta Isaias
caynö gellgargan:

“Salvacog shamogmi geshyaycag
runacunata allitsinga” nir.

**Gitirayta munag runacunata
Jesus tantiyatsingan**
(*Lucas 9.57-62*)

¹⁸Atsca runacuna gorirapâyaptinnam
discipuluncunata Jesus nirgan:
“Listacuyay büquiwän gochapa
wac-tsimpanman päsanapä” nir.

¹⁹Büquiman yarcuyänapä
caycaptinnam Moises gellgangan
leycunata yachatsicog juc runa Jesusta
nirgan: “Maypa aywaptiquipis gamtaga
gaträshayquim, taytay”.

²⁰Tsaynö niptinmi Jesus nirgan:
“Atogcunapaga machaynincuna canmi.
Pishgucunapapis geshuncuna canmi.
Peru noga Tayta Diospita shamogpaga
manam ni juc wayillapis cantsu maychö
punuycunällapäpis” nir.

²¹Tsaypitanam juc discipulun nirgan:
“Tayta Jesus, papäni wanuptin
pampaycurga gamta gatrishayquim”.

²²Tsaynö niptinnam Jesus nirgan:
“Pampaytarä shuyacunayquipa rantinga
juclla nogawan aywacushun.
Wanogcunataga quëdagcunanachir
pampacuyanga” nir.

**Vientuta yacu lagchicachagta
Jesus päratsingan**
(*Marcos 4.35-41; Lucas 8.22-25*)

²³Tsaynö nisquirnam
discipuluncunawan büquiman Jesus
yarcuran. ²⁴Gochata
aywaraycâyaptinnam Jesusga
gepamanpachö punucasquirgan.
Tsayyagnam feyupa vientuwan yacu
lagchicachar gallaycuran büquitapis
jundicäsiytana munarnin. ²⁵Tsaynam
discipuluncuna Jesusta ricchatsir
niyargan: “iRicchay, salvaycâyamay,
taytay! iJundicaycantsicnachä!” nir.

²⁶Tsaynö niyaptinnam Jesus nirgan:
“¿Imanirtä tsayläya mantsacâyänqui?
¿Manacu nogaman yärcayämunqui?”

Tsaynö nisquirnam ichircur
vientutapis yacutapis päracunanpä
nirgan. Y jinan öram tsaynö niycuptin
vientupis yacupis pärasquirgan.

²⁷Tsayta ricarnam discipuluncunaga
espantashga quiquin pura ninacuyargan:
“Yacupis vientupis cäsuycunanpäga ima
runanatä cay runaga” nir.

**Supay löcuyätsingan ishca
runacunata Jesus allitsingan**
(*Marcos 5.1-20; Lucas 8.26-39*)

²⁸Gochata päsarirnam
discipuluncunawan Jesus châyargan
Gadara marcapa washaläninman.
Tsaychönam supay löcuyätsingan ishca
runacuna panteonpita yargayämurgan.
Tsaychö tsay demöñuyog runacuna
pasaypa mantsaripä cayaptinmi tsay
panteon puncupaga pipis päsayagtsu.
²⁹Jesusta ricasquirnam tsay ishca
runacuna mantsarir gayararnin
niyargan: “iDiospa tsurin Jesus! Manarä
öräcunachömi cayman shamurguyqui
infiernuman gaycayämänayquipäna” nir.

³⁰Paycuna cayanganpita mas
washalänin quinnannam atsca

cuchicuna micuycäyargan. ³¹Tsaymi tsay supaycuna rugacuyargan Jesusta: “Cay runacunapita gargayämarga tagay cuchicunallaman yaycucuycuyänäpä cachaycayällämay” nir.

³²Tsaynö niyaptinnam Jesus nirgan cuchicunaman aywacuyänanpä. Tsaynam supaycuna ishcan runacunapita yargusquir jegacuycuyargan tsay cuchicunaman. Cuchicunanam acataycachaycar tunapita gochaman jegarpäriyargan. Tsaychömi augacaypa llapan cuchicuna wanuyargan.

³³Tsayta ricaycurnam cuhi mitsegcunaga cörrilla aywayargan marcaman. Chaycurnam runacunata willacuyargan löcuyashga runacunapita supaycunata Jesus gargunganta y cuchicuna gochaman jegar wanuyanganta. ³⁴Tsaycunata willacuyaptinnam runacuna aywayargan Jesus caycanganman ima päsangantapis ricagnin. Tsayman chaycarnam mantsarirnin Jesusta niyargan tsay marcancunapita jucläpa aywacunanpä.

**Pullan cuerpun wanucashga runata
Jesus allitsingan**

(Marcos 2.1-12; Lucas 5.17-26)

9 ¹Tsaypitnam büquiman yarcucur Jesusga cuticurgan taycangan Capernaum marcaman. ²Tsaychöna Jesus caycanganta musyasquirnam pullan cuerpun wanushga geshyagyashga runata andamiawan wantushga chätsiyargan. Señor Jesusga payman yäracuyanganta musyarnam tsay geshyagta nirgan: “Hiju, ama llaquicuytsu. Jutsa rurayniqicunata perdonargönam” nir.

³Tsaynö niptinmi Moises gellangan leycunata waquin yachatsicocuna

yarpachacuyargan: “Dios tucurnin tsaynö nirga Tayta Diospa contranmi llutanta parlaycan” nir.

⁴Tsaynö yarpaycäyanganta musyarnam Jesus nirgan: “¿Imanirtä gamcuna llutanta yarpäyanqui? ⁵iShumag tantiyacuy! ¿Runapa jutsancunata perdonaycu o geshyancunata allitsiycu, maygantä mas aja? ⁶Nogaga Tayta Dios cachamashga captinmi munayyog cä runacunapa jutsancunata perdonanäpä. Tsayta musyayänayquipämi cay runata allitsimushä”.

Tsaynö nisquirnam tsay geshyagyashga runata nirgan: “iSharcuy! Andamiayquita apacurcur wayiquipa aywacuy” nir.

⁷Tsaynö niyauptinmi tsay runa jinan öra allisquir wayinpa aywacurgan. ⁸Tsayta ricaycurmi runacuna pasaypa espantashga cushicurnin Tayta Diosta alabayargan caynö nir: “iTayta Dios yanapaptinmi tsaycunata Jesus ruraycan! iManam imaypis mayarguntsictsu pipis caynö ruragtaga!”

**Jesus Mateuta discipulun
cananpä ningan**

(Marcos 2.13-17; Lucas 5.27-32)

⁹Tsaypita aywacurnam Jesus ricargan Mateo jutiyog juc runata. Mateoga *Roma nacionpä *impuestu cobracogmi cargan. Tsaynam cobrar jamaraycagta ricaycur Jesus nirgan: “Discipulü canayquipä acu, aywacushun” nir. Tsaynö niptinmi Mateo sharcur Jesuswan aywacurgan.

¹⁰Tsaypitam Mateupa wayinchö Jesus discipuluncunawan micuycäyaptinna chäyargan waquin invitäduncuna. Paycunaga cayargan Romapä impuestu

f 9.1 Nazaret marcachö shacshacushga carpis willacur gallarnaga Jesus Capernaum marcachönam täcurgan.

cobracog mayincunam y waquin mana alli ricashga cag runacunam. ¹¹Tsayta ricarnam fariseucunaga jamurarin Jesuspa discipuluncunata niyargan: “¿Imanirtä mayistruyquicunaga juntacan impuestu cobracogcunawan y tsay waquin jutsachö cacog runacunawanpis?” nir.

^{12,13}Tsaynö niyanganta wiyanam Jesus nirgan: “Nogaga shamurgö manam alli rurag runacunallamantsu Diospa willacuyininta willapagnin, sinöga shamurgö jutsachö cawacogcunatapis willapänäpämi. Tayta Diospa palabran gellgaranganchöpis caynömi nican: ‘Manam ashmacunata *altarchö rupatsiyänallayquitatsu munä, sinöga cuyapäcog cayänayquitam munä’ nir. Tsaynö nicaptinpis gamcunaga imanirtä mana alli ruragcunatapis cuyapäyanquitsu? Llapanpis Diospa willacuyininta tantiyatsiyänanta miñishtiyäyanmi, geshyagcuna jampicogta miñishtiyangannölla. [Tsaymi paycunawanpis nogaga juntacü Diospa alli willacuyininta tantiyatsinäpä]”.

Ayünupä Jesusta tapuyangan

(Marcos 2.18-22; Lucas 5.33-39)

¹⁴Juc cutichönam Juan Bautistapa gatiragnincuna Jesusman witiycur tapuyargan: “Nogacuna y fariseucunaga imaypis ayunayämi. Peru gampa discipuluyquicunaga imanirtä ayunayantsu?” nir.

¹⁵Tsaynam Jesus nirgan: “Jucta niyäshayqui. Juc casacuy fiestachö ¿compañagnincuna ayunayantsurä? Tsaynöllam discipulücunapis nogawan caycarga ayunayänantsu. Noga wanusquiptimi itsanga ayunayanga”.

¹⁶“Tsaynö manam pipis macwa röpata remendantsu mushog ratashwanga. Tsaynö remendayaptinga mushog ratashga genticätsirmi macwa cagtaga rachicäratsinman. ¹⁷Tsaynömi tsayrä

puwatsishga aswataga mana pipis jirpuntsu tsillinaycag urpumanga. Tsay tsillinaycag urpuman jirpushgaga aswa pogurmi tsay urputa masrä tsillicäratsinman. Tsaynam aswapis ushacanman y urpupis paquicar ushacanman. Tsaynö captinmi sänu urpuman tsayrä puwashga aswataga jirpuntsic. [Tsaynömi nogapa willacuyinipis mushog car gamcunapa üsuyquicunamanga iwalantsu. Tsaymi discipulücunata niyänayquitsu nogawan caycayanganyagga ayunayänanpä]”.

Juc autoridäpa wamranta Jesus cawaritsingan y yawar apaywan geshyag warmita allitsingan (Marcos 5.21-43; Lucas 8.40-56)

¹⁸Tsaynö parlaycaptinmi Israel runacunapa autoridänin juc runa chaycur Jesuspa ñöpanman gonguricuycur nirgan: “Taytay, warmi tsurillächä wanusquishga. Acuri jinallachö aywayculläshun cawarircatsillämunayquipä” nir.

¹⁹Tsaynö rugacuptinmi discipuluncunawan Jesus aywayargan tsay runapa wayinman. ^{20,21}Nänita aywaycäyaptinnam chunca ishca (12) watana yawar apaywan geshyacog juc warmipis gepancunata aywargan caynö yarpär: “Jesuspa röpallantapis yataycurga allisquishämi” nirmän. ²²Tsaynö nir yataycuptinnam Jesusga gepapa ticraycur warmita nirgan: “Ama llaquicuysu, hija. Nogaman yäracamuyniquipam allisquirguyqui” nir. Tsaynö niycuptin tsay warmega allisquirganmi.

²³Tsaypita tsay Israel runacunapa autoridäninpa wayinman chaycurnam tariyargan ayachö müsicucuna tucaycäyagta y runacunapis pasaypa wagaycäyagta. ²⁴Tsayta ricaycurmi Jesus nirgan: “Wagtapa yargucuriyay. Cay wamraga cawarimunga punucashga caycanganpita riccharcamognöllam” nir.

Tsaynö Jesus niptinnam runacuna asicuyargan. ²⁵Peru imanö captinpis Jesus ningannöllum wagtaman yargacarayämurgan. Runacuna yargacarayämuptinnam wanushga caycag wamra sutaraycanganman Jesus yaycargan. Nircurnam maquinpita tsarircur wamrata cawatsir sharcatsimurgan. ²⁶Tsaynö cawaritsir milagruta rurangantaga maytsay marcacunanapis willacur chätsiyarganmi.

**Ishcay gapracunata
Jesus allitsingan**

²⁷Tsaypita Jesus aywacuptinnam ishcay gapracuna gatipäyargan: “iUnay rey *Davidpa castan Jesus, ñawilläcunata alliscatsiyällamay!” nir.

²⁸Tsaynö nir gataraycäyaptinmi patsacungan wayiman Jesus yaycurirgan. Tsaychönam tsay gapracunata Jesus tapurgan: “¿Gamcuna criyianquicu ñawiquicunata allitsinäpä cagta?” nir.

Tsaynö niptin paycunanam niyargan: “Aumi, taytay. Criyiyällämi alliycatsiyämänayquipä cagta” nir.

²⁹Tsaynam ñawincunata Jesus yataycur niran: “Nogaman yäracayämungayquipita ñawiquicuna allisquitsun” nir.

³⁰Tsaynö nisquiptinmi juclla ñawincuna allisquirgan. Tsaypitam paycunata Jesus niran: “Ama pitapis willapayanquitsu allitsingäta” nir.

³¹Tsaynö nicaptinpis paycunaga yargurillarnam pitapis maytapis willacuyargan Jesus allitsingan.

**Shimin mana parlag runata
Jesus allitsingan**

³²Tsay gapracuna jegariyaptinnam Jesus caycanganman runacuna apayämurgan shimin mana parlag juc runata. Tsay runataga supaymi upayätsishga canä.

³³Tsay runapita supayta Jesus

garguriptinmi upayashga caycanganpita juclla parlar gallaycargan. Tsayta ricarmi runacuna cushicur niyargan: “iManam imaypis ricarguntsictsu pipis caynö allitsicogtaga!” nir.

³⁴Tsaynö niyaptin fariseucunam itsanga niyargan: “Manam Tayta Diospa poderninwantsu supayta tsay runapita gargushga, sinöga supaycunapa mandagnin Satanaspä poderninwanmi gargushga” niran.

Runacunata Jesus cuyapangan

³⁵Maytsay marcacunachöpis estanciacunachöpis Jesusga Tayta Diospa alli willacuynintam yachatsicurgan goricäcuyäna wayicunachö. Nircurmi imaycaläya geshyawan geshyagcunatapis allitsirgan. ³⁶Tsaynö maytsay marcacunapa purirmi Jesusga ricargan runacuna imayca mitsegniynag üshacunanö cayagta. Tsaynö lluta cawacuyanganta ricarmi Jesus cuyapangan. ³⁷Tsaymi discipuluncunata niran: “Cosëcha poguraycagnöpis maytsicag runacunam caycayan Tayta Diospa alli willacuyninta juclla chasquicuyta munagcunaga. Tsaynö captinpis wallcagllam tsay alli willacuyta willacogcunaga cayan. ³⁸Tsaynö captin gamcuna Tayta Diosman mañacuyay willacogcuna mas atsca cayänapä” nir.

**Jesucristupa chunca ishcay
apostolnincuna**

(Marcos 3.13-19; Lucas 6.12-16)

10 ¹Tsaypitanam chunca ishcay (12) discipuluncunata Jesus niran supaycunata runacunapita garguyänapä y tucuyläya geshyawan geshyagcunata allitsiyänapä.

²Tsay *apostolcunaga cayargan:

Simon (Simonpa jucag jutinmi cargan Pedro),
Simonpa waugin Andres,

Zebedeupa tsurincuna Santiaguwan
 Juan,
³ Felipe,
 Bartolome,
 Tomas,
 Mateo (Mateoga Roma nacionpä
 impuestuta cobragmi cargan),
 Alfeupa tsurin Santiago,
 Tadeo,
⁴ “Celote” ningan Simon, y
 Jesusta ranticog Judas Iscariote.

**Alli willacuyninta willacur
 puriyānanpä apostolnincunata
 Jesus cachangan**
(Marcos 6.7-13; Lucas 9.1-6)

⁵Tsay chunca ishca apostolnincunata
 Jesus willacog cacharnin caynömi
 nirgan: “Ama aywayanquitsu mana
 Israel runacunapa marcacunamanga,
 ni ama yaucuyanquitsu *Samaria
 provincia marcacunamanga. ⁶Tsaypa
 rantinga Israel runacunallaman
 aywayanqui. Paycunam ogracashga
 üshacunanöga caycāyan. ⁷Paycunata
 willapāyanqui: ‘Tayta Dios
 cachamunanpä cag salvamagnintsic rey
 chāmushganam’ nir. ⁸Geshyagcunata
 allitsiyanqui. Wanushgacunatapis
 cawaritsiyanqui. *Lepra geshya
 ushaycagcunatapis allitsiyanqui. Y
 supaycunatapis runacunapita
 garguyanqui. Allitsirga ama pitapis
 cobrayanquitsu. Nogapis gamcunata
 manam cobrätsu allitsiyānayquipä
 podernita gornin”.

^{9,10}“Ama apayanquitsu gellëta ni
 millcapata ni trocanayquicunata.
 Jatirāyangayqui llangiquicunallawan
 aywayanqui. Arupacogcunata
 pachancuna mana faltaypa

garayangannömi mayman
 chāyangayquichöpis mana
 faltätsiyāshunquitsu”.

¹¹“May marcaman o may
 jallgacunaman charpis tapucuyanqui
 mayganpis alli runa canganta. Alli
 runaman charninga wayillanchö
 patsarācuyanqui juc marcaman
 päsayangayquiyag. ¹²Tsay
 patsatsiyāshog runapa wayinman char
 shumag saludacuyanqui. ¹³Tsay
 wayiyog chasquiyāshuptiquega
 payllachö patsarācuyanqui. Mana
 chasquiyāshuptiquega jucmanna
 päsacuyanqui posadata ashirnin.
¹⁴Runacuna willacuyangayquita mana
 chasquicuyaptinga tsay marcapitapis
 yargur aywacuyanqui
 chaquiquicunapita polvuta tapsirir.⁸
¹⁵Willacungayquita mana chasquicog
 runacunaga fisyu final junagmi
 castiguta chasquiyanga. Sodoma y
 Gomorra marcacunachö tagcuna
 castigashga cayanganpitaga masmi
 castigashga cayanga”.

**Diosman criyicungantsicpita
 runacuna chiquimānantsicpä cagta
 Jesus willacungan**
(Marcos 13.9-13; Lucas 21.12-17)

¹⁶“Shumag tantiyacuyay.
 Gamcunataga cachaycä üshacunata
 atogman gaycapag cuentam mana alli
 runacuna cayanganman. Tsaynö
 caycaptinga culebranöpis maya-mayalla
 puricuyanqui. ¹⁷Chiquiyāshogniqui
 runacunaga autoridācunamanpis
 apatsiyāshunquim. Waquincunaga
 goricācuyānan wayicunachöpis
 magayāshunquim. ¹⁸Nogaman
 criyicamog cayangayquipitam
 autoridācunamanpis y nacion mandag

g 10.14 Israel runacunaga üsuncunamanmi chaquincunapita polvuta tapsicuriyag Tayta Dios
 castigananpä cagta musyatsir.

reycunamanpis apayäshunqui castigayäshunayquipä. Tsaychömi paycunatapis y waquin mana Israel runacunatapis musyatsiyanqui noga runacunata salvanäpä shamungäta. ^{19,20}Tsaynö autoridäcunaman entregayäshuptiquipis ama llaquicuyanquitsu: ‘Cananga ñimatarä niycushä?’ nirnin. Paycunapa ñöpanchö manam quiquiquicunapa yarpayllayquicunapitatsu parlayanqui. Espiritu Santum tantiyatsiyäshunqui imata parlayänayquipäpis”.

²¹“Nogaman criyicamunganpitam chiquirnin wauginta autoridäcunaman entregayanga wanutsishga cananpä. Waquinnam tsurincunata entregayanga wanutsiyänanpä y waquinnam taytantapis entregayanga wanutsiyänanpä. ²²Nogata chasquicamar criyicayämungayquipitam pipita maypitapis chiquishga cayanqui. Tsaynö chiquishga carpis hasta wanuyanganyagpis nogaman yäracamog cagmi Tayta Diospa ñöpanman chäyanga. ²³Juc marcachö chiquiyäshuptiquega juc marcaman empëñu päyacuyanqui. Llapan Israel nacion marcacunaman manarä chäyaptiquim nogaga cutimushä”.

^{24,25}“Ama yarpäyaytsu noga raycur imaypis mana chiquishga cayänayquipä cagtaga. Nogata runacuna chiquiyäyämarga gamcunatanäga masrämi chiquiyäshunqui. Nogatapis ‘iSatanasmi payga!’ nicäyämarga gamcunatapis Satanaspita cayanayquitam niyäshunqui”.

**Pitapis mana mantsacuypa
willacuyninata willacunapä Jesus
yachatsicungan
(Lucas 12.2-7)**

²⁶“Cay patsachö runacuna chiquiyäshuptiquipis mana mantsariypa

willacuyñitaga willacuyay. Tsaynö allita rurur willacuyaptiqui runacuna mana chasquicuyanganpis musyacangam Tayta Dios fisyu final junagchö juzgaptin. ²⁷Tsaynö caycappinga willacungäta mana wiyaq cagcunataga gamcunana pita maytapis willacuyanqui. Tsaynö willacuyänayquipämi gamcunata willapaycä. ²⁸Nogapa willacuyñita willacuyaptiqui runacuna wanutsiyäshurpis almayquicunataga manam imanayangatsu. Tsaynö caycappinga manam pitapis mantsacuyänayquitsu. Paycunapita mantsacuyänayquipa rantinga Tayta Diosllata mantsacuyay. Paymi munayyog caycan almantinta infiernuman gaycunanpäpis”.

²⁹“Pishgucuna runacunapä mana alläpa cuestaptinpis Tayta Diospäga välinmi. Wanunanta mana munaptinga ni jucllayllapis manam wanuyantsu.

³⁰Tsaynömi agtsayquicunatapis yupashgata payga caycätsin.

³¹Pishgucunapitapis mas väleg cayaptiqui Tayta Dios cuidaycäyäshuptiquega pipitapis manam mantsariyänayquitsu”.

**Jesus raycur runacunachö parlagcuna
imanö cayänanpä willacungan
(Lucas 12.8,9)**

³²“Pipis nogaman criyicog canganta mana pengacuypa willacuptinga nogapis Tayta Diospa ñöpanchö paycunapa favorninmi parlashä. ³³Pipis nogapita pengacur willacuyñita mana willacuptinga nogapis Tayta Diospa ñöpanchö paycunata ‘Manam regitsu’ nishämi”.

**Jesusman criyicogcuna chiquishga
cayänanpä ningan
(Lucas 12.51-53; 14.26,27)**

³⁴“Ama yarpäyaytsu nogaman criyicayämungayquipita mana

chiquishga cayänayquipä cagta. Criyicamogcunataga imaypis chiquiycăyangam. ³⁵Nogaman criyicamunganpitam tsurinpis taytanpa contran canga. Tsaynöllam mamanpa contran wawanpis canga. Y llumtsuyninpis suegranpa contranmi canga. ³⁶Tsaynömi ari chiquiyăshogniquicunaga cayanga quiquicunapa castayquicunapita gallaycur”.

³⁷“Nogaman criyicamunganpita maman chiquiptinpis, taytan chiquiptinpis, o tsurin chiquiptinpis noga ningăta rural imaypis cawatsun. Peru noga ningăcunata mana căsumar mamanpa, taytanpa, o tsurinpa munayninchă cacog cagga manam rasunpatsu criyicamun. ³⁸Imaycachă ñacarpis nogaman criyicamur cawayătsun. Wanunganyag noga ningăcunata mana căsumag cagcunaga manam rasunpatsu nogaman criyicayămun. ³⁹Noga munangănă mana cawar quiquin munangannă cawagcunaga infernumanmi gaycucăyanga. Imayca ñacaychă carpis noga munangănă cawagcunam itsanga gloriaman chăyanga”.

Tayta Diospa ñăpanchă premiuta chasquiyănanpă Jesus willacungan
(*Marcos 9.41*)

⁴⁰“Gamcunata pipis chasquiyăshurga nogatapis chasquiyăyămanmi. Y nogata chasquimarga cachamagnă Tayta Diostapis chasquiyăyanmi. ⁴¹Tayta Diospa willacogninta chasquicogcunaga gloriaman char willacogcuna premiuta chasquiyangannöllam chasquiyanga. Tsaynöllam Tayta Dios ninganta cumplir alli rurag runata chasquicog cagpis gloriaman char tsay alli rurag runa premiuta chasquingannöllă chasquiyanga. ⁴²Nogata chasquicamag

cagta pitapis yacullanpis garaycog cagga Tayta Diospitam premiuta chasquinga”.

11 ¹Tsaynö chunca ishca (12) apostolnincunata willapayta ushasquirmi Jesusga Galilea provinciapa marcancunapa purirgan Diospa alli willacuyninta willacurnin.

Juan Bautistapa cachancuna Jesusman tapog aywayangan
(*Lucas 7.18-35*)

²Carcelchă caycarmi Juan Bautista mayargan Señor Jesus milagrucunata ruraycanganta y Diospa alli willacuyninta willacur puriyanganta. Tsaynam discipuluncunata Jesusman cachargan caynă tapuyămunanpă: ³“¿Gamcush canqui Tayta Dios cachamungan salvacog, o jutarăcush shuyacuyăshă?” nir.

⁴Tsaynö tapuyaptinmam Jesus nirgan: “Canan aywar Juanta niyay cay ricaycăyangayquicunata y wiyaycăyangayquicunata. ⁵Gapracuna ricayannam. Mana puriyta puădegcuna puriyannam. *Leprawan geshyagcunapis alliyashgam. Upacunapis wiyayannam. Wanushgacunapis cawariyămushgam. Muchuychă cawagcunamanpis Diospa alli willacuyninga chaycannam. ⁶Tsaycunata willayaptiquim cushicunga nogapita. Nogaman imaypis yăracamungannöllă yăracamutsun”.

⁷Tsaypita Juan Bautistapa cachancuna cuticusquiyaptinmam runacunata Jesus Juanpita parlapar nirgan: “Tsunyag jircaman Juanta ricapăyănayquipă aywar manam jachata vientu cuyutsegman ricapagtsu aywayargayqui. ⁸Y manam allăpa chaniyog răpan jatishga canganta ricapăyănayquipătsu aywayargayqui. Tsaynö chaniyog răpashgacunaga reypa wayincunallachămi taycăyan, manam

tsunyagcunachötsu. ⁹Manam tsaycunata ricagtsu aywayargayqui, sinöga Tayta Diospa willacognin profëta canganta ricayänayquipämi. ¹⁰Juanpämi Tayta Diospa palabran gellgaranganchö nican:

‘Salvacog manarä willacuptinmi
juctarä cachashä willacuynïta
willacunanpä.

Pay willacunganta chasquicurmi
runacuna jutsa ruraynincunata
jagirir salvacogta shuyacur
alistacuyanga’ nir.

¹¹Tsay ningannölla Tayta Dios Juanta willacognin cananpä acrashga captinmi puntataga Juanrä tantiyashga noga salvacog rey cangäta. Tsaynö captinpis discipulücunam nogawan purishga carnin Juanpitaga maslla willacuynïta tantiyacuycäyan”.

^{12,13}“Moises gellgangancunachöpis, Tayta Diospa profëtancuna gellgayangancunachöpis, y Juan Bautista willacungancunapis nican noga salvacogniquicuna cay patsaman shamunäpä cagtam. Tsaymi Juan willacur gallanganpitapis runacuna Tayta Diospa willacuynintaga chasquicuycäyan. Tsaynö captinpis waquin runacunaga manam munayantsu willacuyninta willacunanata, sinöga imaycanöpapis tsapatam churapaycäyan. ¹⁴Tsaynöllam Tayta Diospa palabanga gellgaraycan Elias shamur willacunanpä cagpis. Tantiyayaptiqui mana tantiyayaptiquipis Juan Bautista willacuptinmi cumplishga Elias shamur willacunanpä gellgarangan. ^h ¹⁵Tsay ningäcunata wiyacog cagga shumag tantiyacuyay”.

^{16,17}Tsaynö nisqueir Jesus mastapis nirganmi: “Canan tiempu runacunaga yupay tucog wamracunanömi caycäyan. Manam chasquicuyantsu noga ningäcunata ni Juan Bautista ningancunata. Wamracuna puellar pinculluta tucapaptin yanasancuna tushuyta mana munagnömi noga ningäcunatapis mana chasquicuyta munayantsu. Tsaynö ‘Aya pampayta puellar nogacuna cantayämushä, gamcuna wagayämunqui’ niyaptin yanasancuna wagayta mana munayangannömi Juan Bautista ningancunatapis mana chasquicuyta munayantsu. ¹⁸Juan Bautistaga imaypis ayunarmi mana vïnuta upogtsu. Tsaynö captinmi niyag: ‘iPayga Satanaspamunayninchö carmi tsaynö cacun!’ nirnin. ¹⁹Noga runacunawan juntacar imaycatapis micupti y vïnuta upuptinam niyäman: ‘Micullar upullar puricun’ nirnin. Tsaynömi niyäman: ‘Payga jutsasapa runacunawanpis y impuestu cobrag sacyapacogcunawanpis juntacanmi’ nirnin. Tsaynö niyämaptinpis Juantawan nogataga Tayta Diosmi cachayämashga willacuyninta willacuyänpä. Tsaynö cachayämanganta runacuna tantiyacuyanga Tayta Dios munanganta ruraycäyangäta ricarmi”.

**Jutsancunata mana dejagcuna
infiernuman gaycucäyänapä
cagta Jesus willangan**
(Lucas 10.13-15)

²⁰Imayca milagrucunata ruraycaptinpis waquin marcacunachöga runacuna manam ichicllapis Jesuspa willacuyninta cäsuyargantsu. Tsaymi paycunapä Jesus nirgan: ²¹“Corazin

h 11.14 Eliaspita y Juan Bautistapita masta musyanayquipä liyinqui Mateo 17.10-13; Lucas 1.17; Juan 1.21; Malaquias 3.1; 4.5,6.

marca runacuna y Betsaida marca runacuna, igamcunataga Tayta Dios mana cuyapaypam castigayashunqui! Gamcunachö milagrucunata rurangänö Tiro y Sidon marcacunachöⁱ milagrucunata ruraptëga maynam Tayta Diosta perdonta mañacur jutsa ruraynincunata dejariyanman cargan. Tsaynö jutsancunapita llaquicurnin maynam arripenticur cotenciapita rôpata jaticurcur uchpaman jamaycur wagayanman cargan. Gamcunaga milagrucunata rurangäta ricaycarpis manam jutsa rurayniquicunata dejayta munayanquitsu. ²²Tsaynö jutsa rurayniquicunata mana dejayangayquipitam fisyu final junagchö Tiro y Sidon runacunapitapis masrä castigacäyanqui. ²³Capernaum marca runacuna, ñgamcunaga ‘Tayta Diospa ñöpanmanmi chäshä’ niyanquipischi? Tayta Diospa ñöpanman chäyanayquipa rantin gamcunaga infernullamannam gaycucäyanqui. Gamcunachö milagrucunata rurangänö Sodoma marcachö ruräman cargan, cananyagmi tsay marca caycanmanrä cargan.^j ²⁴Tsaymi gamcunaga Sodoma runacuna castigacäyanganpitapis masrä castigacäyanqui fisyu finalchö”.

Tayta Diosta Jesus alabangan
(Lucas 10.21,22)

²⁵Tsaypitanam Tayta Diosman Jesus mañacur nirgan: “Papällä, ciëluchö y cay patsachöpis imaycawan munayyogmi gamga caycanqui. Gamta alaballämi, Tayta Dios. Yachag tucogcunata tantiyatsinayquipa rantinga

llänu runacunachömi tantiyatsicurguyqui nogata cachamangayquita. ²⁶Tsaynö cananpä yarpanyayquinöllum ruracashga, papällä” nir.

²⁷Nircurnam discipuluncunata nirgan: “Papällämi llapantapis munayniñman churamushga, tsurin capti. Noga imanö cangätapis payllam musyaman. Tsaynöllum papällä imanö cangantapis nogalla musyá. Tsaymi tantiyatsingä cagcunalla musyayanqui Tayta Dios imanö cangantapis”.

²⁸“Tayta Dios munangannö cawayta mana camäpocogcuna, nogata chasquicayämay. Chasquicayämaptiquega llapayquitam yanapayashayqui. ²⁹Yachatsingänölla cawayay. Tsaynö cawarmi tantiyacuyanqui cuyapäcog cangäta y mana runa tucog cangäta. Tsaynöpam alli cawayta tariyanqui. ³⁰Noga yanapapti munangänö cawayga manam ajatsu”.

Säbadu jamapay junagchö Jesuspa discipuluncuna tríguta pallayangan
(Marcos 2.23-28; Lucas 6.1-5)

12 ¹Tsaypita juc *säbadu jamapay junagchömi discipuluncunawan Jesus päsaraycäyargan poguraycag trígu cuchunpa. Tsaynam discipuluncunaga mallagarnin tríguta pallascärir cuparir uchuyargan. ²Tsaycunata ricarnam fariseucuna Jesusta niyargan: “Säbadu jamapay junag mana arucuy caycaptin ñimanirtä discipuluyquicuna tríguta pallaycäyan?” nir.

³Tsaynam Jesus nirgan: “Atsca cuti liyiyicarpis ñmanacu gamcuna

i 11.21 Tiro y Sidon marca runacuna imanö cayangantapis musyanayquipä liyinqi Isaias capítulu 23; Ezequiel capítulu 26-pita 28-yag; Amos 1.9,10. **j 11.23** Sodoma marcata Tayta Dios ninawan ushacätsirgan tsay runacuna feyupa jutsasapa cayanganpitam. Tsaypita masta musyanayquipä liyinqi Genesis capítulu 19 y Ezequiel 16.48-50.

tantiyayanqui unay *David gatragnincunawan mallagar imata rurayangantapis? ⁴Paymi Tayta Diosman mañacucuyānan wayiman yaycurir tsaychö consagrädu churarag tantata gatragnincunantin micuyargan.^k Tsay tantata sacerdotícunalla micuyānanpä caycaptinpis tsayta micur Davidga manam ima jutsatapis rurargantsu. [Mana micunanpä cagta David micuptinpis allita ruranganta yarparga imanirtä niyanqui discipulücuna säbadu jamapay junagchö triguta pallarir uchuyangan jutsa canganta?] ⁵Gamcunaga Moises gellganganta atscacuti liyicarpis imanacu tantiyayanqui säbadu jamapay junag templuchö sacerdotícunapapis imayca ruraynincuna jutsa mana canganta? ⁶Tsaynöllam nogapa discipulücunapis convienegllata ruraycāyan. Tsaynö carmi mana jutsatatsu ruraycāyan säbadu jamapay junagchö mana jamaparpis. ⁷Gamcunaga manam tantiyacuyanquitsu Tayta Diospa palabran gellgaranganchö caynö ninganta: ‘Nogapa jutichö ashmacunata *altarchö rupatsiyangayquipitapis masga munä runa mayiquicunata cuyapāyanayquitam’ nir. Tsaycunata tantiyacurga manam discipulücunapā imatapis parlacachāyanquimantsu. ⁸Tsaynö captinmi noga Tayta Diospita shamushga car munayyog caycä säbadu jamapay junagchöpis runacuna imata rurayānanpä cagtapis ninäpä”.

**Säbadu jamapay junagchö
maquin wanucashga runata
Jesus allitsingan**
(Marcos 3.1-6; Lucas 6.6-11)

⁹Tsaypita aywarnam Jesus yaycorgan Tayta Diosman mañacur goricacuyānan

wayiman. ¹⁰Tsaychö goricag runacunawanmi caycorgan maquin wanucashga runapis. Tsay wayichö caycag waquin fariseucunanam Jesusta tapuyargan: “Säbadu jamapay junag caycaptin imanquin wanucashga runata allitsinquimancu o manacu?” nir. Tsaynö tapuyargan allitsiptinga tsay achäquilla Jesuspa contran sharcuyānanpämi.

¹¹Tsaymi Jesus nirgan: “Maygayquipapis üshayquicuna pözuman jegacurpuptin imanatsurä jinan öra jipeg aywayanquiman säbadu jamapay junagchöpis? ¹²Runacunaga üshapitapis alläpa mas cuyaymi. Tsaynö captinmi säbadu jamapay junagchöpis allita rurarnin cay geshyagta allitsimushä”.

¹³Nircurnam tsay maquin wanucashga runata Jesus nirgan: “Maquiquita mashtamuy” nir.

Tsaynö niptin maquina jayarircuptinnam sänuna ticasquirgan. ¹⁴Säbadu jamapay junagchö tsaynö allitsinganta ricarnam fariseucuna tsay goricacuyānan wayipita yargurir willanacuyargan Jesusta imanöpa wanutsiyānanpäpis.

**Jesucristo imanö cananpäpis
profëta Isaias gellgangan**

¹⁵Tsaynö fariseucuna willanacuyanganta musyarnam Jesusga tsaypita aywacorgan. Y atscarunacunam gepanta aywayargan. Gepanta aywagcunataga imayca geshyancunapitapis Jesus allitsirganmi. ¹⁶Tsaynö allitsirmi nirgan: “Ama pitapis willacuyanquitsu noga allitsingäta” nir. ¹⁷Jesus tsaynö cuyapäcog cananpämi unay profëta Isaias gellgangan Tayta Dios caynö ningancunata:

k 12.4 Consagrädu churarag tantapita masta musyanayquipä liyinqi Levítico 24.5-9 y 1 Samuel 21.1-6.

¹⁸ “Willacuynita willacunanpä cachamungä salvacog runa munangäcunata ruraptinmi cushiciü.

Payman Espiritu Santuta cachaptimi mana dejaypa yanapanga.

Tsaynöpam pitapis maytapis willapanga willacuynita chasquicogcunata salvanäpä cagta y mana chasquicogcunata infernuman gaycunäpä cagta.

¹⁹ Runacuna gayapäyaptinpis manam imatapis ningatsu.

Maypa tsaypa purirpis manam parlangatsu: ‘Nogaga mas yachagmi cä’ nirin.

²⁰ Llaquicuyyogcunata manam lisu tupangatsu, sinöga cuyapangam.

Jutsa rurag runacunata manam juclatsu castiganga, sinöga yätsingam munangäta rurarna cawayänapä.

²¹ Tsaynöpam maychö tsaychö runacunapis payman yäracur salvacäyanga”.

**Satanaspa poderninwan
supaycunata Jesus gargunganta
fariseucuna yarpäyangan**

(Marcos 3.20-30;

Lucas 11.14-23; 12.10)

²² Tsaypitanam supay wiscuyätsingan upayashga runata Jesus cagman chätsipäyangan allitsinanpä. Tsay runapita supayta Jesus garguriptinmi parlarganna y ricarganna. ²³ Tsaynö allitsegta ricarmi runacuna cushicur ninacuyargan: “¿Salvamänantsicpä Tayta Dios cachamungan David castatsurä payga canman?” nir.

²⁴ Tsaynö niyanganta wiarnam fariseucuna niyargan: “Cay runaga manam Tayta Diospa poderninwantsu supayta tsay runapita gargun, sinöga

supaycunapa mandagnin Satanaspa poderninwanmi” nir.

²⁵ Tsaynö parlaycäyanganta musyarnam Jesus niran: “Manam yarpaycäyangayquinötsu. Cay ningäta wiyarcayämay. Juc nacionchö runacuna quiquincuna pura chiquinacurga wanutsinacurmi ushacätsinacuyanman. Tsaynömi juc marcachö o juc wayichö tagcunapis quiquincuna pura chiquinacur wacpa caypa gargunacuyar ushacäyanman. ²⁶ Tsaynö caycaptinga gamcuna ama yarpäyaytsu Satanaspa poderninwan supaycunata gargungäta. Supaycunata mandagnin Satanas garguptinga poderniynagna ticarmi ushacätsinacuyanman”.

²⁷ “Gamcunachö waquin runacuna supaycunata runacunapita garguyaptin yarpäyanqui Tayta Diospa poderninwan garguyangantam. Tsaynö yarpaycarga imanirtä nogapäga yarpäyanqui Satanaspa poderninwan supaycunata gargungäta? Tsay llutan yarpayniquicunawanmi manacagcunata parlayanqui. ²⁸ Nogata Espiritu Santo yanapamaptin supaycunata gargungäta ricarmi gamcuna musyayanqui Tayta Diospita salvacog rey shamungäta”.

²⁹ Satanaspita mas puëdeg canganta tantiyatsirmi Jesus caynö niran: “Juc lisu runa wayinta täpaycaptinga manam pipis imantapis suwapanmantsu. Tsaynö täpaycaptinpis paypita mas puëdeg runa chaycurmi itsanga pancaycur imaycancunatapis apacunman. [Tsay cuentanömi nogapis puëdeg cayniwan runacuna Satanaspa maquinpita jipiycä]”.

³⁰ “Pipis ningäcunata mana cäsumag cagcunanam Satanaspa munayninchö cayan. Y nogata cäsumag cagga noga munangätam ruraycäyan”.

^{31,32} “Runacuna llutanta ruray jutsa ruraynincunata y manacagcunata

parlayangancunata perdonta
mañacuyaptinga Tayta Dios perdonangam.
Tsaynömi Tayta Diospita shamungäta
mana tantiyar nogapä llutanta
parlayaptinpis Tayta Diosga perdonanga.
Peru salvacog cangäta Espiritu Santo
tantiyaycätsiptin contran captinmi itsanga
Tayta Dios imaypis perdonanganatsu”.

**Prütayog y prütaynag plantaman
runacunata Jesus iwalatsingan**
(Lucas 6.43-45)

³³“Ima plantatapis prütanpita
regingantsicnömi runatapis regintsic
parlacuyninpita alli runa cangantapis y
mana alli cangantapis. ³⁴iCulebra casta
runacuna! Quiquiquicuna tsaynö mana
alli caycarga ñimayrächi allitaga
parlayanquiman? Shonguyquicunachö
llutancunata yarpäyangayquillatam
imaypis parlaycäyanqui. ³⁵Pipis
shongunchö allita yarparga allitam
parlan. Peru mana alli yarpayyog cagmi
itsanga llutancunallata imaypis parlan.
³⁶Manacagcunata parlagcunataga
parlanganmanmi fisyu final junagchö
Tayta Dios pitapis juzganga. ³⁷Tsaymi
gamcunatapis shimiquicuna
parlanganman Tayta Diosga
niyëshunqui jutsayog cayangayquitapis
o jutsaynag cayangayquitapis”.

**Milagrutarä Jesus
rurananta munayangan**
(Marcos 8.11,12; Lucas 11.29-32)

³⁸Tsaypitanam waquin fariseucuna y
Moises gellangan leycunata
yachatsicogcuna Jesusta niyargan:
“Señor Jesus, Tayta Dios rasunpa
cachamushungayquita musyayänäpä
ima milagrullayquitapis ricaytam
munayä” nir.

³⁹Tsaynam Jesus nirgan: “Gamcunaga
Tayta Diosman mana yäracog mana alli
runacuna carmi milagrutarä ricayta
munaycäyanqui. Gamcuna
munayangayquinöräga manam ima
milagrutapis rurashätsu. Tsaypa rantinga
Tayta Dios juc milagrutam ruranga
profëta Jonas cawaycaptin rurangannö”.

⁴⁰“Musyayangayquinöpis unay
Jonastam quimsa junag quimsa pagas
jatuncaray pescädupa pachanchö
caycanganpita yargatsimurgan.
Tsaynömi nogatapis quimsa junag
quimsa pagas pamparangäpita
cawatsimanga. ⁴¹Jonas Diospa
willacuyninta willacuptin wiymarmi
Ninive marca runacuna jutsa
ruraynincunata jagiriyargan.
Jonaspitapis mas imaycawan munayyog
caycapti willacungätaga canan witsan
runacuna manam cäsucuyantsu. Tsaymi
fisyu final junagchö Ninive runacuna
sharcayämunga: ‘Jonas willacunganta
chasquicuyangänö ñimanirtä Tayta
Diospa tsurin willacunganta
chasquicuyargayquitsu?’ niyänanpä”.

⁴²“Musyayangayquinöpis Salomonpa
yachatsicuyninta wiyananpämi ‘Sabah’
ningan nacionpita juc reinapis caruta
shamurgan Jerusalemman.¹ Paypis fisyu
final junagchö sharcamungam canan
witsan runacunata ‘Salomonpa
yachatsicuyninta noga chasquicungänö
ñimanirtä gamcunapis Tayta Diospa
tsurin yachatsicunganta mana
chasquicuyargayquitsu?’ ninanpä”.

**Maypitapis yargunganman
supay cutingan**
(Lucas 11.24-26)

⁴³“Juc runapita supay yargucur
jäcogcunapam aywan tänanpä ashirnin.

1 12.42 Rey Salomonta watucag shamog reinapita musyanayquipä liyinqu
1 Reyes 10.1-13.

⁴⁴Maychöpis mana tarirnam yarpasquin tärangan runaman yapay cutiycuyta. Tsaynö cutirnam taririn tsay runapa shongunta shumag churapacushga pitsapacushga wayitanörä. ⁴⁵Tsaynöta tariycurnam tsay runaman cutin paypita mas mana allin cag ganchis (7) supaycunata pushacurcuna tsay runachö cangan täcuyänapä. Tsaymi puntata canganpitapis mas peyormanna tircacurin. Tsaynömi päsaanga canan witsan mana alli runacunawanpis”.

Mamännö y waugincunanö pi cangantapis Jesus yachatsingan
(*Marcos 3.31-35; Lucas 8.19-21*)

⁴⁶Tsaynö Jesus yachatsicucaptinmi mamanwan waugincuna tsayman chäyargan. Paycunaga puncullachömi shuyaycäyargan Jesuswan parlayta munarnin. ⁴⁷Paycunata ricarnam juc runa Jesusta willargan: “Mamayquiwan waugiquicunam puncuchö shuyaraycäyashunqui” nir.

^{48,49}Tsaynö willaptinmi discipuluncunaman ricärir Jesus nirgan: “Paycunam mamännö y waugicunanö cayan. ⁵⁰Pipis Tayta Dios munanganta rurag cagcunam mamännö, waugicunanö, y panicunanö cayan” nir.

Willacuyñinta muruwan Jesus iwalatsingan
(*Marcos 4.1-9; Lucas 8.4-8*)

13 ¹Tsaypitanam wayipita yargurir Jesus aywargan Galilea gocha cuchunman. ²Tsaymannam atsa runacuna goricäyargan Jesuspa willacuyñinta wiyayta munar. Tsaynam Jesus büquimanna yarcurgan tsaypita yachatsimunapä. ³Tsaypitam imayca iwalatsicucunawan yachatsicur gallaycamurgan caynö nirin: “Juc runam aywanä trīguta murucog. ⁴Tsaymi muruta matsiptin waquin

murucuna tiuyanä näniman. Y nänichö mashtaraycagtanam pishgucuna chaycur upshascärinä”.

^{5,6}“Waquin cag murucunanam tiuyanä shaga shagallaman. Tsaychöga jegarcamurpis allpa mana captinmi achaywan tsaquiscärinä. ⁷Waquin murucunanam tiuyanä cashacuna rurinman. Tsaychöpis jegarcamur garwashtaycällarmi tsaquiscärinä”.

⁸“Waquin cag murucunanam alli allpaman chänä. Tsaycunaga alli jegamurmi alli espigayog canä. Waquin espigam wayunä pachac (100) trīguta, waquin espigacunam wayunä jogta chunca (60) trīguta, y waquincunam wayunä quimsa chunca (30) trīguta”.

⁹“Cay ningäcunata wiyag cagga tantiyacuyay” nirmi Jesus parlapargan.

Imaycaman iwalatsiypa imanir Jesus yachatsicungan
(*Marcos 4.10-12; Lucas 8.9,10*)

¹⁰Tsaynö Jesus muruwan iwalatsicuyapa yachatsicuptinmi discipuluncuna tapuyargan: “Tayta, tsay yachatsiyämangayquita ñimacunamantä iwalatsinqui? Manam tantiyayällätsu” nir.

¹¹Tsaymi Jesus nirgan: “Gamcunataga tsay ningäcunata tantiyatsiyäshayquim. Mana cäsomag cagcunatam itsanga mana tantiyatsishätsu. ¹²Tsaynö captinmi pipis yachacuyta munagcunaga yachatsingäcunata shumag tantiyacuyanga. Peru yachacuyta mana munagcunaga wiyarpis manam tantiyayangatsu.

¹³Tsaymi noga yachatsicü imamanpis iwalatsiypa. Tsay yachatsingäcunata cäsucuyta mana munag cagga manam imaypis tantiyayangatsu, ricaycarpis ni wiyaycarpis. ¹⁴Tsaynö cananpämi Tayta Dios ninganta unay profëta Isaia gellgargan:

‘Milagru rurangäcunata ricaycarpis
willacuynita wiyaycarpis
manam paycuna
tantiyayangatsu.

¹⁵ Cay runacunapaga shonguncunapis
chucruyäcurcushgam.

Tsaymi rinrincunapis
tsapacashganö, ñawincunapis
gemtsicashganö caycäyan.

Tsaynö carmi paycunaga imata
yachatsingäcunatapis
tantiyacuyantsu.

Tsaymi nogataga cäsuyämantsu alli
cawaytana tariyānan caycaptin’
nir”.

¹⁶“Gamcunam sīga imata
yachatsingäcunatapis tantiyacuyanqui.

¹⁷Unay profëtaçuna y Tayta Dios
munangannö cawag runacunapis cay
rurangäcunataga ricayta
munayargannam. Ricamayta munarpis
manam ricayämashgatsu. Tsaynömi
noga willacungäcunata wiyayta
munarpis mana wiyacuyashgatsu.
Gamcunam sīga ricaycäyāmanqui y
wiyaycäyāmanqui”.

Muruwan iwalatsir yachatsinganta

Jesus tantiyatsingan

(*Marcos 4.13-20; Lucas 8.11-15*)

¹⁸“Cananmi tantiyatsiyāshayqui
murucog runaman iwalatsir
yachatsingäcunata. ¹⁹Trigu muroga
Diospa alli willacuyninmi. Muru
tiuyangan nānega chucru shongu
runacunamanmi iwalan. Tsaynö
shonguyog carmi Diospa willacuyninta
wiyparpis chasquicuyantsu. Tsaynam
wiayangallantapis Satanas gongaratsin.
²⁰Muru tiuyangan shaga allpanam
waquin runacunaman iwalan.
Paycunaga Diospa alli willacuyninta
wiyar cushishgam chasquicuriyan.
²¹Tsaynö cushishga chasquicurpis

shagachö allpa mana captin trigu
jegarcamur tsaquireg cuentam,
criyicuyanganpita imayca
ñacaycunaman charninga Diospa
willacuyninta dejariyan. ²²Muru
tiuyangan casha rurinchö allpaga
waquin runacunamanmi iwalan.
Paycunaga Diospa alli willacuyninta
wiyparpis masga yarpachacuyan
imaycayogpis cayllapā y quiquincuna
munayangannö cawayānanpā cagllatam.
Tsaycunapā yarpachacuywanmi Tayta
Diospa gongariyan”.

²³“Muru changan alli allpaga waquin
runacunamanmi iwalan. Paycunaga
Tayta Diospa willacuyninta cushishga
chasquicurmi Diosnintsic munangannö
cawayan. Alli allpachö juc murullapita
quimsa chunca (30) trigu o jogta
chunca (60) trigu o pachac (100) trigu
wayungannömi Tayta Dios munangannö
cawagcunaga cayan”.

Triguwan iwal cebadilla gewa jegamungan

²⁴Tsaypitapis juccuna infernuman
aywayānanpā cagta y waquincuna
gloriaman chäyānanpā cagta
tantiyatsirmi Jesus caynö niran: “Juc
runam chacranman aywanā trīguta
murucog. ²⁵Tsay murucunganmannam
juc chiquipagnin runa tsacaypa aywaycur
murungan trigu janaman cebadillata
jichaycamunā. ²⁶Tsaynam trigun
jegamuptin cebadillapis jegamunā.
²⁷Tsaypita trīguman tirapagcuna
aywarnā duēñunta willayānā: ‘Taytay,
çtrīgutaç crashgallatamer
mururgayqui? Tsaynö muruycaptiquega
çmaypitatā trīguyquichö cebadillaga
pasaypa jegaycamushga?’ nir. ²⁸Tsaynö
willayaptinnam trīguyog ninā: ‘Pipis
chiquipāmag cagmi tsaytaga
jichapaycamashga canman’ nir. Tsaynö
niptinnam arognincuna tapuyānā:

‘Tsayöraga ñmunanquicu tsay cebadillacunata jipiyänäta?’ nir. ²⁹Tsaynö niyaptinnam duëñun ninä: ‘Ama jipiyanquitsu. Cebadillata jipirga trīgutam lluquipacuyanqui. ³⁰Trīgüwan iwal cosëchayag shacshacunanpä dejaycuyay. Cosëchachönam sigagcuna acrapaypa sigayämunga. Cebadillantam cayayanga. Y trīgutanam wayïman churayanga’”.

**Diospa willacuyñinta ñäbuspa
murunman y levadüraman
Jesus iwalatsingan**

(Marcos 4.30-32; Lucas 13.18-21)

³¹Tsaypita mastapis Jesus yachatsirganmi caynö nir: “Diospa alli willacuyninga ñäbuspa murunnömi. ³²Tsay muroga pasaypa ichishagllam. Peru nicarpis jegarcamurga waquin gewacunapitapis mas jatunmi ricacun. Tsay ñäbus wiñaptin rämancuna mashtacangannömi Diospa alli willacuyñin maytsaymanpis mashtacanga. Tsay rämancunachö pishgucuna geshuncuna ruraris cushicungannömi runacunapis Diospa alli willacuyñinta chasquicur cushishga cawayanga”.

³³Nircur mastapis yachatsicur Jesus caynömi nirgan: “Tayta Diospa alli willacuyninga levadüranöllum caycan. Juc runa tantata rurur quimsa arröba machcaman levadürata wiñaptinmi mäsaga shumag jacan. Tsay levadüra wallcalla caycar mäsata atscayätsir jacatsingannömi Diospa alli willacuyñin maytsayman chaptin chasquicogcunapis masrä atscagyäyan”.

**Imaycaman iwalatsinganta
discípuluncunata Jesus
tantiyatsingan**
(Marcos 4.33,34)

³⁴Jesusga runacunata yachatsirnin imaycamanpis iwalatsiypam imaypis

yachatsirgan. ³⁵Tsaycunawanmi cumplirgan Tayta Diospa willacognin profëta caynö nir gellangan:

“Imaycamanpis iwalatsiypam
runacunata yachatsishä.
Patsa camacangan junagpita pipis
mana tantiyangancunatam
tantiyatsishä” nir.

**Trīguchö cebadillaman iwalatsiypa
yachatsinganta Jesus
tantiyatsingan**

³⁶Tsaypitanam runacunata aywacuyänanpä niquir discípuluncunawan Jesus yaycorgan juc wayiman. Tsaychömi discípuluncuna niyargan: “Taytay, trīguchö cebadilla gewaman iwalatsiypa yachatsicungayquita tantiyaycatsiyämay” nir.

³⁷Tsaynam Jesus nirgan: “Tsay trīguta murucog runaga nogam cä. ³⁸Tsay chacraga cay patsam. Tsay trīgumam Diospa alli willacuyñinta chasquicog cag runacuna. Y tsay trīguchö cebadillanam Satanaspä mandunchö cawacog cag runacuna. ³⁹Murucogta chiquipagnin cebadillata murucuyñin jananman jichapag cag runanam Satanaspä. Y cosëchanam fisyu final ninan. Cosëchata goregcunanam *angelcuna cayan”.

⁴⁰“Trīgupita cebadillata acragñömi fisyu final junagchö Satanaspä munanganta rurur cawag runacunata angelcuna acrasquir infiernuman gaycuyanga. ⁴¹Noga Tayta Diospita shamogmi angelñicunata cachamushä jutsaman ishquitsicogcunata y jutsa ruragcunata gorircur infiernuman gaycuyänanpä. ⁴²Tsaychömi quiruncunatapis uchurrä wagayanga. ⁴³Peru Tayta Dios munanganta cumplegcunam itsanga gloriachöna car

cushicuyanga. Cay ningäcunata wiyag cagcunaga shumag tantiyacuyay”.

Tayta Diospa munayninchö caway imaycapitapis mas alli cangan

⁴⁴Mastapis discipuluncunata yachatsirganmi caynö nirmir: “Juc runa chacrapa puriyar tarisquinä atsa gellë pamparaycagta. Tsay gellëta tariyurna pasaypa cushicunä. Nircurna yarpachacunä: ‘¿Imatatä ruräman cay gellë quiqüpana ticasquinan?’” nir. Nicangantaga cangallanman pampaycur cushishga imaycancunatapis ranticuscärinä. Nircurna tsay gellë pamparaycangan chacrata rantisquinä. Tsaynöpana tsay runa pamparaycag gellëta jipir ricuyänä. [Tsaynöpis Tayta Diospa ñöpanman chayga ima cushicuypämi cay patsachö imaycayog cangantsicpitapis]”.

⁴⁵Nircur Jesus caynöpis nirganmi: “Diospa alli willacuyninta chasquicogcunaga alläpa valoryog perlas rumipita aläjata ranteg cuentam caycäyan. ⁴⁶Perlas aläja ranteg runam örüpita mas valoryogta tariycur mayläya chanin captinpis wayintapis chacrantapis ranticuscärinä tsay aläjata rantinanpä. [Tsaynöpis Tayta Diospa ñöpanman chayga ima cushicuypämi cay patsachö imaycayog cangantsicpitapis]”.

Fisyu finalchö runacunata Tayta Dios acrananpä willangan

⁴⁷Yapaypis Jesus caynömi yachatsicurgan: “Musyayangayquinöpis mällata lamarman mashtaycur imaycaläya pescadutam runacuna tsariyan. ⁴⁸Nircurnam lamar cuchunman jipirayämun tsaychöna acrayänanpä. Tsaychö acranam micunapä cagta canastaman wiñayan y mana micunapä cagtana jitariyan.

⁴⁹Tsaynöllam fisyu final junagchöpis llapan runacunata acrananpä Tayta Dios angelnincunata cachamunga. Alli runacunatam raquinga jutsa rurag runacunapita. ⁵⁰Jutsachö cacogcunatam infiernuman gaycunga. Tsaychöga jutsa rurayta mana dejayanganpitam wagar quiruncunatapis uchuyangarä”.

Yachatsinganta discipuluncunapis yachatsiyänanpä Jesus ningan

⁵¹Tsaynö yachatsicurnam Jesus tapurgan discipuluncunata: “¿Cay ningäcunata gamcuna tantiyanquicu?”

Tsaynö niptinnam niyargan: “Aumi, taytay. Tantiyayämi” nirmir.

⁵²Tsaynam Jesus nirgan: “Tayta Dios munangannö cawayänayquipä yachatsingäcunata tantiyarga waquin runacunatapis shumag yachatsiyanqui. Tsaynö yachatsirga tröjapita maran cagcunata y tsayrä churacuyangayquita jipiramur garacognömi gamcunapis unay cag yachatsicuycunata y mushog yachatsicuycunata yachatsiyanqui” nir.

Nazaretchö Jesus yachatsingan
(*Marcos 6.1-6; Lucas 4.16-30*)

⁵³Tsaynö imaycacunaman iwalatsiyäpa yachatsicurirmi Jesus aywacurgan.

⁵⁴Marcan Nazaretman chaycurnam Diospa willacuyninta yachatsicurgan goricäcuyänan wayichö. Tsaychö yachatsicuptinnam runacuna espantar niyargan: “Tsaynö yachatsicog cananpäga ¿maychötäshi tsayläya yachaucycushga? ¿Ima munayninwantäshi tsayläya milagrucunatapis ruran? ⁵⁵¿Manacu tagayga carpintëru Josepa tsurinlla? ¿Y manacu maman Maria? ¿Manacu waugincunapis cayan Santiago, Jose, Simon, y Judas? ⁵⁶Y panincunatapis regintsicmi. Tsayöraga ¿maychönatä

yachacushga canman
yachatsimagnintsic tucunanpäga?”

⁵⁷Tsaynö nirmi Jesus
yachatsicungancunataga mana
cäsupäyargantsu. Tsaymi Jesus nirgan:
“Juclä marcacunachöga Tayta Diospa
willacognin profëtata chasquianmi.
Peru quiquinpa marcanchöga manam
cäsupäyantsu” nir.

⁵⁸Tsaynö mana criyicuyaptinmi juc
ishcay milagrucunallata marcanchöga
rurargan.

Juan Bautistata Herodes wanutsingan

(Marcos 6.14-29; Lucas 9.7-9)

14 ¹Tsay witsanmi Galilea
provinciaipa mandagnin rey
*Herodesta runacuna willayargan Jesus
Diospa willacuyninta willacur y
milagrucunata rurar puriycanganta.
²Tsaynam yanapagnincunata Herodes
nirgan: “Payga Juan Bautistam
cawarimushga canman. Tsaymi
munayyog caycan milagrucunata
rurananpäpis” nir.

^{3,4}Peru Juan Bautista
cawaycaptinllarämi Herodes waugin
Felipipa warmin Herodiasta gechurgan.
Tsaynam Juan Bautista Herodesta
nirgan: “Waugiquipa warminta tsararar
mana allitam ruraycanqui” nir. Tsaynö
ninganpitam Juan Bautistata Herodias
chiquirnin wanutsiyta munargan.
Tsaynö chiquirnam waynan Herodesta
willapargan Juanta carcelman
wichgatsinanpä.

⁵Herodesga Juanta wanuratsiyta
mantsarirgan, llapan runacunapis
“Juanga Tayta Diospa willacognin
profëtam” niyaptinmi. ⁶Tsaypita
Herodespa santunchönam Herodiaspa
jipash wawan selläma gälacurrä
shumag tushuycurgan llapan
invitäduncunapa ñöpanchö. Tsaynö

tushungan Herodestaga feyupam
gustaycurgan. ⁷Tsaymi tsay jipashta
nirgan: “Cananga imatapis nimaylla.
Mañamangayquitaga garashayquillam”
nir.

⁸Tsaynö niptin tsay jipashga maman
yätsingannöllum Herodesta nirgan:
“Jatun matichö Juan Bautistapa umanta
goycamänayquitam munä” nir.

⁹Tsayta mañaycuptinmi itsanga rey
Herodesga pasaypa llaquicurnin
yarpachacurgan. Juanta wanutsiyta
mana munaycarpis invitäduncunapa
ñöpanchö aunishga carmi juc soldädu
cachargan Juanta wanuratsir umanta
jipashman apapämunanpä. ¹⁰Tsaynam
carcelman soldädu aywar Juanta
wanuratsirgan. ¹¹Nircurnam umanta
roguriycur matichö apar jipashta
goycurgan. Tsayta chasquisquir jipashga
mamanmanmi apapaycurgan. ¹²Tsaynö
rurayanganta musyasquirnam Juanpa
discipuluncuna ayanta apacuyargan
pampayänanpä. Nircurnam Jesusta
willayargan Juanta tsaynö
wanutsiyanganta.

5,000 runacuna micuyänanpä milagruta Jesus rurangan

(Marcos 6.30-44; Lucas 9.10-17;
Juan 6.1-14)

¹³Tsaypitnam Jesus milagrucunata
rurar puriycanganta Herodes
musyargan. Tsay Herodes musyanganta
mayaycurnam Jesus büquiman
yarcurcur tsunyagpa quiquillanna
aywacurgan. Tsaynö aywacuptinpis
runacunaga musyayarganmi mayman
aywangantapis. Tsaymi chaquillapa
aywayargan Jesusta taripäyanganyag.
¹⁴Büquipita yarpurirnam Jesus tarirgan
atsca runacuna tsaychö shuyarar
caycäyagta. Tsaynam runacunata
ricaycur Jesus cuyapargan y apayangan
geshyacgunata allitsirgan.

¹⁵Tsaypitanam tardiyaptinna Jesusta discipuluncuna niyargan: “Caychöga manam imapis cantsu runacunata garanantsicpä. Tardiyaycaptinnaga llapancunapis aywacuyätsunna tsay quinran marcacunapa micuynincuna rantiyämunanpä” nir.

¹⁶Tsaynö niyaptinmi Jesus nirgan: “Manam paycuna micuy ashegräga aywaycäyanmantsu. Gamcuna micuynincunaga garayay” nir.

¹⁷Tsaynö niptinnam discipuluncuna niyargan: “Imäcunatarächi cayläya manana atipaypä runacunataga garayäman! Caychö pitsga tantawan ishca pescädullachä millcapäcuna caycan, taytay” nir.

¹⁸Tsaymi Jesus nirgan: “Tsay millcapayquicunata apayämuy” nirnin.

¹⁹Nircurnam discipuluncunata nirgan runacunata gewacunallaman jamatsiyänapä. Tsaypitanam pitsga tantata y ishca pescäduta aptarcur Jesus ciëluman ñuquircur Tayta Diosman mañacurir agradesicurgan. Nircurnam tantata paquisäcärir pescäduntinta discipuluncunata macyargan llapan runacunata aypuyänapä. ²⁰Tsaymi llapancuna micuyargan pachajunta. Sobrapacuyangantanam discipuluncuna goriyargan chunca ishca (12) canastacunaman juntata. ²¹Tsaychö micogcunaga cayargan pitsga waranganömi (5,000) ollgu caglla, warmicuna ni wamracuna mana yupashga.

Gocha janampa Jesus aywangan
(Marcos 6.45-52; Juan 6.15-21)

²²Tsaypitanam discipuluncunata Jesus nirgan: “Büquiman yarcurcur wac-tsimpaman puntaraycäyay. Y nogana caychö runacunata wayincunaman cuticuyänapä

yätsimushä” nir. ²³Tsaynö nisquirnam jircan niragman witsargan Tayta Diosman mañacunanpä. Tsaychö mañacuycaptinmi patsapis tsacasquirgan. ²⁴Büquiwan puntagcunaga carutanam aywaycäyargan. Tsaynö aywaraycäyaptinnam gochata vientu pasaypa lagchicachätsirnin gallaycurgan.

²⁵Tsaypitanam gällu cantay öranöna caycaptin yacu janampa Jesus aywargan discipuluncuna cagman. ²⁶Tsaynö yacu janampa aywaycagta ricaycurmi discipuluncuna pasaypa mantsacar gayarayargan: “¡Almachä ällu shamuycan!” nir.

²⁷Tsaynö mantsacäyaptinnam Jesus nirgan: “¿Imatatä mantsacuyanqui? Nogachä cä” nir.

²⁸Tsaymi Pedro valoracuycur nirgan: “Taytay, rasunpa gam carninga nogapis yacu janampa gam cagman aywamunäpä niycuy”.

²⁹Tsaynö niptin Jesusga caynömi nirgan: “Shamuy ari” nir.

Tsaynam büquipita yargurir yacu janampa Jesus cagman Pedro aywargan. ³⁰Aywaycanganchönam pasaypa vientu yacuta janaman lagchicachätsiptin feyupa mantsacargan. Tsaychö jundicarnam gayarargan: “¡Salvaycallamay, taytay!” nir.

³¹Tsaynö niptinmi Jesus maquinpita tsarircur nirgan: “Ä, mana yäracuyniynag runa, ¿imanirtä nogaman mana yäracamunquitsu?” nir.

³²Tsaypita büquiman yarcurcuyaptinnam vientoga tsunyarpurgan. ³³Tsayta ricaycurnam büquichö discipuluncuna Jesuspa ñöpanman gonguricuycur niyargan: “Taytay, rasunpam gamga Tayta Diospa tsurin canqui” nir.

Genesarethö geshyagcunata
Jesus allitsingan
(Marcos 6.53-56)

³⁴Galilea gochapa wac-tsimpanman päsarirnam chäyargan Genesaret marcapa wac-läduñman. ³⁵Tsayman Jesus changanta musyaycurnam maypita tsaypitapis imaycaläya geshyagcunata apapäyargan. ³⁶Tsay apapäyangan geshyagcunaga Señor Jesusta rugacuyargan: “Taytay, röpayquipa cuchullantapis yataycuyäshä allisquiyänäpä” nirmi. Tsaynö nir röpanta yataycog cagga llapanmi geshyancunapita allisquiyargan.

Llutan yarpagcuna
jutsayog ricacuyangan
(Marcos 7.1-23)

15 ¹Tsaypitanam fariseucuna y Moises gellganganta yachatsicogcuna Jerusalenpita aywayargan Jesusta tapuyänanpä. Chaycurnam niyargan: ²“¿Imanirtä discipuluyquicunaga üsuntsicta mana cäsuyä maquincunata mana awicullar micuycäyan? Tsaynö carga manam cäsuyantsu unay cag runacuna yachatsimangantsictaga” nir.

³Tsaynö niyaptinnam paycunatapis Jesus nirgan: “Gamcunapis ¿imanirtä Diospa palabran gellgaranganta cumpliyänayquipa rantin tsay üsuncunallata masga cumpliyänqui?” ⁴Diospa palabran gellgaranganchöga caynömi nin: “Taytayquita mamayquita respitar alli ricanqui. Mamanta taytanta mana alli ricag cagtaga wanuratsiyätsun’ nir. ^{5,6}Tsaynö nicaptinpis gamcunaga runacunata yachaycätsiyanqui mamancunata ni taytancunata manana yanapayänanpämi. Tsaynö yachatsirmi

nipäyanqui mamancunata y taytancunata caynö niyänanpä: ‘Tayta Diosllapänam imaycäcuna cacun. Mananam gamcunataga yanapayämännatsu’ nirnin. Tsaynö yachatsirmi gamcunaga Diospa palabran gellgaranganta manana cäsür imapäpis cuentayanquitsu. ⁷iTayta Diosman mana criyicog janan shongu runacuna! Gamcuna tsaynö cayänayquipä cagta musyarnam Tayta Dios profëta Isaiasta tantiyatsirgan caynö nir gellganänpä:

⁸ ‘Cay runacunaga janan shongullam “Tayta Dioslläcuna” nir jutita jagag tucuyan.

Manam llapan shonguncunawantsu nogaman criycayämün.

⁹ Willacuyñita yachatsicuyänanpa rantinmi unay cag üsuncunallaman sigiycäyan.

Tsaynö cayaptinmi paycuna adorayämanganpis ni imapä mana välintsu’ nir”.

¹⁰Nircurnam runacunata gayaycur Jesus nirgan: “Canan llapayqui cay ningäcunata shumag tantiyayämay.

¹¹Imatapis micunganwantsu manam runaga jutsayog ricacun, sinöga shiminpita yargamunganwanmi jutsayogga ricacun”.

¹²Niptinnam discipuluncuna Jesusman witiycur niyargan: “Tsaynö niptiqui, taytay, fariseucunaga feyupa rabyashgam caycäyan” nir.

^{13,14}Tsaynö willayaptinnam Jesus nirgan: “Gamcunaga paycuna ima niyangantapis ama cäsüpäyaytsu. Chacrapita mana alli cag gewacunata lluitarir jitariyangannömi paycunatapis Tayta Dios infiernuman jitaranga. Paycunaga yachag tucurpis wiscunömi cayan. Mä, ¿wiscuyashga runa wiscu

mayinta pushanmantsurä? Tsaynö carnin ishcanunam pözumanpis jegarpuyanman. Tsaynömi paycunapis yachatsicuyinincunata cäsüpagnintin infernuman gaycucäyanga”.

¹⁵Tsaynö niptinnam Pedro nirgan: “Runa micunganpä y shiminpita yargamog cagpä ningayquitarä tantiyarcatsiyämay, taytay” nir.

¹⁶Tsaymi Jesus nirgan: “¿Gamcunapis manaräcu tantiyaycuyanqui? ¹⁷Ima micuyta micurpis runaga manam micunganwanga jutsayogtsu ricacun, sinöga ima micuytapis micunganga päsucunllam. ¹⁸Llutancunata parlarmi jutsayogga ricacun. Tsaynö llutancunataga parlan y ruran shongunchö mana allcunata yarparmi. ¹⁹Runacunaga shongunchö llutancunata yarparmi runa mayinta wanutsin, adulteriu jutsata rurayan, majaynagrä caycar piwanpis lluta puricuyan, suwacuyan, llullacuyan, y runa mayinpä rimar puriyan. ²⁰Tsaycunata rurarmi jutsayog ticran. Manam micuycunata micurtsu ni manam micuy örapä maquina mana awicullar canganwantsu jutsayogga ticran”.

**Mana Israel warmi
Jesusman yäracungan
(Marcos 7.24-30)**

²¹Tsaypitanam Jesus aywargan Tiro y Sidon provinciacunapana. ²²[Tsay quinran marcacunachöga täyargan mana Israel runacunam.] Tsaynam mana Israel casta juc warmi^m Jesusman witiycur rugacuran: “iUnay rey Davidpa castan Jesus, cuyapaycallämay! Warmi wawallätam supay imaypis löcuyätsin. iTsay geshyapita allitsipaycallämay!” nir.

²³Tsaynö niptin Jesusga manam imatapis parlacurgantsu. Tsaynam discipuluncuna Jesusta niyargan: “Taytay, tagay warmita niycuy aywacunanpä. Umantsictapis nanatsirchä gayarar gaträmantsic” nir.

²⁴Tsaymi Jesus nirgan: “Tayta Dios cachamashga Israel runacunallaman yanapagmi. Paycunaga ogradashga üshacanunömi caycäyan”.

²⁵Tsaynö niptinnam tsay warmi Jesuspa ñöpanman gonguricuycur rugar nirgan: “Taytay, iamari yaga caycuytsu! iYanapaycallämay ari!” nir.

²⁶Tsaynam Jesus nirgan: “Manam allitsu canman Israel mayicunatarä yanapanä caycaptin, gamcunatarä punta puntata yanapasquiptëga. Tsayga canman wamracunapä cagta tantata allgucunata jitapaycog cuentam”.

²⁷Tsaynö niptinnam warmi nirgan: “Aumi, taytay. Tsaynö captinpis ämun shicwapacungantaga allguncunapis micuyanmi” nir.

²⁸Tsaynam Jesus nirgan tsay warmita: “iImanömi nogaman yäracuyniqui! Gam rugacamangayquega ruracätsun” nir.

Tsay öram tsay warmipa wawan allisquirgan.

**Atscag geshyagcunata
Jesus allitsingan**

²⁹Tsaypita aywacurnam Jesus chargan Galilea gocha cuchunman. Nircurnam juc jircaman witsarcur tsaychö jamacuran. ³⁰Tsaymanga atscarunacunam goricäyargan. Tsaynö goricarmi chätsipäyargan puriyta mana puëdeg ratacunatapis, gapracunatapis, macllucunatapis, parlayta mana puëdegcunatapis, imayca geshyawan geshyagcunatapis. Paycunata llapantam

m 15.22 “Mana Israel casta warmi” ninanpa rantinga griegu idiömachöga “Cananea warmi” nirmi gellgaraycan. Cananea runacunaga mana Israel castam cargan.

Jesus allitsirgan. ³¹Tsaycunata ricar runacunaga espantarmi cushicur niyargan: “Cananga upacunapis parlayannam, macllucunapis allisquiyashganam, puriya mana puëdeg ratacunapis puriannam, y gapracunapis ricayannam” nir. Tsaynö nirmi Israel runacuna adorayangan Tayta Diostana paycunapis alabayargan.

4,000 runacuna micuyänapä milagruta Jesus rurangan
(Marcos 8.1-10)

³²Tsaypitanam discipuluncunata gayaycur Jesus nirgan: “Cay runacuna cuyapaypämi caychö caycäyan. Paycuna caychö cayan quimsa junagnam. Manam imancunapis cantsu micuyänapä. Mallagllata wayincunapa cuticuyänapä niptëga aywaycayanganchö wanurpis wanucuyangachir” nir.

³³Tsaynö niptinnam discipuluncuna niyargan: “Taytay, ¿cay tsunyagchöga maychörächí tariyushwan micuyta caytsica runacuna micuyänapäga?” nir.

³⁴Tsaynam paycunata Jesus tapurgan: “Gamcunapa millcapayquicuna ¿ayca tantatä capuyäshunqui?” nir.

Paycunanam niyargan: “Ganchis (7) tantallam y juc ishca pescadullam caycan, taytay” nir.

³⁵Tsaynö niriyaaptinmi llapan runacunata nirgan jamacuyänapä.

³⁶Jamaycuyaptinnam pescadutawan ganchis tantata aptarcur Tayta Diosman Jesus mañacurgan. Nircurnam paquiscärir discipuluncunata macyargan runacunata aypuyänapä. ³⁷Tsaynam llapanacuna micuyargan pachajunta. Sobragtanam goriyargan ganchis canastacunaman juntata. ³⁸Tsaychö micogcunaga cayargan ollgu caglla

chuscu waranganömi (4,000), warmicuna ni wamracuna mana yupashga.

³⁹Tsaypitanam büquiman yarcurcur discipuluncunawan Jesus aywacurgan Magdala marca wacläninman.

Milagruta rurananpä Jesusta autoridäcuna niyangan
(Marcos 8.11-13; Lucas 12.54-56)

16 ¹Magdalaman chaycuyaptinmi fariseucuna y saduceucuna aywar Jesusta niyargan: “Tayta Dios rasunpa cachamushungayquita musyayänapä, mä ima milagrutapis ruramuy nogacuna ricayänächö” nir.

²Tsaynö niyaaptinnam Jesus nirgan: “Rupay jegangan öra pucutay garwashyaptin gamcuna niyanqui: ‘Warayga usyanganam’ nir. ³Tsaynömi pucutarar patsa warämuptyinpis gamcunaga niyanqui ‘Canan junagga tamyangam’ nirmnin. Tsaycunatapis cösa tantiyaicarga ¿imanirtä tantiyaianquitsu Tayta Dios cachamashga captin noga ruraycangäcunataga? ⁴Gamcunaga manam rasunpaypatsu Tayta Diosman criyianqui. Tsaymi pay cachamanganta musyayänapäga milagrutarä ricayta munayanqui. Munayangayquinöga manam milagruta rurashätsu. Tayta Diospa profëtan Jonasta jatuncaray pescädupa pachanpita cawaycagta yargatsimungannömi itsanga milagruta ruranga”.ⁿ

Tsaynö nisquirmi Jesus tsaypita aywacurgan.

Fariseucunapa yachatsicuyinipita cuïdacuyänapä Jesus yätsingan
(Marcos 8.14-21)

⁵Galilea gochata päsarirnam Jesupa discipuluncuna yarpasquiyargan

n 16.4 Jatuncaray pescädupa pachanchö quimsa junag canganpita Jonas cawaycar yargamungannömi Jesucristupis quimsa junag pamparaycanganpita cawarimushga.

gongaycur tantata mana millcapacuyanganta. ⁶Tsayta parlaycäyaptinnam Jesus nirgan: “Fariseucunapa y saduceucunapa levadüranta pagtä chasquiycäyanquiman” nir.

⁷Tsaynam discipuluncuna quiquincuna pura ninacuyargan: “Tantata mana millcapacamungantsicpitam tsaynö nicämantsic” nirmín.

⁸Tsaynö nicäyanganta wiarnam Jesus nirgan: “iYäracuyniynag runacuna! ¿Imanirtä parlaycäyanqui tantata mana apayämungayquita? Nogaga manam tantapitatsu parlaycä. ⁹Gamcunaga ¿manacu yarpäyanqui pitsga tantallapita pitsga waranga (5,000) runacuna micuyänapä milagruta rurangäta? ¿Mananacu yarpäyanqui tsay junag sobrag tantacunata atasca canastacunaman goriyangayquitapis? ¹⁰Tsaynöpis gamcunaga ¿manacu yarpäyanqui ganchis (7) tantallapita chuscu waranga (4,000) runacuna micuyänapä milagruta rurangäta? ¿Y manacu yarpäyanqui sobragcunatapis canastacunaman goriyangayquita? ¹¹Tsaynö caycaptinga ¿imanirtä gamcunaga yarpäyanqui tantallapä parlaycangäta? Tantata munarga yapaypis milagrutaga ruraramümanmi. Nogaga parlaycä fariseucunapa y saduceucunapa levadürancunapita cuüdacyäyanquipä cagtam” nir.

¹²Tsaynö niptinran discipuluncuna tantiarcuyargan fariseucunapa y saduceucunapa yachatsicuyninta mana chasquipäyananpä levadüraman jitaycullar nicanganta.

Jesus salvacog canganta

Pedro ningan

(Marcos 8.27-30; Lucas 9.18-21)

¹³Tsaypita Cesarea de Filipos marcacunaman chaycurnam discipuluncunata Jesus tapurgan: “¿Pi cangätatä nogapä runacuna yarpäyan?” nir.

¹⁴Tsaynö tapuptionnam discipuluncuna niyargan: “Waquín runacunaga niyan: ‘Juan Bautistam èllu’ nirmi. Waquinnam niyan unay profëta Elias cangayquita. Tsaynömi waquincunapis niyan unay profëta Jeremias cangayquita o maygan profëtapis cawamushga cangayquita”.

¹⁵Tsaynö niyaptionnam paycunatana Jesus tapurgan: “Gamcunaga ¿pi cangätatä yarpäyanqui?” nir.

¹⁶Tsaynam Simon Pedro nirgan: “Gamga Tayta Diospa tsurin salvacogmi canqui, taytay” nir.

¹⁷Tsaymi Pedruta Jesus nirgan: “Allitam nirguyqui, Jonaspa tsurin Simon. Tsayta ninayquipäga Tayta Diosmi tantiyatsishurguyqui. Manam pipitapistsu yachacurguyqui. ¹⁸Pedro, tsaynö nishga carmi gamga cimientu rumi cuenta canqui. ^o Tsay cimientu rumi jananchömi noga sharcatsishä iglesiäta. Tsaynö captin nogaman criyicamogcunata ni Satanaspis manam imanangatsu. ¹⁹Gamtam gloria vidapa llävinta goycushayqui. Cay patsachö gam wichgangayquim ciëluchöpis wichgashga canga. Y cay patsachö gam quichangayquim ciëluchöpis quichashga canga”.

²⁰Tsaynö nisquirmi discipuluncunata Jesus nirgan: “Gamcuna amarä pitapis willacuyanquitsu Tayta Dios cachamangan salvacog cangäta” nir.

**Wanunanpä cagta
Jesus willacungan**

(Marcos 8.31–9.1; Lucas 9.22–27)

²¹Tsaypitanam discipuluncunata Jesus willargan Jerusalemman aywaptin autoridäcuna, sacerdotícuna, y ley yachatsicogcuna chiquir ñacatsiyänapä cagta. Nircurmi nirgan wanutsiyaptinpis quimsa junagtaga cawamunanpä cagta.

²²Tsaynö niptinnam Jesus llutanta parlaycanganta yarpar jucläman gayasquir Pedro nirgan: “[Tsaynö cananpä captिंगа ñimapätä Jerusalemmanpis aywanqui?] ¡Tsaytaga Tayta Diospis ama munaycutsuntsu!” nir.

²³Tsaynö Pedro michaptinnam Jesus nirgan: “¡Cay runapita yarguy, Satanás!” Nisquirnam Pedruta nirgan: “Gamga tsaynö michämar Tayta Dios munanganta runanätam munanquitsu, sinöga runacuna yarpangannöllum runanäta munaycanqui”.

²⁴Nisquirmi discipuluncunata nirgan: “Pipis discipulü cayta munarga imayca ñacacuyman charpis noga munangänölla imaypis cawatsun. Quiquinpa munayllanchöga amana cawatsuntsu.

²⁵Pipis quiquinpa munayllanchö cawag cagga manam salvacionta taringatsu. Peru noga ningänö cawag cagmi itsanga mana ushacag alli cawayta taringa.

²⁶Alman infiernuman gaycucänan captिंगа ñimapänarä välinga mayläya ricu canganpis? Pasaypa ricu carpis manam salvaciontaga rantiyangatsu.

²⁷Noga angelñicunawanmi y Tayta Diospa poderninwanmi cutimushä. Tsaynö cutimur alli ruragcunatam premiuta goshä y mana allita ruragcunatam infiernuman gaycushä.

²⁸Caychö caycagpita waquinniquicunaga manarä wanurmi ricayämanqui Tayta Diospa munayninchö caycagta”.

**Jircachö chipipegtarä Jesusta
quimsa discipuluncuna ricayangan**

(Marcos 9.2-13; Lucas 9.28-36)

17 ¹Tsaypita jogta junagtanam Pedruta, Santiaguta, y Santiagupa waugin Juanta pusharcur Jesus witsargan juc jircaman.

²Tsaychömi discipuluncuna ricaycäyaptin Señor Jesupa cäran rupaynörä pasaypa chipipirgan. Röpanpis pasaypa yullag pürum atsicyargan. ³Tsaychönam ricayargan Moiseswan Elias yuripasquir Jesuswan parlaycäyagta.

⁴Tsaynam Pedro Jesusta nirgan: “Taytay, allipärä cayman nogacuna shacayämurgä. Canan itsan caychö quimsa tsucllata ruraycayämushä, jucta gampä, jucta Moisespä, y jucta Eliaspä” nir.

⁵Tsaynö Pedro parlapaycaptinmi pasaypa yullag püru pucutay paycunata tsapasquirgan. Tsaynam pucutay rurinpita Tayta Dios caynö nimurgan: “Paymi cuyay tsurí. Noga munangänö llapantapis ruraptinmi cushicü. Pay niyähungayquicunata cäsucuyay” nir.

⁶Tsaynö nimogta wiyaycurmi *apostolnincunaga pasaypa mantsariywan patsaman lätacacuycuyargan. ⁷Tsaynö caycäyaptinmi paycunata yataycur Jesus nirgan: “Ama mantsacäyaytsu. Sharcuyay” nir.

⁸Tsaynö niptin ñuquircuyänapäga Jesus japallannam caycänä.

⁹Jircapita uraraycämurnam paycunata Jesus nirgan: “Cay ricayangayquicunata pitapis ama willapäyanquirätsu noga wanungäpita cawamungäyag” nir.

¹⁰Tsaynam quimsan discipuluncuna Jesusta niyargan: “Ley yachatsicogcunaga niyan salvacog shamunanpäga Eliasrä puntata

shamunanpä cagtam. Tsayöraga gampa puntayquita ñimanirtä Eliasräga shamushgatsu?”

^{11,12}Tsaynö niyaptinmi Jesus nirgan: “Elias shamunanpä cagta niyangannöllum payga shamushgana. Tsay shamog nogapä willacuptinpi manam runacuna chasquicuyashgatsu willacunganta. Chasquicuyänapa rantinmi payta chiquir wanutsiyargan. Tsaynömi noga Tayta Diospita shamogtapis runacuna wanutsiyämanga”.

¹³Jesus tsaynö niptin discipulucunaga tantiyayargan Juan Bautistapä parlaycangantam.^p

**Wanuy geshyawan geshyag jövinta
Jesus allitsingan**

(Marcos 9.14-29; Lucas 9.37-43)

¹⁴Jircapita urämurnam runacuna caycäyanganman Jesus chargan. Tsaychönam juc runa Jesuspa ñöpanman gonguricuycur rugacur nirgan: ¹⁵“Taytay, cay wamralläta cuyapaycullay. Payta wanuy geshya tsariptinmi ninamanpis yacumanpis jegar ushan.

¹⁶Discipuluyquicunamanpis apamuptipis manam allitsiyashgatsu” nir.

¹⁷Tsaynö niptinnam Jesus nirgan: “iYäracuyniyag runacuna! ñImayyagrä gamcunawan caycäshä? Apayämuy tsay jövinta” nir.

¹⁸Tsaynam ñöpanman chaycatsiyaptin jövinta ñacatseg supayta Jesus ollgutupargan. Tsaynö ollgu tupaycuptinmi supayga jinan öra jövinpita yargusquir aywacurgan. Tsay örapita jövinga allishganam quëdasquirgan.

¹⁹Tsaypitanam quiquillancuna caycarña discipuluncuna Jesusta

tapuyargan: “ñImanirtä nogacunaga supayta garguyta puëdiycuyargötsu?” nirmn.

²⁰Tsaynam paycunata Jesus nirgan: “Janan shongulla Tayta Diosman yäracurmi gamcunaga garguyta puëdiyarguyquitsu. Nostäza muronöllapis yäracuyniquicuna ichic captinga cay jircata ‘Caypita jucläman witisquiy’ niyaptiquipis witisquinmanmi. Tayta Diosman rasunpaypa yäracuyaptiquega manam imapis ajatsu gamcunapä canga.

²¹[Tsaynömi puëdeg supaycunataga runapita garguntsic Diosman mañacuywanrä y ayünuwanrä]”.

**Quiquin wanunanpä cagta Jesus
yapay willacungan**

(Marcos 9.30-32; Lucas 9.43-45)

²²Galilea provincia quinranpa discipuluncunawan purirmi Jesus nirgan: “Noga Tayta Diospita shamogta entregayämanga chiquimagnicunapa maquincunamanmi wanutsiyämänapä.

²³Tsaynö wanuratsiyämaptinpi quimsa junagtaga cawamushämi” nir.

Tsaynö niptin discipuluncunaga feyupam llaquicuyargan.

**Templupä impuestuta Pedro
päganapä Jesus ningan**

²⁴Tsaypitanam Capernaum marcaman discipuluncunawan Jesus chäyargan. Tsaychömi templupä impuestu cobracogcuna Pedruta tapuyargan: “ñJesusga pägancu templupä impuestuta?” nir.

²⁵Tsaynö niyaptinnam Pedro nirgan: “Aumi, päganmi” nir.

Tsaynö nisquirmi Jesus caycangan wayiman Pedro aywargan Jesusta

p 17.13 Eliaspita y Juan Bautistapita masta musyanayquipä liyinqi Mateo 11.14; Lucas 1.17; Juan 1.21; Malaquias 3.1; 4.5,6.

tapunanpä. Tsaychö manarä tapuptinmi Jesus nirgan: “Pedro, ñimaninquitä gamga? Mandacog reycuna ñipitatä impuestuta cobrayan, tsurincunatacu o juclä runacunatacu?” nir.

²⁶Tsaymi Pedro nirgan: “Mandunchö cag juclä runacunatam impuestutaga cobrayan”.

Tsaynö niptinnam Jesus nirgan: “Tsayöraga mandacog reypa tsurincuna impuestuta mana pägaycäyaptinga nogapis Diospa tsurin car papäñipa templunpä impuestuta pägämanräcu. ²⁷Imanö captinpis cobracogcuna mana ajäyänanpä gochaman aywar anzuëluyquiwan pescäduta tsarimuy. Punta tsaringayqui pescädupa shiminchömi gellë canga. Tsay gellëta nogapitapis y gampitapis impuestuta pägaycamunqui” nir.

**Wamranö nogantsicpis
canantsicpä tantiyatsingan**
(Marcos 9.33-37; Lucas 9.46-48)

18 ¹Tsaychömi discipuluncuna Jesusta tapuyargan: “Imaycapis munayniquichö caycaptinga ñmaygäcunatatä mas mandag cayänäpä churayämanqui, taytay?” nir.

²Tsaynö niyaptinnam wamrata ñöpancunaman Jesus gayargan.

³Nircurmi discipuluncunata nirgan: “Wamracuna llullu yarpaynincunawan manam yarpachacuyantsu waquin cagpita mas puëdeg caytaga. Tsaynö gamcunapis ama yarpachacuyaytsu waquin cagpita mas puëdeg cayänayquipä cagtaga. Tsay manacag yarpayniqicunawan gamcuna manam gloriaman chäyanquitsu. ⁴Juccunapita mas puëdeg caysäp mana yarpagcunataga gloriachömi puëdeg cayman churayäshayqui. ⁵Tsaynö captin cay wamranö cagcunata pipis yanaparga nogata yanapaycämagnömi caycäyanqui”.

**Jutsaman pitapis mana
ishquitsinantsicpä willangan**
(Marcos 9.42-48; Lucas 17.1,2)

⁶“Nogaman criyicamogcunata pagtä pitapis jutsata ruraycätsiyanquiman. Tsaynö runacunataga mejormi jatuncaray mulinu rumita cuncanman wataparcu lamarman jitarpuyanman. ⁷Peru imanö captinpis jutsaman ishquitsicogcunaga imaypis cangam. Tsaynö cayanganpita tsay jutsaman ishquitsicogcuna, allau iimanö cuyapaypäpä castigashga cayanga!”

**Jutsata mana
ruranantsicpä willangan**
(Mateo 5.29,30)

⁸“Tsaynö captin maquiqui o chaquiqui jutsaman ishquitsishuptiquega rogurir jitariyuy. Chaquiyog maquiyog mana nunca upeg ninaman gaycucänayquipa rantinga mas allim canga tsulla chaquillapis tsulla maquillapis gloriaman yaucuptiqui. ⁹Tsaynölle ñawiquipis jutsata ruratsishuptiquega ogtirir jitariyuy. Ishcan ñawiyog infiernuman gaycucänayquipa rantinga mas allim canga tsulla ñawillapis gloriaman chaptiqui”.

**Ogracashga üshaman
runacunata iwalatsingan**
(Lucas 15.3-7)

¹⁰“Tayta Diospa ñöpanchö caycag angelcunam llapan criyicogcunata imaycay örapis ricaycämun. Tsaynö caycaptinga criyicogcunata ama lluta runaman cuentayanquitsu. ¹¹[Paycunata jutsancunapita salvanäpämi Tayta Dios cachamashga]”.

¹²“Pipis pachac (100) üshanpita jucta ograycur ñmanatsurä waquin cagcunata juc puchaman goriycur juclla aywanman ashegnin? ¹³Nircur tsay ogracash üshanta

tariycurga imanörä cushiycunman,
waquin cag üshancunapä cushicurpis.
¹⁴Tsaynöllam ciëluchö caycag Tayta
Dios munantsu payman criyicogcuna ni
jucllayllapis infiernuman aywayänanta”.

**Llutanta ruragcunata
alliyätsinapä Jesus ningan**
(Lucas 17.3)

¹⁵“Tayta Diosman criyicog mayiqui
imachöpis mana allita rurashuptiquega
puntataga quiquillanta parlapanqui
tantiyatsirnin mana allita
ruraycäshungayquita. Tantiyatsiptiqui
chasquicuptinga perdonanacur alli
cawaymanmi yapay chäyanqui.
¹⁶Tantiyatsiptiqui mana chasquicuptinga
ishcay o quimsa criyicog
mayiquicunatana pushanqui jutsata
ruraycanganta tantiyatsiyänanpä.
¹⁷Paycunatapis mana cäsuptinga llapan
criyicog mayiquicunapa ñöpanchöna
ninqui jutsa rurayninta paycunapis
tantiyatsiyänanpä. Tsaychöpis mana
cäsucuptinga llapayqui criyicogcuna
paywan amana juntacäyanquinatsu.
Tsay runata ricayanqui Tayta Diosta
mana cäsucog runatanö y *impuestuta
cobracog runatanö”.

¹⁸“Tsay mana cäsucogcunata
alliyätsiyänayquipä gamcuna
munayyogmi cayanqui. ¹⁹Yapaypis
gamicunata ni: Juc ishchagllapis Tayta
Diosman mañacuyaptiqui
yanapayäshunqui willanacur tsay mana
cäsucogcunata shumag yätsipar
tantiyatsiyänayquipämi. ²⁰Juc
ishchagllapis Tayta Diosman
mañacuyänayquipä goricäyaptiqui
gamicunawanmi imaypis noga caycäshä”.

**Imaypis perdonanacur
cawanapä Jesus ningan**

²¹Tsaynö yachatsicuptinnam Pedro
tapurgan: “Criyicog mayi imachöpis

mana allita ruramaptinga tsayöraga,
çayca cutitä perdonäman, taytay?
¿Ganchis (7) cutitsurä?” nir.

²²Tsaynö tapuptinmi Jesus nirgan:
“Manam ganchis cutillaga
perdonanquimantsu, sinöga ayca cutipis
perdonanquimanmi”.

²³Tsaynö nisquirnam Jesus
willapargan caynö nir: “Juc nacion
mandacog reypam cargan atasca
yanapagnin runacuna. Tsay
yanapagnincunatam rey nirgan
llapancuna cuentata goyänanpä”.

²⁴“Tsaynö cuentata mañaptinnam
chätsipäyargan jagan cag runata. Tsay
runaga yupaytapis manana atipaypämi
mandacogpa jagan cargan. ²⁵Jagata
pägacunanpä imanpis mana
capuptinnam rey wätaynincunata
mandargan: ‘Cay runata, warmtha,
tsurincunata, imaycancunatapis apayay
ranticuyänayquipä. Ranticusquirna tsay
gellëta apayämunki jagäpita tsarinäpä’
nir. ²⁶Tsaynö niptinmi tsay jaga runaga
gonguricuycur maquina tsogpacurcur
rugacurgan: ‘Taytay, amari
ranticaycayämaytsu. Imaycanöpapis
jagayquitaga pägaycushayquichir’ nir.
²⁷Tsaynö rugacuptinnam rey cuyaparnin
llapan jaganta perdonaycur
dejaycurgan”.

²⁸“Tsaynö perdonacärir
aywacucanganchönam tincucuncunä
arog mayin juc runawan. Payga
wallcamanpallam jagan canä rey
perdonangan runapa. Tsaymi tsay
perdonashga runaga cuncapita tsarisquir
llapiränä ‘¡Jagäta ras pägamay!’ nirmir.
²⁹Tsaynö niptinnam arog mayinga
gonguriycur ruganä: ‘Ichicllata
shuyaycamay, taytay. Llapan jagayquita
pägalläshayquim’ nir. ³⁰Tsaynö
rugacuptinpi tsay perdonashga cag
runaga manam arog mayinta
ichicllatapis shuyasquiyta munanätsu.

Tsay shuyärinanpa rantinmi carcelman wichgatsinä jaganta päganganyag”.

³¹“Tsaynö ruranganta ricaycurnam waquin arog mayincunaga feyupa ajanäyänä. Tsaynam mandag reyman aywar willayänä tsay perdonangan runa arog mayinta carcelman wichgatsinganta. ³²Tsaynam perdonangan runata jinan öra gayascatsir rey ninä: ‘iMana cuyapäcog malafë runa! Gamtaga rugacamptiqui llapan jagätachä perdonargö. ³³Tsaynö cuyapar perdonaycaptëga gamga ñimanirtä arog mayiquitaga cuyapayta yacharguyquitsu?’ nir. ³⁴Tsaynö pasaypa rabyashgam mandacog rey quiquintapis carcelman wichgatsinä tsaychö wardiya castigananpä llapan jaganta päganganyag”.

³⁵Tsaynö willapäcurirmi Jesus nirgan: “Runa mayiquicunata llapan shonguyquicunawan mana perdonayaptiquega gamcunatapis Tayta Dios manam perdonayäshunquitsu” nir.

Runa majanpita mana raquicänanpä cagta Jesus yachatsingan
(Marcos 10.1-12)

19 ¹Tsaynö yachatsicur ushasquirnam Jesus Galilea provinciapita aywar Jordan mayupa wac-tsimpanpa tumargan Judea provinciaman. ²Tsay quinranpa puriptin Jesuspa gepanta atasca runacunam aywayargan. Tsaychöpis geshyagcunata allitsirganmi.

³Tsayman fariseucuna charnam llutanta parlatsiyta munar yachayllapa Jesusta tapuyargan: “¿Imaycallapis casquiptin warminpita runa raquicanmancu o manacu?” nir.

⁴Tsaynö tapuyaptinnam Jesus nirgan: “¿Manacu gamcuna liyiyarguyqui Tayta Diospa palabran gellgaranganta? Tsaychö nican Tayta Dios ollgutapis warmitapis camashga captin juntacar täyänanpämi. ⁵Tsaynöpanam warmipis ollgupis mamanpita y taytanpita yargucurna mushog castana ruracan. ⁶Tsaynö ishcanpis manana dejanacunanpä Tayta Dios juntangantaga manam pipis raquinmantsu”.

⁷Tsaynö niptinmi fariseucuna tapuyargan: “Tsayöraga ñimanirtä Moises gellganganchö nican divorciu papelta firmapasquir warminta gargurinanpä cagta?” nir.

⁸Tsaynö niyaptinnam Jesus nirgan: “Tayta Diosga ollguta warmita camargan majatsacarnin mana raquicaypa cayänanpämi. Tsaynö captinpis runacuna munaynincunachö cawacuyaptinmi Tayta Dios Moises tantiyatsirgan tsaynö gellganapä. ⁹Maygan runapis warmin adulteriu jutsata mana ruraycaptin juc warmiwan targa punta cag warmintam racchataycan. [Tsaynömi runanpita raquicashga warmiwan tarpis jutsata ruraycan]”.

¹⁰Tsaynam discipuluncuna niyargan: “Tsaynö captinga manachä allitsu majayog caypis” ninnin.

¹¹Tsaynö niyaptinnam Jesus nirgan: “Majayog cayga allim. Tsaynö caycaptinpis Tayta Diosmi permitin waquincunaga majaynagllapis täcuyänanta. ¹²Waqin runacunaga yuriyashga majaynaglla täcuyänanpämi. Waquinnam eunucu^q car majaynaglla täcuyan. Waquincunam itsanga Tayta Diospa alli willacuyninta willacur

q 19.12 Eunucu ninanga “capashga runa” ninanmi. Unay tiempucunam waquin runacuna capashga cayargan mana warminäyänanpä. Tsay capashgacunaga cayargan mandacog reypa warmincunata cuidagcunam. Y paycunatam reypa mandunchö cayänanpäpis churayag.

puricuyäna captin manana
majatsacaytaga yarpäyannatsu. Pipis
majaynaglla täcuyta munarga
majaynaglla täcun allim”.

**Wamracunapä Tayta Diosman
Jesus mañacungan**

(Marcos 10.13-16; Lucas 18.15-17)

¹³Tsaypitanam wamracunata Jesus
caycanganman apayämurgan umanta
yataycur Tayta Diosman mañacunanpä.
Tsay apapagcunatanam discipuluncuna
michäyargan. ¹⁴Tsaynam
discipuluncunata Jesus nirgan: “Tsay
wamracuna noga cagman
shacayämunanta ama michäyaytsu. Cay
wamracunanö cagcunam Tayta Diospa
ñöpanman chäyanga” nir.

¹⁵Tsaynö nisquirmi wamracunapa
umanman maquina churarcu Tayta
Diosman mañacungan. Nircurnam
tsaypita aywacurgan.

Ricu jövinwan Jesus parlangan

(Marcos 10.17-31; Lucas 18.18-30)

¹⁶Juc cutichönam juc jövin Jesusman
aywaycur nirgan: “Tapucüllashayqui,
taytay. ¿Imatatä ruräman Tayta Diospa
ñöpanman chänäpä?” nirmän.

¹⁷Tsaynö niptinnam Jesus nirgan:
“Tayta Diospa ñöpanman chayta munarga
munangannö mandamientuncunata
cumplir caway. Ñöpanman runacuna
imanöpa chäyänanpä cagtapis Tayta Dios
nishgana caycappinga imanirtä
nogataräga tapucamanqui?”

¹⁸Tsaynö niptinnam tsay jövin
tapurgan: “¿Maygan
mandamientuncunatatä cumpliman,
taytay?” nir.

Tsaynam Jesus nirgan: “Runa
mayiquita ama wanutsinquitsu,

adulteriu jutsata ama rurayanquitsu,
pipa imancunatapis ama suwacunquitsu,
runa mayiquita ama llullanquitsu,
¹⁹taytayquitawan mamayquita shumag
respitanqui, tsaynöpis runa mayiquita
cuyapanqui”.

²⁰Tsaynö Jesus niptinnam jövin
nirgan: “Tsaycunataga wamra
cangäpitam cumplirgö, taytay. ¿Imatä
mas faltämanman cumplinäpä?”

²¹Niptin Jesusnam nirgan: “Tsay
llapancunata cumplishga carpis Tayta
Diospa ñöpanman chänayquipäga llapan
imaycayquicunatapis ranticusquir tsay
gellätana faltapacogcunata aypuy.
Tsaynö rurarninga gloriachömi mana
ushacag riquëzata chasquinqui.
Tsaycunata rurapacurir nogawan
aywashun yachatsingata
yachacunayquipä”.

²²Tsaynö niyauptinga pasaypa
wamayashgam tsay jövin aywacurgan.
Payga alläpa ricu carninmi pasaypa
wamayargan.

²³Tsaynam discipuluncunata Jesus
nirgan: “Imanö ajam ricu runacuna
gloriaman yaucuyänanpäga! ²⁴Tsaypa
rantinga mas fácilchi aujapa uchcunpa
juc *camëllu ashmapis päsariman ricu
runacuna gloriaman yaucuyänanpä
cagpita”.

²⁵Tsayta wiarnam discipuluncuna
pasaypa yarpachacur niyargan: “Tsaynö
cappinga ¿pinarä salvacur gloriaman
yaucunga?”

²⁶Tsaynö niyaptinnam Jesus nirgan:
“Quiquillanpitaga runacuna manam
gloriaman yaucuyangatsu. Tayta
Diosllam jutsancunapita perdonar
gloriaman yaucatsinga” nir.

²⁷Tsaymi Pedro nirgan:
“Nogalläcunaga imaycäcunatapis

jagiriycayämurgö gamta gaträyána raycurmi, taytay. Tsaypitaga ñimatä canga nogacunapäga?” nir.

²⁸Tsaynö niptinnam Jesus nirgan: “Fisyu final junagchö llapan runacunata juzgaptimi chunca ishca (12) *trönucunachö jamacuyanqui. Tsaychömi gamcunapis chunca ishca castapita mirag Israel runacunata juzgayanqui. ²⁹Nogaman criyicamungan raycur pipis wayinta, waugincunata, panincunata, mamanta, taytanta, tsurincunata, chacrancunatapis jagireg cagga pachac (100) cuti mastam chasquiyanga. Y wanucurnam Tayta Diospa ñöpanman chäyanga imayyagpis cushishgana cayänapä. ³⁰Tsaynömi riquézancunapä yarpargcunaga gloriaman mana yaucuyangatsu. Waquincunam itsanga Diosnintsic raycur imaycancunatapis jagireg cagcuna gloriaman chäyanga”.

Peyuncunaman iwalatsiypa Jesus yachatsingan

20 ¹Tsaypitam Jesus nirgan: “Tayta Diospa munayninchö cawagcunaga cay cuentuchö willacungänömi caycäyan. Juc runam tsaca tsacallana peyun asheg yargunä üva chacranchö arutsinapä. ²Tsayna payga peyuncunata tarir aycata págananpäpis nisquir üva chacranman arog cachanä”.

³“Tsaypitana peyun yaucuy öranöna yapay plázapa cutir runacunata tarinä aruyta ashir caycäyagta. ⁴Tsayna paycunata ninä: ‘Gamcunapis üva chacräman arog aywacuyállay. Aruyangayquipitaga complétutam pägayállashayqui’ nir. Tsaynö niptin paycunapis cushishga aywayänä”.

⁵“Tsaypita yapaypis tsay runaga yargunä peyuncuna asheg, pullan junagnö y tardi mallwaynö rupay

caycaptinpis. Tsayna taringan runacunatapis mincacur chacranman arog cachanä”.

⁶“Tsaypita rupay ullunaycaptinpis yapay plázapa yargur runacunataga tarinä puriycäyagta. Tsayna paycunatapis ninä: ‘¿Gamcunapaga manacu aruyniquicuna can? Caychö goyatchä puricuycäyanqui’ nir”.

⁷“Tsaynö niptinna paycuna niyänä: ‘Manam pipis mincacayämashgatsu arupäyänäpä, taytay’ nir”.

“Tsayna ninä: ‘Tsayöraga gamcunapis chacräman aywayay üvata pallayämunaquipä’ nir”.

⁸“Tsaypita patsa tsacanaycaptinna tsay üva pallatseg runa mayoralninta ninä: ‘Llapan arogcunata gayascärir pägaycuy gepatarä arog chagcunapita gallaycur goyat arogcunayag’. ⁹Tsayna gayatsimuptin shayämunä tardirä arog yaucogcuna. Y paycunata päguta chasquiyänä juc jornal tincuta.

¹⁰Tsaynö chasquiyanganta ricarna goyat arog cagcunaga págananpä witr yarpäyänä masllata chasquiyänäpä cagta. Tsaynö yarparpis juc jornal tincullata chasquiyänäga. ¹¹Tsayna waquin cagcunawan iwallla chasquirna goyat arogcunaga chacrayogtaga ajar niyänä: ¹²‘Tsayrä yaucamogcuna juc öralla aruriyanganpita ñimanirtä nogacunatawan iwal págasquinqi, tsayläya achaychöpis arucäyapti?’ nir”.

¹³“Tsaynö niyaptinna chacrayog runa ninä: ‘Parlangantsicnöllam pägaycällä. Manam gamcunata engañaycä imätsu, taytay. ¹⁴Parlangantsicnö päguta chasquycarga ñimatanatä munayanqui? Noga munarnachir gepa yaucamogcunatapis gamcunatawan iwalpis pägacü. ¹⁵Quiquipa gellënita imata ruracuptipis manam gamcunaga cuentayogtsu cayanqui. ¿Alli runa

carnin tsaynö pägaycupticu
chiquicuyanqui?” nir”.

¹⁶Tsaynö willacurmi Jesus nirgan:
“Tsay arupacuyman punta yaycogwan
gepa yaycogpis iwal päguta
chasquiyangannömi puntata
criyicogcunawan tsayrä criyicogcunapis
llapancuna gloriaman chäyanga”.

**Wanutsiyänapä cagta yapayna
Jesus willacungan**

(Marcos 10.32-34; Lucas 18.31-34)

¹⁷Jerusalenman
aywaycäyanganchöman
discípuluncunata jucläman gayarir Jesus
nirgan: ^{18,19}“Gamcunaga musyayanquim
Jerusalenman aywaycangantsicta.
Tsaychömi noga Tayta Diospita
shamogta sacerdotícunapa
mandagnincuna y ley yachatsicogcuna
präsu tsariyämanga. Nircurmi
wanutsiyämänapä juclä mana Israel
runacunapa maquincunaman
entregayämanga. Tsay runacunaman
entregaycayämaptinmi asipäyämanga,
astayämanga, y nircur
crucificayämanga. Tsaynö captinpis
quimsa junagtaga cawamushämi”.

**Santiago y Juanpa maman
Jesusta rugacungan**

(Marcos 10.35-45)

²⁰Tsaypitanam Santiaguta y Juanta
pusharcu maman aywargan Jesus
cagman. Tsaynam Jesuspa ñöpanman
gonguricuycur nirgan:
“Rugaculläshayqui, taytay”.

²¹Tsaynö niptinnam Jesus tapurgan:
“¿Imachö yanapanätatä munanqui?” nir.

Tsaynam tsay warmi nirgan: “Taytay,
mandacu cangayquichö cay ishcan
wawäcunata churaycullanqui gamta
mandäshiyäshunayquipä, jucta derëcha
cag läduyquiman y jucagtana itsogniqui
cagman” nir.

²²Tsaynö niptinnam Jesus nirgan:
“Gamcunaga manam musyayanquitsu
imata mañacuyänayquipä cagtapis.
Noga ñacar awantanäpä cagta
¿gamcuna awantayanquimantsurä?” nir.

Tsaynam paycuna niyargan: “Aumi,
awantayämanmi, taytay” nir.

²³Jesusnam nirgan: “Rasunpa
gamcunapis noga ñacangänöga
ñacayanquim. Tsaynö captinpis
itsogniman o derëchämanpis jamatsishä
Tayta Dios nimangan cagllatam”.

²⁴Tsaynö mañacunganta wiwaycurnam
waquin cag discípulucunaga
ajanapâyargan Santiagutawan Juanta.

²⁵Tsaynam discípuluncunata gayaycur
Jesus nirgan: “Gamcuna
musyayangayquinöpis nacion
mandagcunaga mandacog cayayninman
yäracuycurmi runacunata
munayanganman mandayan.

^{26,27}Gamcunaga manam tsaynö cayta
yarpâyanguimantsu. Tsaypa rantinga
waquin runacunapita mas alli ricashga
cayta munarga runa mayiquicunatarämi
imaycachöpis yanapâyänayqui.

²⁸Tsaynömi nogapis Tayta Diospita
shamurgö runacunata imaycachö
yanapanäpä, manam munangäta
ruratsinäpätsu. Tsaynömi ari shamurgö
runacuna raycur wanur salvanäpä”.

Ishcay gaprata Jesus allitsingan

(Marcos 10.46-52; Lucas 18.35-43)

²⁹Jerico marcapita Jesus aywacuptin
atsca runacunam gatipâyargan.

³⁰Aywaraycäyaptin nani cuchunchönam
ishcay wiscuyashga runacuna
jamaraycâyargan. Paycunam Jesus
päsaycagta wiyar gayacuyargan: “iUnay
rey Davidpa castan Jesus, nogacunata
cuyapaycayällamay!” nir.

³¹Tsaynö gayacuyaptin runacunaga
ajäpâyargan upälläcuyänanpämi.
Tsaynö ajäpâyaptinpis masrämi

paycunaga gayacuyargan: “iRey Davidpa castan Jesus, nogacunata cuyapaycayällamay ari!” nir.

³²Tsaynö gayaräyaptinnam Jesusga aywaycanganta ichisquir tapurgan: “¿Imachö yanapanätatä gamcuna munayanqui?”

³³Niptinnam paycuna niyargan: “Ñawïcunata allïcatsinayquitam munayällä, taytay” nir.

³⁴Tsaynö gayacur mañacuyaptin cuyapasquirnam ñawincunata yataycurgan. Tsaynö yataycuptillanmi jinan öra allisquirgan. Tsaynam paycunapis Jesusta gaticurcuna aywacuyargan.

Jerusalenman Jesus yaucungan

(Marcos 11.1-11; Lucas 19.28-38;
Juan 12.12-19)

21 ¹Tsaypitanam discipuluncunawan Jesus aywayargan Jerusalenman. “Olivos” ningan jircan washa lädunpa Betfage marcaman yaycuraycarnam puntatsir ishca discipuluncunata cachargan: ²“Aywayay tagay marcapa. Tsay marcaman yaucuna ricogllachömi tariyanqui maltalla wawayog ashnu wataraycagta. Tsayta pascarir apayämunqui. ³Pipis ‘¿Imapätä ashnüta pascayanqui?’ niyëshuptiquega niyanqui: ‘Señor Jesusmi cachayämashga. Rätupallatam cutiratsiyämushä’ nirnin”.

⁴Tsaycuna ruracánänpä cagtam Tayta Diospa unay willacognin profëta caynö gellgargan:

⁵“Israel runacuna, ricayay malta ashnun muntashga mandacogniquicuna shamuycagta.

Mulan muntashga Jerusalenman shamunanpa rantinmi lluta runanölla ashnun muntashga yaycaycämun”.

⁶Jesus ningannöllum discipuluncunaga aywar malta ashnuta wawantinta apayämurgan. ⁷Nircurmi punchuncunata tsay malta ashnuman carunapâyargan Jesus muntacunanpä. ⁸Tsaynö muntacushga Jesus aywaptinnam waquin runacuna jacuncunata punchuncunata jipirir Jesus aywangan näniman gopipâyargan. Waquincunanam palmëra jachapa rämancunata paquirir paquirir näniman mashtapâyargan payta cushishga chasquicurnin. ⁹Tsaynam ñöpanta y gepanta aywagcunapis cushicuywan caynö gayarâyargan: “iTayta Dios cachamungan mandamagllantsic caychönam caycan! Payga unay rey Davidpa castanmi. iTayta Dios imayyagpis alabashga caycullätsun!” nir.

¹⁰Tsaynö Jerusalenman Jesus yaycuptinnam runacuna wayincunapita yargascarayämurgan jucninpis jucninpis tapunacurnin: “¿Pirä tagay runaga?” nir.

¹¹Tsaynam runacuna niyargan: “Payga Galileachö Nazaret marcapita Jesusmi. Payga Tayta Diospa willacognin profëtam” nir.

Templuman Jesus yaucungan

(Marcos 11.15-19; Lucas 19.45-48;
Juan 2.13-22)

¹²Tsaypita templuman yaycurirnam templupa patiunpita Jesus gargurgan ranticur caycagcunatapis y rantipacogcunatapis. Tsaynömi gellë

s 21.8 Unay runacunapa üsuncunachöga juc rey marcaman yaycuptinmi respitarnin jacuncunata, punchuncunata, y palmëra jachapa rämancunata näniman gopipâyag.

trocatsēcunapa mēsancunatapis y paluma ranticogcunapa jamacuyānancunatapis jitar cumar ushargan. ¹³Tsaynō rurarmi paycunata nirgan: “Tayta Diospa palabran gellgaranganchöpis caynōmi nican: ‘Temploga canga noga Diosllayquicunaman mañacayāmunayquillapāmi’. Tsaynō gellgaraycaptinnga imanirtā gamcuna ticraycātsiyanqui ladruncunapa machaynintanōna?” nir.

¹⁴Tsaychōnam gapracunapis y ratacunapis Jesuspa ñöpanman witipāyargan. Paycunataga llapantam allitsirgan. ¹⁵Tsaynō allitsinganta ricaycurnam mandacog sacerdotícuna y ley yachatsicogcuna feyupa ajāyargan. Tsaynōllam ajāyargan wamracuna caynō negta wiyarpis: “iMandamānantsicpā rey Davidpa castanta cachamunganpita Tayta Dios alabashga catsun!” nir. ¹⁶Tsaynō ajarninmi Jesusta niyargan: “¿Wiyanquicu tsay wamracuna nicāyanganta?”

Tsaynō niyaptinnam Jesus nirgan: “Aumi, wiyāmi. ¿Manacu gamcuna liyiyarguyqui Diospa palabran caynō gellgaraycanganta: ‘Tayta Dios, gamta alabayāshunayquipā, wasgishga wamracunatapis y chuchuycag wamracunatapis tantiyatsirguyquim’ nir?”

¹⁷Tsaycunata nisquirnam patsarangan Betania marcaman aywacurgan.

**Higuspa yuran tsaquinanpā
Jesus ningan**

(Marcos 11.12-14, 20-24)

¹⁸Warayninnam Jerusalemman Jesus cutiycanganchō mallagacuycurgan.

¹⁹Tsaynam higuspa yuranta ricasquir aywargan prütanta micurcuyta munar. Prütanta ashir mana tariycurnam raprallan verdiraycagta ricaycur nirgan: “iCananpitaga manam imaypis wayunquinatsu!” nirnin. Tsaynō niyauptin jinan öram higuspa yuran tsaquicurgan.^t

²⁰Tsayta ricaycurmi discipuluncuna Jesusta tapuyargan: “¿Imanöpatā tsay higuspa yuran tsaquisquishga?” nir.

²¹Tsaynam Jesus nirgan: “Llapan shonguyquicunawan Tayta Diosman yāracurga cay higus yurata tsaquiratsingänöllam, gamcunapis imayca milagruta rurayta puēdiyanqui. Tagay jircata ‘iLamarman witicuriy!’ niyaptiquipis witicurinmanmi. ²²Llapan shonguyquicunawan yāracur imatapis Tayta Diosman mañacurga chasquiyanguim”.

**Jesus imaycawan munayyog
canganta mana criyiyangan**
(Marcos 11.27-33; Lucas 20.1-8)

²³Tsaypita Jerusalemman chārirnam Jesus templuman yaycurgan. Tsaychō yachatsicuycaptinmi mandacog sacerdotícuna y Israel runacunapa autoridānincuna Jesusta tapuyargan: “Gamga ¿ima puēdeg cayniquiwantā templuchō ranticogcunata gargurguyqui? ¿Pitā mandashurguyqui tsaynō gargunayquipā?” nir.

^{24,25}Tsaynō niyaptinmi paycunatapis Jesus tapurgan: “Gamcunatapis canan mā, tapuyāshayqui. ¿Pitā Juanta cachamurgan bautizacunanpā, Tayta Dioscu o runacunacu? Tapungāta niyāmaptiquega nogapis

t 21.19 Tsay higuspa yuran verdiragrā captinpis prütan mana cangannōmi waquin runacunapis janan shongulla Tayta Diosman criyicog tucuyan. Tsaymi higuspa yuranta Jesus tsaquitsirgan janan shongu criyicog cagcuna infernuman aywayānanpā cagta discipuluncuna tantiyacuyānanpā.

willayāshayquim tsaycunata runanäpä pï cachamangantapis”.

Tsaynö Jesus niptinnam quiquincuna pura niyargan: “Ama nishuntsu Tayta Dios cachamunganta. ‘Tayta Diosmi cachamushga’ nishgaga ‘¿Imanirtä criyiyargayquitsu?’ nimāshunmi. ²⁶Y tsaynōlla ama nishuntsu runacuna cachamungantapis. Tsaynö niycushgaga sagmarchir ushaycamāshun. Llapanmi yarpāyan Diospa willacognin Juan canganta”.

²⁷Tsaynö willanacurirmi paycuna niyargan: “Manam musyayätsu pï cachamungantapis” nir.

Tsaynö niyaptinmi Jesus nirgan: “Gamcunapis mana willaycayāmaptiquega nogapis manam willätsu pipa munayninta rurar templupita ranticogcunata gargungätapis”.

Mandacog sacerdotícuna mana alli cayanganta Jesus ningan

²⁸Tsaypitanam Jesus nirgan: “Juc runapam ishca y tsurincuna capunä. Tsaynam mayor cag tsurinta ninä: ‘Au hiju, canan junag arupaycallamay ari’ nir. ²⁹Tsaynö rugaptin tsurin ninä: ‘Manam tiempü cantsu yanapanäpä’ nir. Tsaynö nisquirpis yarpachacurirga papänin yanapag aywanämi. ³⁰Tsaypitana jicpa cag tsurintapis mincacunä. Payga ninä: ‘Achyä ari shamushächir, papä’ nirnin. Arog aywananpä tsaynö aunircurpis manam arushag aywanätsu”.

³¹Tsaycunata willapacurirmi mandacog sacerdotícunata y autoridäcunata Jesus tapurgan: “Tsay ishcan waugicunapita ¿maygan cagtä papänin mandanganta cumplirgan?” nir.

Tsaynö niptinnam “Mayor cag tsurinmi” niyargan.

Tsaynam Jesus nirgan: “Gamcunapis mana wiyacog jicpa cag tsurinnömi caycāyanqui. Tsay mayor cag tsurin ñëgarcur yanapangannömi Romapä *impuestu cobragcuna y jutsa rurag warmicunapis caycāyan. Jutsancunata jagirirga Tayta Diospa munayninchöna cawar yarpachacurnam Tayta Diospa ñöpanman chäyanga. Peru gamcunam itsanga Tayta Diospa ñöpanman chäyanguitsu. ³²Juan Bautistaga yachatsirgan jutsa ruraycunata jagirir Tayta Dios munangannöna cawayānayquipämi. Tsaynö willacuycaptinpis gamcunaga manam cäsucuyarguyquitsu. Tsay impuesto cobragcuna y jutsa rurag warmicunam itsanga Juan willacungancunata cäsucuyashga. Tsaynö paycuna cäsucuyangantana ricaycarpis gamcunaga manam imaypis cäsucuyarguyquitsu”.

Mana criyicogcuna imanö cayānanpä cagta Jesus willacungan
(Marcos 12.1-12; Lucas 20.9-19)

³³Tsaypita mastapis Jesus caynö willacurganmi: “Juc runam chacranman üvata plantatsinä. Nircurmi maytsayninpa genchatsinä. Tsaypitam pogushga üvapa yacunta jipinanpä pözutapis jinan chacrallachö ruratsinä. Tsaynömi üvata täpatsinanpä tsucllatapis ruratsinä. Tsaynö llapantapis ruraycatsirmi chacran arog runacunata arrendacuycur juclä marcapa aywananä”.

³⁴“Cosëcha gallaycuptinnam wätaynincunata cachanä chacra arrendunpita cobracayāmunanpä. ³⁵Cobracog chäyaptinna chacra arrenderagcuna waquinta magayāmunä, waquintana wanutsiyänä, y waquintanam sagmaraycar cutitsiyāmunä. ³⁶Tsaynö

uraycäyaptinpi chacrayogga yapay mastana wätaynincunata cachanä. Paycunatapis tsaynölla rurayämünä”.

³⁷“Tsayna chacrayogga yarpachacunä: ‘Cananga cachashä jucllaylla cuyay tsuritam. Paytaga capazmi respitayämunga’ nir. ³⁸Tsaynö yarpasquirna cachanä. Tsayna tsurin aywaraycagta ricasquir willanacuyänä: ‘Tagä shamuycan cay chacrawan quëdagpä cag heredëru. Nogantsicpäna cay chakra cacunanpä tagayta wanuratsishun’ nir. ³⁹Tsaynö willanacuyangannölla duëñupa tsurin chaycuptin chacrapi jucläman jipisquir wanuscatsiyänä”.

⁴⁰“Tsaynö rurayanganpita tsay üva chacrayogga çimatarä ruranga chacranta gechuyta munag runacunata?”

⁴¹Niptinnam paycuna niyargan: “Tsay mana alli runacunataga mana cuyapaypachir wanutsir ushanga. Nircurchir tiempunllachö arrendunta pägag cagta chacrantaga arrendacunga” nir.

^{42,43}Tsaynam Jesus nirgan: “Tsay chakra arrendarag mana alli runacunata ushacätsingannömi gamcunatapis Tayta Dios infiernuman gaycuyäshunqui. Pay munanganman cawag runacunatam itsanga salvacionta taritsinga. Gamcuna infiernuman mana gaycucayta munarga Tayta Diospa palabran gellargangan caynö ninganta tantiyacuyay:

‘Wayi sharcatsëgcuna “Cay rumi manam allitsu” nir jitariyangantam juc alli albañilga mayistra rumimanrä ticraratsin.

Tsaynömi nogata runacuna mana välegpä cuentayämaptinpi Tayta Diosga alläpa väleg canäpä churamashga. Tsayga

ima cushicuypämi criyicogcunapä’.

⁴⁴Pipis tsay mayistra rumiman ishquirga tacacunmi. Y pipa jananmanpi tsay rumi cuchpacarga pasaypam ushacäratsin. [Tsaynömi pipis nogaman mana criyicamog cagga infiernuchö ñacayanga]”.

⁴⁵Tsaycunaman iwalatsiypa yachatsicuptinmi sacerdotícunapa mandagnincuna y fariseucuna tantiyacuscäriyargan paycuna castigacäyänanpä Jesus parlaycanganta. ⁴⁶Tsaynam rabyanar prësü tsariyta munarpis camäpacuyargantsu runacunata mantsaparnin. Llapan runacunam parlar niyargan Jesus Tayta Diospa willacognin profëta canganta.

**Casaray fiestaman iwalatsir
Jesus yachatsicungan
(Lucas 14.15-24)**

22 ¹Tsaypitanam gloriaman yaycuypä cagtana Jesus yachatsirgan casacuy fiestaman iwalatsiypa caynö nir:

²“Juc reymi ollgu tsurin casacuptin fiestata ruranä. ³Tsaynam wätaynincunata cachanä invitangan runacunata casacuy fiestaman pushayämunanpä. Tsay invitäducunaga manam ni mayganpiis aywayta munayänätsu. ⁴Tsaypita yapaymi waquin wätaynincunatana cachanä caynö nir gayayämunanpä: ‘Törucunata y weran weran cag ashmacunata pishtascäratsir micuyta cusnacatsishganam caycan. Llapanpiis gayatsingäcuna päscayäällämutsun tsuri casacuycaptin’ nir. ⁵Tsaynö gayatsiptinpiis manam ni mayganpiis aywayänätsu. Tsay aywayänanpa rantinmi waquincuna aywacuyänä chacran arog. Waquinnam aywayänä

negociuncunaman ranticog.

⁶Waquinnam tsay cachancunata magayänä y wanutsiyänä”.

⁷“Tsaynam fiesta rurag reyga feyupa ajarna soldäduncunata cachanä wätaynin wanutsegcunata wanutsiyänanpä y marcancunatapis rupatsir ushacätsiyänanpä. ⁸Nircurnam wätaynincunata ninä: ‘Tsuripa casamientunta celebranäpä llapanpis listunam cashga. Tsaynö caycaptinpis tsay gayatsingä runacuna imapäpis mana cuentayämarmi mana shayämushgatsu. ⁹Cananga cällicunapa aywar runacunata pitapis maytapis willayämuy cay listapacushga fiestaman shayämunanpä’ nir”.

¹⁰“Tsaynö niycuptinnam wätaynincunaga tincuyanganpita alli runatapis mana alli runatapis willayaptin aywayänä wayipis juntagpä. ¹¹Tsaynam reyga runacunaman ricag yaycurna ricasquinä tsaychö juc runa casacogta mana respitar lluta röpushgalla caycagta. ¹²Tsaynam tsay runata tapunä: ‘Amigu, ¿imanirtä cayman yaycamurguyqui alli röpayquita mana trocacullar?’ nir. Tsaynö tapuptinnam tsay runaga imaninäpistsu mana trocacullar aywashga car.

¹³Tsaynam wätaynincunata rey ninä: ‘Cay runa tsurita imapäpis mana cuentar tsaynö shamunganpita chaquinta maquina pancarcu tsacayman jitarpayämuy. Tsaychömi wagar quiruntapis uchur yarpayta taringa’ nir”.

¹⁴Tsaynö cuentacurirmi Jesus niran: “Tsaynö Tayta Dios llapan runacunata gloriaman chäyänanpä gayatsiptinpis tsurinta respitar cäsucogcunallam ñöpanmanga chäyanga” nir.

Impuestuta pägayänanpä o mana pägayänanpä Jesusta tapuyangan
(Marcos 12.13-17; Lucas 20.20-26)

¹⁵Tsaypitanam fariseucuna templupita yargurir willanacuyargan achäquita ashirinna alli shimillancunapa Jesusta parlapäyänanpä, tsaychö llutanta niptinga prësür apatsiyänanpä.

¹⁶Tsaynam imata niyänanpäpis shumag yacharcatsir fariseucuna cachayargan runancunata y Herodespa janan sharcog runacunata. Tsay aywagcunam Jesusta niyargan: “Taytay, nogacuna musyayämi Tayta Dios munangannö runacuna cawayänanpä imaypis yachatsicuygangayquita. Gamga imata yachatsicurpis maychöpis mana mantsapacuypam yachatsicunqui.

¹⁷Cananga jucta tapucuyälläshayqui, taytay. ¿Roma nacionman impuestuta pägashwancu o manacu?” nir.”

¹⁸Llutanta parlatsiyta munar yachayllapa tapuyanganta musyarnam Jesus niran: “iAlli tucur parlagcuna! ¿Imanirtä gamcuna tsaynö tapupäyämānayquipä willanacuyarguyqui? ¹⁹Mä, ricatsimay tsay impuestuta pägacuyänayqui gellëta”.

Tsaynö niptinmi tsaraycäyangan gellëta Jesusta aptaparcuyargan.

²⁰Tsayta ricaycurnam Jesus tapurgan: “Cay gellëchö ¿pī runapa reträtuntä caycan? ¿Pipa jutintä gellgaraycan?” nir.

²¹Tsaynö tapuptinnam niyargan: “Romachö mandamagnintsic *emperadorpam”.

Tsaynam Jesus niran: “Tsayöraga, emperadorpa cagta emperadorta

u 22.17 Waquin runacuna niyargan Roma nacionman impuestuta pägayänanpä cagtam y waquinnam niyargan impuestuta pägarga Tayta Diospa contranta ruraycäyanganata.

goycuyay. Tayta Diospa cagtaga^v Tayta Diosta goycuyay”.

²²Tsaynö niptinnam tsay runacuna imaniyapis mana puëdirna aywacuyargan.

**Wanushgacuna mana
cawariyämunanpä cagta
saduceucuna yarpäyangan
(Marcos 12.18-27; Lucas 20.27-40)**

²³Tsay junagllam waquin saduceo cag runacunapis Jesusman chäyargan.

Nircurmi wanushgacuna cawariyämunanpä cagta mana criyir caynö niyargan:

²⁴“Taytay, Moises gellganganchöga caynömi nican: ‘Juc runa tsuriynaglla wanucuptin gepa cag wauginna llumtsuynin viüdawan tätsun. Tsaynöpam viüdachö wamran yuriptin tsay wanog cag wauginpa tsurin cuentana canga’ nir. ²⁵Tsaymi canan cuentariyāshayqui, taytay. Ganchis (7) waugicunash cayänä. Mayor cagshi juc warmiwan tänä. Payga tsurin manarä captinshi wanucunä. Tsayna gepan cag wauginnash tänä tsay viüdawan.

²⁶Tsaypita paypis tsurin manarä captinshi wanusquinä. Tsaypita mas ñuñushga cagna tänä tsay viüdawan. Paypis wanusquinä tsurin manarä captinllarä. Tsaynölla llapan waugiwanpis tsay viüdaga wanuyayllanta tänä. ²⁷Tsaypitana tsay viüdapis wanucunä. ²⁸Canan mä, niyāmay. Wanushgacunata Tayta Dios cawaritsimunan junagga çmayganpa warmintä canga, ganchis waugiwan tashga caycaptinga?”

²⁹Tsaynö niyaptinnam Jesus nirgan: “Tsaynö nirnin Diospa palabran gellgaranganta liyicarpis imata

ningantapis manam tantiyayanquitsu. Runacunata Tayta Diosmi poderninwan cawaritsimunga. ³⁰Wanuyanganpita cawarircamurga mananam warmiyog ni gowayogpis cayanganatsu, sinöga ciëluchö caycag angelcunanöllanam cayanga. ³¹Wanushgacuna cawariyämunanpä cagta çmanacu liyiyarguyqui Diospa palabran gellgaranganta? [*Abraham, Isaac, y Jacob wanunganpita alli unaytarämi Tayta Dios Moiesta parlapargan caynö:] ³²“Nogaga Abraham, Isaac, y Jacob adoraycäyangan Diosmi cä’ nir. Wanushgacuna mana cawariyämunan captinga çmanöpatä Abraham, Isaac, y Jacob Tayta Diosta adoraycäyanman? Tsaynö caycaptinga çmanirtä gamcuna mana criyiyanguitsu wanushgacuna cawariyämunanpä cagta ni runacuna almayog cayanganta?”

³³Tsay ningancunata wiyaycurnam runacuna cushicuyargan Jesuspa yachatsicuyninpita.

**Mas cäsucuypä cag
mandamientupita Jesusta
fariseucuna tapuyangan
(Marcos 12.28-34; Lucas 10.25-28)**

³⁴Tsaypita saduceucunata Jesus upällaratsinganta musyarnam fariseucuna goricaycur yapay willanacuyargan Jesusta achäquita ashiparnin llutancunata parlatsiya munar. ³⁵Tsaynö willanacurirmi ley yachatsicog juc musyag runa Jesusta tapurgan: ³⁶“Taytay, çmaygan mandamientutatä mas cäsucushwan?” nir.

³⁷Tsaynö tapuptinmi Jesus nirgan: “Llapan shonguyquiwan y llapan yarpayniquiwan imaypis Tayta Diosta

v 22.21 Caway gomagnintsic Tayta Diosllam caway vidantsicwanga munayyog. Tsaymi Tayta Diospa cagga caway vidantsic caycan.

cäsumnin cawayay'. ³⁸Tsay mandamientum llapan mandamientupitapis mas cumplinantsicpäga caycan. ³⁹Tsaynöllam jucag mandamientupis nican: 'Runa mayiquita llapan shonguyquiwan cuyay' nir. ⁴⁰Tsay ishca mandamientuta cumplirga Moises gellangan llapan mandamientucunata y profetacuna gellayangan mandamientucunatapis cumpliercag cuentam caycäyanqui" nir.

**Salvacog shamog
runalla mana cangan**

(Marcos 12.35-37; Lucas 20.41-44)

⁴¹Tsaypitanam fariseucuna tsaychö goriraycäyaptin paycunatana Jesus tapurgan:

⁴²"Gamacunapäga imaygan castapitatä salvacog yuringa?" nir.

Tsaynö tapuptinmi niyargan: "David castapitam yuringa, taytay".

⁴³Tsaynam Jesus nirgan: "[Unay rey Davidpa castanpita captinmi gamcunaga yarpäyanqui salvacog shamog runalla canganta. Payga manam runallatsu, sinöga Diosmi.] Runalla captinga imanirtä rey caycar quiquin Davidpis Espiritu Santo tantiyatsiptin salvacog rey canganta ninman cangan? Tsay ningantam David gellargan caynö:

⁴⁴ 'Salvacogga mandacog reynimi.

Tsaymi payta Tayta Dios ninga:

"Jamacamuy derëcha cag lädüman nogawan iwal mandacog canayquipä.

Tsaypitam llapan

chiquishogniquicunata castigar situnman churashun" nir'.

⁴⁵Tsaynö caycaptinga imanöpatä salvacogga Davidnö runalla canman quiquin Davidpis salvacog rey canganta nicaptinga?"

⁴⁶Tsaynö niptin manam pipis contestayta puëdiyargantsu. Tsaymi tsay junagpita tsariyta munagcuna mastaga tapupayta almitiyargannatsu.

**Fariseucuna llutan ruraynincunata
jagiriyananpä Jesus gayapangan**

(Marcos 12.38-40;

Lucas 11.37-52; 20.45-47)

23 ¹Nircurnam runacunata y discipuluncunata Jesus nirgan:

^{2,3}"Ley yachatsicogcunapis y fariseucunapis Diospa palabranta yachatsiyäshuptiqui cäsucuyay. Peru

itsanga paycuna munayanganman cawayangannöga ama cawayaytsu. Diospa palabranta yachatsicurpis

quiquincunaga manam cumplierantsu.

⁴Paycunaga runacuna imanö caytapis mana camäpacuyanganyagmi Moises gellangan leycunaman yapa-yaparcu cumplitsiya munayan. Tsaynö captinpis shumag alli tupayllapa yachatsiyänanpa rantinmi ollgü tupayparä yachatsiyan".

⁵"Paycunaga waquin runacunapitapis filacteriancunata" mas jatunta ruraycur puritsiyan ricagcuna 'Payga Tayta Diosta cäsucog alli runam'

niyanallanpämi. Tsaynöpis waquin runacunapita mas ata plëcucunatam^x

röpancunapa chuscun cuchunman churapäyan ricagcuna 'Payga Tayta

Diosta cäsucog alli runam' niyanallanpä.

⁶Paycunaga micupacucunaman gayatsiyaptinpis mësanranämi

w 23.5a Israel runacunapa üsuncunachöga Bibliapita gellgarcurmi ichic cajitaman wiñayag. Tsaytanam urcuncunaman o ricrancunaman watarcu puritsiyag, Exodo 13.9-chö ninganta cumpliera yarpar. Tsay cajitapa jutinmi cangan filacteria. **x 23.5b** Israel runacunaga röpancunapa chuscun cuchunmanmi plëcuta churapäyag Tayta Dios ningannölla. Tsay plëcuyog röpancunata ricarmi Tayta Diospa mandamientuncunata yarpäyag. Tsaypita masta musyanayquipä liyinqi Numeros 15.37-40 y Deuteronomio 22.12.

jamacuyta munayan. Tsaynöllam goricäcuyänan wayicunachöpis allin cag jamacunamanrä jamacuyta munayan.

⁷Paycunaga pläzacunachöpis yachatsicog cayayninpita runacuna alabayänallantam munayan”.

⁸“Gamcuna ama paycunanöga cayanquitsu. Gamcunata noga yachatsirgö manam yachag tucuyänayquipätsu, sinöga discipulücuna car tsay waugilla cayangayquita tantiyacuyänayquipämi.

⁹Pi yachatsicogtapis Diosnintsictanöräga ama ricayanquitsu. Tayta Diosmanga manam pipis iwalantsu. ¹⁰Gamcuna willacuynita yachatsicur ama alabashga cayta munallar puriyanquitsu. Manam tsaynö cayänayquipätsu noga gamcunata yachatsirgö.

¹¹Maygayquicunapis alli ricashga cayta munarga mana yachag tucuyta runa mayiquicunatam imaycachöpis yanapayänayqui. ¹²Maygayquipis yachag tucog cayaptiquega Tayta Dios manam imapäpis cuentayäshunquitsu. Mana yachag tucur pitapis maytapis yanapag cagcunatam Tayta Diosga altuchö tsaranga”.

¹³“iAllau ley yachatsicogcuna y fariseucuna! Gamcunataga Tayta Dios mana cuyapaypam castigayäshunqui. Gamcunaga yachag tucurmi Diospa alli willacuyninman mas masta cabalarcur llutancunata yachatsiyanqui. Runacunata tsaynö pantatsiyangayquipitam quiquiucunapis Tayta Diospa ñöpanman chäyanquitsu”.

¹⁴“iLey yachatsicogcuna y fariseucuna! Gamcunataga Tayta Dios mana cuyapaypam castigayäshunqui. Gamcunaga Tayta Diosman mañacur imanömi gälacuyanqui runacunapa ricanallanchöga. Nicarrämi viüdacunapataga cuyapag tucullar

imaycantapis ushapäyanqui. Tsaynö rurayangayquipitam gamcunata Tayta Dios infiernuman gaycuyäshunqui”.]

¹⁵“iLey yachatsicogcuna y fariseucuna! Gamcunataga yachag tucog cayangayquipitam mana cuyapaypa Tayta Dios castigayäshunqui. Gamcunaga maypa tsaypapis aywayanqui fariseo cayman runacuna yaucuyänanpä yachatsillarmi. Tsaynö yachatsiyaptiqui yachacuscärinam gamcunapita masna yachag tucuyan. Tsaynö cayangayquipitam gamcunapis y paycunapis infiernuchö ñacayanqui”.

¹⁶“iTayta Dios mana cuyapaypam castigayäshunqui! Gamcunaga niyanqui: ‘Nogantsicga Diospa palabran gellgaranganta yachatsirnin gaprata jancharag cuentam mana musyagcunata yachaycätsintsic’ nirmi. Tsaynö nirpis quiquiucunam tantiyacuyanquitsu llutancunata yachatsir pantaycätsiyangayquita. Mana tantiyacurmi nicäyanqui: ‘Pipis templupa jutinchö imatapis aunicur jurarnin mana cumpliyaptinpis manam imananpistsu. Templu rurinchö örupa jutinchö jurarmi itsanga tsaytaga cumpliyänayqui’ nir. ¹⁷iMana tantiyacog musyag tucogcuna! Nagana templupa jutinchö aunicur jurarga, peru templu rurinchö caycag örupa jutinchöpis juraycäyanquinachä”.

¹⁸“Gamcunaga caynö nirpis runacunata yachatsiyanquim: ‘Imatapis rurayänanpä aunicur altarpa jutinchö pipis jurarnin mana cumpliyaptinpis manam imananpistsu. Peru altar jananchö churrag ofrendapa jutinchö jurarmi itsan tsaytaga cumpliyänayqui’ nirnin. ¹⁹iMana tantiyacog runacuna! Nagana altarpa jutinchö aunicur jurarga, peru altar jananchö ofrendapa jutinchöpis juraycäyanquinachä”.

²⁰“Altarpa jutinta jayarirga manam altarpa jutillantatsu jayaricyäyanqui,

sinöga altar jananchö churarag cagcunapa jutintapis jayariycäyanquinam.

²¹Templupa jutinta jayarirpis manam templupa jutillantatsu jayariycäyanqui, sinöga templuchö caycag Tayta Diospa jutintapis jayariycäyanquim. ²²Tsaynömi ciélupa jutinta jayarirmin ciéluchö Tayta Dios jamaraptin quiquin Tayta Diospa jutintapis jayariycäyanqui. ¿Tsaycunatacu mana tantiyacucuyanquitsu?”

²³“iAllau ley yachatsicogcuna y fariseucuna! Gamcunataga Tayta Dios mana cuyapaypam castigayashunqui. Gamcunaga templuman Tayta Diospä garaynin apayänayquipä mentatapis, anistapis, ni comñutapis chunca (10) aptay capuyashuptiqui juc aptaytaga imaypis raquiycäyanquim: ‘Tayta Diospa palabran gellgaranganmanmi llapantapis cumpliyäy’ nirnin. Tsaycunata rurarpis manam runa mayi quicunawan allega cawayanquitsu ni manam cuyapäyanquitsu. Nircur imata aunircurpis manam cumpliyänquitsu. Diospä ichic garayta apar cumplingayquinölla runa mayi quicunata alli ricayay, cuyapäyay, y imata aunirpis cumpliyay”.

²⁴“iMana tantiyacog yachag tucogcuna! Tayta Dios ninganta juc ishchaycunata cumplirninpis mas cumpliyäy cagcunataga manam cumpliyänquitsu. Tsaynö carmi yacuchö chuspita shuyshuycurrä upurpis mana mayaylla jatuncaray *camëllu ashmata ultacurcognörä caycäyanqui”.

²⁵“iLey yachatsicogcuna y fariseucuna! Gamcunataga Tayta Dios mana cuyapaypam castigayashunqui. Tutumay quicunata y matiquicunata janallanta awirir rurin ganrata dejaycognömi caycäyanqui. Tutumapa y matipa rurinchö ganra caycagnömi llutan yarpayni quicunawan y imaycapä mallag cayangay quicunawanga ganra

shongu caycäyanqui. ²⁶iMana tantiyacog fariseucuna! Puntataga cuentata gocuyay jutsa rurayni quicunata jagiyänayquipä cagta. Tsaynöpam Tayta Diosta chasquicur pay munangannö cawayanqui”.

²⁷“iLey yachatsicogcuna y fariseucuna! Gamcunataga Tayta Dios mana cuyapaypam castigayashunqui. Gamcunaga aya pamparanga cuyayllapä rurashga nichunömi caycäyanqui. Nichupa janan cuyayllapä captinpis rurinchöga imanömi tullucunapis ismur asyaycan!

²⁸Tsaynöllam gamcunapis runacuna ricayashunayquillapäga, ä alli tucuycuyanqui. Peru mana alli yarpayni quicunawanga iima ricog melanaypämi caycäyanqui!”

²⁹“iAllau ley yachatsicogcuna y fariseucuna! Gamcunataga Tayta Dios mana cuyapaypam castigayashunqui. Tayta Diospa willacognin profëtacuna gellgayangancunata cumpleg tucurpis manam imapäpis cuentayanquitsu. Tsaynö carnin alli cayangayquita runacuna niyänallanpämi tsay profëtacuna pamparayangan jananchö capillancuna ruraparnin adornarpis cayanqui. ³⁰Y niyanquiran tsaypis: ‘Tsay witsancuna cawarga nogacuna manam profëtacunata wanutsishiyämantsu cargan’ nir. ³¹Tsaynö nirpis profëtacuna gellgayangancunata mana cäsucur gamcunaga paycunata wanutseg unay runacunanöllam caycäyanqui. ³²iTayta Diospa unay willacognin profëtacunata wanutsiyangannölla nogatapis wanutsiyämayna ari! Fisyu final junagchö unay wanutsicogcunapitapis masmi gamcuna castigacäyanqui”.

³³“iCulebranö mana alli runacuna! Tayta Dios infernumanna gaycuyashunayqui caycaptinga imanöparä salvacuyanqui? ³⁴Noga

cachamungä willacogcunata y yachatsicogcunata gamcuna chasquicuyänayquipa rantinmi waquinta crucificaypa wanutsiyanqui, waquintanam goricäcuyänan wayicunachö munaylla astayanqui y marcan marcanmi carcelcunaman wichgatsiyanqui. ³⁵Tsaynö cayangayquipitam gamcunata Tayta Dios juzgayäshunqui Abelta wanutsegtanö, Berequiaspa tsurin Zacariasta altarpa ñöpanchö wanutsegtanö, y mas waquin profëtaacunata wanutsegcunatanö. ³⁶Allau, tsaynö cayangayquipitam gamcunataga Tayta Dios mana cuyapaypa castigayäshunqui”.

**Jerusalen marcata ricärir
Jesus waganan
(Lucas 13.34,35)**

³⁷Tsaypitam Jesus nirgan: “¡Jerusalen runacuna! ¿Imanirtä Tayta Dios cachamungan profëtaacunataga y alli willacuyninta willacogcunataga unaypitapis wanutsiyanquilla? Nogaga imanömi gamcunata goriyta munargö, imayca wallpa chipsancunata goriycur ogllagnöpis. Tsaynö goriyta munaycaptipis gamcunaga munayangayquichömi cacuyarguyqui. ^{38,39}Tsaynö cayangayquipita gamcunata Tayta Dios dejariyäshunquim y chiquiyäshogniquicunam munanganta rurarcayquicunatapis ushacätsiyanga. Tayta Dios goricamaptin manam ricayämanquinatsu ‘Tayta Dios cachamungan salvayämaglläcuna shacallämuy’ niyangayqui junagyag”.

**Templu juchunanpä cagta
Jesus willangan
(Marcos 13.1,2; Lucas 21.5,6)**

24 ¹Templupita yargurir Jesus aywacuycaptinmam discipuluncuna niyargan: “¡Cuyayllapä jatusag rumicunawan sharcatsishga

templuntsic imanö shumagmi, au taytay!”

²Tsaynö niyaptinmam Jesus nirgan: “Cay ricaycayangayqui templu imanö cuyayllapä sharcatsishga carpis juc junag chipyaypa ushacätsishgam canga. Manam ni juc rumipis pergaranganchö quëdangatsu” nir.

**Manarä cutimur imacunarä
päsanapä cagta Jesus willangan
(Marcos 13.3-13; Lucas 21.7-19)**

³Tsaypita discipuluncunawan Jesus aywacurnam Olivos jircanchö jamapäyargan. Tsaychönam discipuluncuna tapuyargan: “Ningayquinö ¿imaytä templuta ushacätsiyanga, taytay? Tsaynöpis cutimunayquipäga y cay patsa ushacänanpäga ¿imacunarätä päsaanga, taytay?” nir.

⁴Tsaynö tapuyaptinmi Jesus nirgan: “Pipis llutanta yachatsicur mana pantatsiyäshunayquipä shumag tantiyacuyay. ⁵Atscagmi criyitsicogcuna shayämunga nogaman ituyucullar: ‘Nogam salvacogga cä’ nirin. Tsaynö nirmi atscä runacunata criyitsiyanga. ⁶Maytsay nacioncunachöpis gyërä captin y wanutsinacuy captin ama mantsacäyanquitsu. Tsaycunarämi puntataga päsaanga. Tsaycuna captinpis cay patsaga manarämi ushacangarätsu. ⁷Juc nacionwan jucag nacionmi gyërraman yaycuyanga. Tsaynöllam muchuy captin mallagay canga. Terremötupis maytsaychömi canga. ⁸Tsaynö captinpis ñacaycunapa gallaycunallanrämi tsaycunaga canga”.

⁹“Tsay witsancunam nogaman criycamogcunata runacuna chiquirnin präsu tsariyanga, ñacatsiyanga, y wanutsiyanga. ¹⁰Tsaynö ñacaycuna captinmi nogaman criycayämunganpita waquincuna witicuriyanga. Nircurnam

mana witicogcunatana chiquir
 autoridäcunaman apatsiyanga
 castigayänapä. ¹¹Tsay tiempucunam
 Tayta Diospa willacuyñinta willacog
 tucogcuna masrä yuriyanga llutancunata
 criyitsicur. ¹²Maytsaychöpis
 chiquinacuyllana captinmi runacuna
 cuyanacurga cawayanganatsu. ¹³Tsaynö
 captinpi wanunganyagpis nogaman
 criycamog cagcunam Tayta Diospa
 ñöpanman chäyanga. ¹⁴Cay alli
 willacuyñita maytsay runacunaman
 willacuriyaptinrämi noga cutimushä”.

Feyupa ñacaycuna cananpä

Jesus willangan

(Marcos 13.14-23; Lucas 21.20-24)

¹⁵“Tayta Diospa willacognin profëta
 Danielmi gellgargan templuman
 yaycuycur mana alli runa imayca
 llutancunata rurananpä cagtapis. ¹⁶Tsay
 gellgangannöllum llapanpi ruracanga.
 (Jesucristo tsaynö ninganta liyegcunaga
 shumag tantiyacuyätsun.) ¹⁶Tsay mana
 alli runa templuman yaycuptin Jerusalem
 quinran marcacunapita geshpir
 aywacuyätsun. ¹⁷Wayincunapitapis juclla
 geshpicuyätsun imancunamanpi
 manana jipeg cutiypa. ¹⁸Chacranchö
 caycagcunapis geshpir aywacuyätsun.
 Wayincunaman ama cutiyätsunnatsu
 trocanancunaman jipegrä. ¹⁹Tsay
 mantsariypä ñacay junagcuna allau
 geshyag warmicuna y llullu wawayog
 warmicuna, paycuna iima cuyapaypä
 cayanga! ²⁰Tayta Diosman mañacuyay
 tsay junagcuna tamya witsanman ni
 säbadu jamapay junagman mana
 camacänapä. ²¹Tsay junagcunaga alläpa
 cuyapaypämi runacuna ñacayanga. Cay
 patsata Tayta Dios camanganpitapis
 manam tsaynö ñacayga cashgatsu. Y

mananam yapayga tsaynö ñacaycuna
 canganatsu. ²²Acrangancunata
 cuyaparmi Tayta Dios tsay ñacaycunata
 päratsinga. Tsay ñacaycunata mana
 päratsiptinga llapanpi
 ushacäyanmanmi”.

²³“Tsay junagcunam runacuna
 niyanga: ‘Tayta Dios cachamungan
 salvacog caychömi’ o ‘Wacchömi caycan’
 nirin. Tsaynö niyaptin ama ichicllapis
 criyianquitsu. ²⁴Tsaynöpis waquina
 ‘Tayta Dios cachamungan salvacogmi cä’
 o ‘Diospa willacognin profëtam cä’ nirmi
 llullacuyanga. Runacunata criyitsiyäna
 cashgam imayca milagrucunatapis
 rurayanga. Imaycanöpa engañarpis
 Tayta Diosman criycogcunataga manam
 engañayta puëdiyangatsu. ²⁵Tsaycuna
 manarä päsapinmi gamcunata willaycä
 criyitsicur llutan yachatsicogcunata
 mana cäsupäyänayquipä”.

²⁶“Pipis ‘Tayta Dios cachamungan
 salvacog tsunyag jircachömi caycan’
 niyashuptiqui ama ricag aywayanquitsu.
 ‘Washachömi pacaraycan’
 niyashuptiquipis ama criyianquitsu.
²⁷Ciëluchö tillagucuy jucaglöpita
 jucaglâyag atsiyaptin runacuna
 ricayangannömi noga ciëlupita
 cutimogtapis llapan runacuna
 ricayämanga. ²⁸Tsunyagcunachö
 wiscurcuna tumaycachar musyatsicuyan
 maychöpis wanushga ashma
 jitaraycangantam. [Tsaynömi noga
 ningäcuna ruracagta ricar musyayanqui
 noga cay patsaman cutimunäpäna cagta]”.

Ciëlupita cay patsaman

cutimunänpä cagta Jesus willangan

(Marcos 13.24-27; Lucas 21.25-28)

²⁹“Tsaynö feyupa ñacaycuna
 päsariptin rupaypis ni quillapis

y **24.15** Templuman yaycuycur mana alli runa imayca llutancunata rurananpä cagpita
 musyanayquipä liyinqi Daniel 9.27; 11.31; 12.11.

mananam atsicyanganatsu. Y nircur llapan estrëllacuna shushuyämungam. Ciëlpis sicsicyangam.^z ³⁰Tsaypitaran nogata ricayämanga pucutay jananta chipipirrä shamuycagta. Tsaynö shamuycagta ricaycayämarmi itsanga maytsay runacunapis pasaypa mantsarir wagayanga. ³¹Tsay junag Tayta Dios cornëtata jinchi tucaratsimuptinmi *angelñicunata cachamushä. Paycunam maytsaypitapis nogaman criyicamogcunata goriyämunga”.

**Hïgus jachaman iwalatsir imay
cutimunanpä cagtapis Jesus
tantiyatsingan**

(Marcos 13.28-31; Lucas 21.29-33)

^{32,33}“Cay hïgusman iwalatsir ningäcunata yarparäyanqui. Musyayanquim tamyä tiempu gallaycuptin hïgus jachapa yuran weglimunanpäna canganta. Tsaynömi cay ningä ñacaycuna gallaptin gamcunapis tantiyayänayquina cutimunäpä cercana canganta. ³⁴Cay ningäcuna gallaptin tsay tiempu runacuna manarä wanuyaptinmi llapanpis cumplinga. ³⁵Ciëlu y cay patsa ushacäcuptinpis noga ningäcunaga llapanmi ruracanga”.

**Jesus imay öra cutimunanpä cagta
mana pipis musyangan**

(Marcos 13.32-37;

Lucas 17.26-30, 34-36)

³⁶“Tsaycuna imay junag imay öra päsanänpä cagtaga angelcunapis ni nogapis manam musyayätsu. Tsaytaga quiquin Tayta Diosllam musyaycan”.

³⁷“Unay *Noe cawanan witsan mana yarpashgata Tayta Dios *diluviuta cachamungannömi nogapis mana

yarpashgata cutimushä. ³⁸Tsay witsanga diluviu manarä captin runacuna micur, upyar, casaracurmi cacuyargan. Tsaynö cawacuyargan Noe büquitänö *arcata ruraycur tsayman yaycungan junagyagmi. ³⁹Tsaynö caycagman Tayta Dios illagpita pasaypa tamyata gallatsipaycamuptinmi cay patsaman yacu juntargan. Tsaynö pam arcaman llapan mana yaycog cag runacuna ushacäyargan. Nogapis tsaynöllam runacuna mana musyayangan öra illagpita cutimushä”.

⁴⁰“Cutimungä junag ishcag runacuna chacrachö aruycagpita nogaman criyicamog cagtam gloriaman pushacushä y mana criyicamog cagtanam jagirishä. ⁴¹Maraynincunachö ishcag agacuycag warmicunapita nogaman criyicamog cagtam pushacushä y mana criyicamog cagtaga jagirishämi. ⁴²Manam musyayanquitsu imay öra cutimunäpä cagtapis. Tsaynö caycappinga imaypis Tayta Dios munangannö cawarmi shuyacaycayämänayqui”.

⁴³“Juc runa wayinta ladron suwapänänpä cagta musyarga mana punuyä maya-mayallanam waranman. ⁴⁴Tsaynömi gamcunapis Tayta Diosman mañacur caycayänayqui. Mana yarpashgata cutimur jutsallachö caycagtagtä tariycüman”.

**Alli emplyäduman y mana alli
emplyäduman iwalatsir
yachatsingan**

(Lucas 12.41-48)

⁴⁵“Juc patron maypapis illarga mas yäracuypä cag emplyäduntam haciendanchö dejan imaycancunatapis shumag ricaycänänpä y waquin

z **24.29** Tsaycuna päsayänänpä cagpita masta musyanayquipä liyinqi Isaias 13.10; 34.4; Joel 2.10.

emplyäduncunatapis öranchö garar caycānanpä. ⁴⁶Tsay patron illanganpita cutir yätsingannö llapantapis ruraycagta tariycur imanöra cushicur alabanman tsay emplyädunta. ⁴⁷Emplyädun tsaynö alli portacuptinnam paypa maquinmanna churanman llapan imaycantapis ricananpä. ⁴⁸Peru mana yäracuypä cag emplyädum itsanga yarpän: 'Patronni manarämi rasllaga cutiramungarätsu' nirnin. ⁴⁹Tsaynö yarparnam emplyädu mayincunatapis magar ushan y fiestacunachö puricur, micur, upyar cacun. ⁵⁰Tsaynö caycagman patronnin mana yarpashgata illanganpita chaycurga, ⁵¹emplyädun mana allicunata ruraycagta tariycur patronnin magacacharcumri gargunga. Tsaynömi janan shongulla criyicogcunatapis Tayta Dios infernuman gargunga. Tsaychömi wagar quirutapis uchuyangarä".

**Chunca jipashcunaman iwalatsir
Jesus yachatsingan**

25 ¹Ciëlupita cutimur imanö cananpä cagta tantiyatsirmi Jesus caynöpis nirgan: "Chunca jipashcunam chiuchincuna listacurir aywayänä casacushga jövinman chasquicog. ²⁻⁴Tsaynö aywagcunaga pitsga cag jipashcuna acëtincuna" apayänä ushacäpacur wiñayānanpä. Pitsga cag jipashcunaga acëtincuna manam apayänätsu. ⁵Tsay casacog jövin mana chaptinnam shuyaraycāyanganta llapancunapis punucäriyänä".

⁶"Tsaynö punucashga caycäyaptinnam pullan pagasnöna juc runa gayacunä: 'iCasacog jövin yaycaycāmunnam!' nir. ⁷Tsaynö gayacunganta wiwarna llapan jipashcuna listacuyänä payta

chasquicuyānanpä. ⁸Tsaychönam chiuchincunaman acëtita yapay wiñayānanpä mana apag cagcuna waquin cag jipashcunata mañacur niyänä: 'Chiuchincunam upiycanna. Acëtiqicunata raquiparcayāmay chiuchincunaman wiñayānapä' nir. ⁹Tsaynö niyaptinmi acëtiyog cag jipashcuna niyänä: 'Gamcunata raquiparga manam aypäpacuyāshätsu quiquicunaga. Antis aywar rantiscayāmuy quiquicunata atsquicuyānayquipäga' nir. ¹⁰Tsaypitanam acëti ranteg aywayanganyag casacog jövinga chärinä. Tsaynam tsay listu shuyacuycag jipashcunata fiestanman yaycatsinä. Y nircurnam puncuta wichgacascamunä. ¹¹Tsaypita acëti ranteg aywag jipashcuna cutiycurnam tariyänä puncu wichgaraycagtana. Tsaynam paycuna gayacuyänä: 'iPuncuta quichapaycayällāmay, taytay!' nir. ¹²Tsaynö gayacuyaptinnam casacog jövinga ruripita contestamunä: 'Gamcunata manam regitsu. ¿Pirä cacuyanquipis?' nirnin".

¹³Tsaycunata parlapasquirnam Jesus nirgan: "iGamcunapis tsay pitsga jipashcunanö listacushga caycāyanqui! Nogaga mana yarpashgatam cutimushä. Manam musyayanquitsu imay junag ni imay öra cutimunäpä cagtaga".

**Emplyäduncuna arunanpä
patronnin gellëta jagipangan
(Lucas 19.11-27)**

¹⁴Tsaypita caynöpis Jesus nirganmi: "Juc riru runam juclä nacionpa aywacur emplyäduncunata gellëncuna jagipänä cutimunganyag tsay gellëwan arucayānanpä. ¹⁵Jucnintam jagipänä

a 25.2-4 Jesus cawanan witsanga olivu jachapa murunpitam acëtita rurayag atsquicuyānanpä. Tsay witsancuna kerosënega manaran carganrätsu.

pitsga waranga (5,000) gellëta. Jucagtana jagipänä ishçay waranga (2,000) gellëta. Jucnin cagtana jagipänä juc waranga (1,000) gellëta, paycuna imanöpis cayanganta tantiypaycur. Nircurnam caru marcapa aywacunä. ¹⁶Tsay pitsga waranga gellëta chasqueg cag emplyädunga shumag negociuta rurur pitsga waranga masta miratsinä. ¹⁷Ishçay warangata chasqueg cagpis tsaynöllam negociuwan shumag arur ishçay waranga masta miratsinä. ¹⁸Juc waranga gellëta chasqueg cagmi itsanga ratashwan gepiycur pampaycunä”.

¹⁹“Tsaypita unay ricogta patronnincuna cutirnam emplyäduncunata cuentata mañanä jagipangan gellëwan imanö arucäyanganta musyananpä. ²⁰Tsaynö cuentata mañaptinnam pitsga waranga gellëta chasqueg cag emplyädun pitsga waranga masta entregar ninä: ‘Taytay, pitsga warangata gollämangayquita pitsga waranga mastam gellëniquita miratsillargö’ nir. ²¹Tsaynö niptinnam patronnin ninä: ‘Gamga alli emplyädum canqui. Wallcallawanpis shumag arur miratsingayquipitam cananga mas imaycäwanpis munayyogna canayquipä churashayqui. Tsaynö cangayquipita canan fiestata rurashun’ nir”.

²²“Tsaypitanam chänä ishçay waranga gellëta chasqueg cag emplyädunpis caynö nir: ‘Taytay, ishçay warangata gollämangayquita ishçay waranga mastam gellëniquita miratsillargö’. ²³Tsaynö niptinnam patronnin ninä: ‘Gampis alli arog emplyädum canqui. Wallcallata jagipaycungäwan shumag arungayquipitam cananga imaycäwanpis munayyog canayquipä churashayqui. Tsaynö cangayquipita canan fiestata rurashun’ nir”.

²⁴“Tsaypitanam juc waranga gellëta chasqueg emplyädunpis chaycur ninä:

‘Taytay, noga musyämi gam imaycapäpis mallagashga cangayquita. Mana murucungayquipitam gorinqipis. Tsaynömi mana murungayquiman cosichagpis aywanqui. ²⁵Tsaynö feyu cangayquita musyarmi mantsapacur gellëniquita patsaman pampaycurgä. Tsaymi gayatsimaptiqui gellëniquita mana faltagta apallämurgö’ nir. ^{26,27}Tsaynö niptinnam patronnin ninä: ‘iGamga mana yäracuy gela emplyädum canqui! Malafë cangäta yarpaycarga imanirtä gellëniita bancullamanpis churargayquitsu cutimur wachayyogtana goricunäpä?’ nir. ²⁸Tsaynö nisquirnam tsaychö caycag runacunata ninä: ‘Tagay gela emplyädupita gellëniita gechusquir goycuyay chunca waranga (10,000) gellë tsararag cagta. ²⁹Noga ningäta cumpleg cagcunataga imaycäwanpis munayyog cananpämi churashä. Peru mana cumplegcunatam itsanga imaycantapis gechusquir gargurishä. ³⁰Cay imapäpis mana väleg emplyäduta tsacayman jitayay. Tsaychö wagar quiruntapis uchurrämi yarpayta taringa’ ”.

Fisyu final junaggä Jesus willangan

³¹“Noga, Tayta Diospita shamog, cutimushä llapan angelcunawan chipipirrämi. Nircurmi jamacushä llapan runacunata juzganäpä. ³²Tsay junagga maytsay nacioncunapitam llapan runacunata angelnicunawan goritsimushä. Tsaychömi raquishä mitsicog runa üshancunata cabracunapita raquegnö. ³³Nogaman criyicamog cagtam derëchä cag läduman raquishä. Y mana criyicamog cagtaga itsogni cag lädumanmi raquishä. ³⁴Tsaynö raquiscärirnam noga derëchächö caycagcunata caynö nishä: ‘Gamcunataga Tayta Dios pasaypam

cuyayashunqui. Cay patsata manarä camarmi imaycacunatapis gamcunapä Tayta Dios patsätsipacurganna. Patsätsipacungan gloriamanmi noga pushayashayqui. ³⁵Gamcunam mallagar puripti pachä garaycayämargayqui. Tsaynömi yacunar puriptipis yacü garaycayämargayqui. Tsaynöllam wayiquicunaman chämur gorpaytucupti patsaycatsiyämargayqui. ³⁶Röpaynag puripti gamcunam jatircatsiyämargayqui. Geshyaptipis gamcunam gawaycayämargayqui. Carcelchö capti gamcunam watucaycayämargayqui' nirnin".

³⁷"Tsaynö niptinam allita rurar cawashga cag runacuna tapuyämanga: 'Taytay, imaytä mallagar puriyacagta garayargä? Imaytä yacunar puriyacagta upurinayquipä yacuta garayargä?

³⁸Imaytä wayicunaman chämurgayqui patsaycatsiyänäpä? Y röpaynag puriptiqui imaytä jatircatsiyargä?"

³⁹Tsaynömi niyämanga: 'Geshyaptiqui o carcelchö captiqui imaytä watucagniqui shayämurgä?' nirnin.

⁴⁰Tsaynö niyaptinnam noga caynö nishä: 'Imayca ñacacuyñinchö runa mayiquicunata yanapag cagcunam nogata yanapaycämag cuenta cayarguyqui' nir".

⁴¹"Nircurnam itsogni cag läduchö caycag runacunata nishä: 'iGamcunaga nogalläpa ñöpäpita witicuyay! Satanas y supaycuna gaycucäyananpä caycag infernumanmi gamcunaga gaycucäyanqui. ⁴²Mallagar puriptipis gamcunaga manam garaycayämargayquitsu. Y yacunar puriptipis manam upurcunäpä yacü garaycayämargayquitsu. ⁴³Tsaynömi wayiquicunaman gorpaytucur chämupti gamcuna mana patsaycatsiyämargayquitsu. Röpaynag captipis manam

jatircatsiyämargayquitsu. Geshyaptipis carcelchö wichgaraptipis manam watucaycayämargayquitsu' nir".

⁴⁴"Tsaynö niptinam itsognichö caycag runacuna niyämanga: 'Peru taytay, imaytä gamta ricayargö mallagagta, yacunagta, wayicunaman chämogta, röpaynag puregta, geshyaycagta, carcelchö wichgaraycagta nogacuna yanapayänäpä?' nir. ⁴⁵Tsaynö niyämaptinmi paycunata nishä: 'Ñacaychö cagcunata mana cuyapashga car nogatapis manam cuyapayämargayquitsu' nir".

⁴⁶Tsaynö willapäcurirnam Jesus nirgan: "Tsay mana cuyapäcog cagcunaga infernuman gaycucarmi tsaychö imayyagpis ñacayanga. Tayta Dios munangannö runa mayinta yanapag cagcunam itsanga imayyagpis gloriachö cawayanga".

Jesusta wanutsiyänanpä mandacog sacerdotícuna willanacuyangan

(*Marcos 14.1,2; Lucas 22.1,2; Juan 11.45-53*)

26 ¹Tsaynö yachatsicurirnam discipuluncunata Jesus nirgan: ²"Musayangayquinöpis *Pascua fiesta gallaycunanpä ishcajunagllanam faltaycan. Tsaychömi noga Tayta Diospita shamogta chiquimagnicunapa maquincunaman entregayämanga crucificayämänapä" nir.

³Tsaypitanam mandag sacerdotícuna y Israel runacunapa autoridänincuna goricäyangan mas mandacog cag sacerdoti Caifaspa wayinman.

⁴Tsaychömi willanacuyangan runacunata mana mayatsiyllapa Jesusta tsarisquir wanutsiyänanpä. ⁵Tsay willanacurmi niyangan: "Amarä cay fiestachöga imatapis rurashuntsu. Fiestachö tsarishgaga runacunam contrantsic sharcuyanga" nir.

**Jesusa umanman perjümita
warmi wiñapangan**
(Marcos 14.3-9; Juan 12.1-8)

⁶Tsaypita Betania marcamanmi Jesus aywargan “Leprüsu” niyangan Simonta wayinman watucagnin. ⁷Tsaychö jamapaycaptinnam juc warmi chargan rumipita rurashga lindu frascuchö perjümin aptashga. Tsay perjümega feyupa chaniyogmi cargan. Tsaynam mësachö Jesus caycagman warmi witiycur Jesusa umanman tsay perjümita wiñapangan. ⁸Tsaynö wiñapagta ricarnam discipuluncuna ajarnin niyargan: “¿Imapätä tsaynö lluta jichar perditsin tsay perjümita? ⁹Tsaynö perditsinanpa rantinga nogantsicta goycamashwan cargan tsayläya chaniyogtaga ranticusquir tsay gellëwan muchogcunata yanapanantsicpä” nir.

¹⁰Tsaynö niyangancunata wiyarnam Jesus nirgan: “¿Imanirtä gamcuna parlacachäyanqui? Nogapäga allitachä ruraycan. ¹¹Muchogcunata yanaparninga imaypis caycäyanquirämi. Peru nogawanga mananam gamcuna juntaräyanquinatsu. ¹²Cay warmega perjümita wiñapaycäman pampacänäpä alistamarninnam. ¹³Cay rurangantaga maytsaychöpis alli willacuyñita willacuyanganchöga willacuyangam”.

**Jesusta ranticunapä mandacog
sacerdötícunawan Judas
conträtuta rurangan**
(Marcos 14.10,11; Lucas 22.3-6)

¹⁴Tsaypitanam Jesusa discipulun Judas Iscariote aywargan mandacog sacerdötícunaman parlag. ¹⁵Tsaynö parlarmi nirgan: “Runacuna tsunyäriyangan öra Jesusta präsu tsariyänayquipä willapti çaycatatä pägayämanqui?” nir.

Tsaynö niptinnam paycuna niyargan: “Nogacuna pägayäshayqui quimsa chunca (30) yurag gellëtam” nir. ¹⁶Tsaynö conträtuta rurasquirnam Judas yarpachacurgan sacerdötícunaman imay öra willacog cutinanpäpis.

**Pascua merendata
discipuluncunawan Jesus micungan**
(Marcos 14.12-25; Lucas 22.7-23;
Juan 13.21-30; 1 Corintios 11.23-26)

¹⁷Tsaypita levadüraynag tantata micuyänan *Pascua fiesta semäna gallaycunan junagnam discipuluncuna Jesusta tapuyargan: “Taytay, ¿maychötä listacayämushä Pascua merendata micunantsicpä?” nir.

¹⁸Tsaynö niyaptinmi Jesus nirgan: “Marcapa aywar juc runata niyanqui: ‘Señor Jesusmi cachayäman. Wanutsiyänapä öran captinnash discipuluncunawan Pascua merendata wayiquichö micuyta munaycan’ nir”.

¹⁹Tsaynö Jesus niptin discipuluncunaga yätsingannöllum Pascua merendata tsay wayichö listapacuyargan. ²⁰Tsaypita patsa tsacanaycaptinnam chunca ishçay (12) discipuluncunawan Jesus mësaman jamacurgan. ²¹Tsaynam micucyängantana Jesus nirgan: “Gamcunapita jucniquim chiquimagnícunapa maquinman entregayämanqui”.

²²Tsaynö niptinnam wamayarnin jucninpis jucninpis Jesusta tapuyargan: “¿Nogatsurä tsayta ruraycūman, taytay?” nir.

²³Tsaynam Jesus nirgan: “Nogawan juc matillachö tantata tullpurcur micucyagmi chiquimagnícunapa maquinman entregamanga. ²⁴Noga Tayta Diospita shamogtaga Diospa palabran gellgaranganchö ningannöllum ñacatsir wanutsiyämanga. Peru allau

tsay ranticamag runa imanö cuyapaypära canga. Payga mejor ama yurinmanpistsu cargan”.

²⁵Tsaynö niptinnam ranticog Judas Jesusta tapurgan: “¿Taytay, nogacu callä?” nir.

Jesurnam nirgan: “Quiquiquim tsayta nirguyqui” nir.

²⁶Tsaynö micuycäyaptinnam Jesus tantata aptarcu Tayta Diosman mañacur agradesicurgan. Nirurnam paquirir discipuluncunata macyargan: “Cay tantata llapayqui micuyay. Cayga cuerpümi” nir.

²⁷Tsaynömi vinuyog väsuta aptarcupis Tayta Diosman mañacur agradesicurgan. Nirurnam discipuluncunata macyargan: “Cay vinuta llapayqui uputsinacuyay.

²⁸Cay vinoga yawarnimi. Noga yawarnita jichar wanuptimi Tayta Dios runacunawan *mushog conträtuta ruranga nogaman criyicamog cagcunata jutsancunapita perdonanapä.

²⁹Yapayga manam vinuta upushänatsu Tayta Diospa ñöpanchö gamcunawan mushog vinuta upungäyag”.

³⁰Tsaynö nisquir alabanzacunata cantasquirnam discipuluncunawan Jesus aywacuyargan Olivos jircanman.

**Pedro ñëganapä cagta
Jesus ningan**

(*Marcos 14.27-31; Lucas 22.31-34;
Juan 13.36-38*)

³¹Olivos jircanman chaycurnam Jesus nirgan: “Tayta Diospa palabranhö caynömi nican: ‘Üsha mitsicogta wanuscatsipti üshancuna wacpa caypa mashtacarmi aywacuyanga’ nir. Tsay ningannöllum canan pagas llapayqui jagiriycomar aywacuyanqui. ³²Tsaynö captinpis wanuscatsiyämaptin cawarcamurga gamcunapita mas puntatam Galileaman aywashä tsaychö tincunantsicpä”.

³³Tsaynö niptinnam Pedro nirgan: “Waquin cagcuna jagiriyäshuptiquipis nogaga manam dejashayquitsu, taytay” nir.

³⁴Tsaynam Jesus nirgan: “Pedro, canan pagas gällu manarä cantaptinmi gam quimsa cuti ñëgamanqui”.

³⁵Tsaynö niptinnam Pedro nirgan: “¡Ishcantsicta wanutsimänantsic captinpis manam ñëgashayquitsu, taytay!” nir. Pedro ningannöllum waquin cag discipuluncunapis niyargan.

Getsemanichö Jesus Tayta

Diosman mañacungan

(*Marcos 14.32-42; Lucas 22.39-46*)

³⁶Tsaypitanam Jesus aywargan discipuluncunawan Getsemani huertaman. Tsaychönam discipuluncunata nirgan: “Tayta Diosman mañacumungäyag gamcuna cayllachö jamaraycäyay”.

³⁷Nisquirnam Pedruta y Zebedeupa tsurincuna Santiagutawan Juanta mas washaläman pushargan. Tsaychö feypa llaquicurnam paycunata nirgan: ³⁸“Wanunayparä llaquicuymi entëru tullüta almäta päshashga. Cayllachö shuyaycäyamay Tayta Diosman mañacurnin”.

³⁹Tsaynö nisquirmi mas washaläman aywargan Tayta Diosman mañacog. Tsaychönam pasaypa llaquicurnin gonguricuycur patsaman umpucurcur mañacurgan: “Papällay, cay ñacanäpäna cagpita munarninga jipiycallämay. Peru itsanga ama noga munangänöga catsuntsu, sinöga gam munangayquinö callätsun” nir.

⁴⁰Tsaynö mañacunganpita cutirnam tarirgan quimsan discipuluncuna punucashga caycäyagta. Tsaynam Pedruta nirgan: “Pedro, ñgamcunaga manacu juc örallapis Tayta Diosman mañacuyta puëdiycuyarguyqui?

⁴¹Ricchacur Tayta Diosman mañacuyay. Mana dejamayta munaycarpis Tayta Diosman mana mañacurga jagiriycañmanquim”.

⁴²Tsaynō nisquir cutirirnam yapay Tayta Diosman mañacurgan: “Papállay, runacuna ñacatsimar wanutsiyämānan captinpis gam munangayquinō callätsun” nir.

⁴³Tsaynō Tayta Diosman mañacunganpita cutirpis tarirgan quimsan discipuluncuna cangan wanuyta punucashga caycäyagtam.

⁴⁴Tsaynō caycagta ricaycurpis yapay cutiycur Tayta Diosman mañacurgan puntata mañacungannöllam. ⁴⁵Tsaypita cutiycamurnam paycunata nirgan: “¿Cananpis gamcunaga jinallacu punucuycāyanqui? ¡Ricchayay! Cananga noga Tayta Diospita shamogta jutsasapa runacunapa maquincunaman entregayämānanpä öra chämushganam. ⁴⁶¡Sharcuyayna! Chiquimagnicunapa maquinman entregamag runaga yaycaycāmunnam” nir.

**Jesusta prësu tsarircur
apacuyangan**

(Marcos 14.43-50; Lucas 22.47-53;
Juan 18.3-12)

⁴⁷Tsaynō discipuluncunawan Jesus parlaycaptinllarämi Judas Iscariote chargan atsca runacunata pushashga. Tsay runacunaga chäyargan espädancunawan y garrötincunawanmi. Paycunataga cachayargan mandacog sacerdotícuna y respitadu mayor runacunam Jesusta prësu tsariyānanpä. ⁴⁸Judasga caynō nirmi runacunata yätsirgan: “Mayganpis mutsangä cagmi

Jesugsa canga prësuyānayquipä”.

⁴⁹Tsay ningannömi Jesusman witiycur Judasga mutsaycurgan: “¿Allillacu, tayta?” nirin.

⁵⁰Tsaynō niptinnam Jesus nirgan: “Au Judas, ¿cayyagräcu shamuycургuyqui?”^b

Tsaynō niptin runacunaga Jesusta jinan öram prësu tsariyargan.

⁵¹Tsaynō prësu tsariyaptinnam juc discipulun mas mandacog cag sacerdotipa wätayninpa rinrinta espädanwan roguscapurgan. ⁵²Tsayta ricaycurnam Jesus nirgan: “Espädayquita churay. Pipis espädawan runa mayinta wanutseg cagtaga espädawanmi quiquintapis wanutsiyanga. ⁵³¿Gam manacu musyanqui Tayta Diosman mañacuripti chunca ishca (12) tröpa^c angelcunata cayman cachaycamuptin janä sharcuyānanpä cagta? ⁵⁴Tsaynō angelcunata nogapa janä cachaycamuptinga ¿imanöparä cumplinga runacuna wanutsimānanpä Diospa palabbranchö gellgaraycanganpis?”

⁵⁵Tsaynō nisquirnam tsay runacunata Jesus nirgan: “¿Imanirtä ladron captinō gamcuna shayämurguyqui espädayquicunawan y garrötiquiwan nogaman prësuyāmag? Nogaga goyay goyaypis templuchömi yachatsicurgö. Tsaychö caycaptëga ¿imanirtä prësu tsariyāmargayquitsu? ⁵⁶Tayta Diospa willacognin profëtacuna gellgayangannöllam cay ruraycāyangayqui llapanpis camacaycan”.

Tsaynō nicaptinnam Jesusta japallanta jagisquir discipuluncuna geshpir aywacuyargan.

b 26.50 Cay versiculuchö Jesus ninganta waquincunaga ticsratsiyan caynömi: “Imatapis ruranayquipä cagtaga jucllana ruray” nir. **c 26.53** Juc tröpachöga cayargan jogta waranga (6,000) soldäducunam. Tsaymi Jesus nirgan ganchis chunca ishca waranga (72,000) angelcunapita masta cachamunanpä cagta.

**Jesusta mandacog sacerdotipa
wayinman chätsiyangan**

(Marcos 14.53-65;

Lucas 22.54,55,63-71;

Juan 18.13,14,19-24)

⁵⁷Tsaynö Jesusta prësu apacuyargan mas mandacognin cag sacerdoti Caifaspa wayinmanmi. Tsaychömi ley yachatsicogcuna y mas waquin puëdeg autoridäcuna goricashga caycäyargan. ⁵⁸Jesusta apacuyaptin Pedroga caru gepallantam aywargan Caifaspa wayinman yaycatsiyanganyag. Tsayman yaycaratsiyaptin Pedrupis gepantam yaycurirgan. Wayipa patiunchömi templu cuidag runacunawan juntü jamaraycargan ima päsangancunatapis ricararnin.

⁵⁹Mandacog sacerdotícunawan puëdeg autoridäcunaga Jesusta imaycanöpapis wanutsiyänantam munayargan. Tsaymi runacunata ashiyargan Jesuspita manacagcunata niyänanpä. ⁶⁰Paycuna manacagcunata niyaptinpis Jesuspa contran sharcogcunaga manam ima jutsantapis tariyargantsu wanutsiyänanpänöga. Tsaypitanam ishca runacunata niyargan: ⁶¹“Cay runaga caynöchá nirgan: ‘Templuta juchuratsirmi noga quimsa junagllata sharcatsishä’ nir”.

⁶²Tsaynam sacerdotícunapa mandagnin cag Jesusta tapurgan: “¿Manacu imatapis parlacunqui tsaynö niyëshuptiqui? ¿Imanirtä tsaynö contrayqui nicäyëshunqui?”

⁶³Tsaynö niptinpis manam ni imata Jesus parlacurgantsu. Tsaynam sacerdotícunapa mandacognin yapay nirgan: “Poderösu Tayta Dios ricananchömi gamta tapiü. Rasun cagllata nimay. ¿Rasunpacu Tayta Diospa tsurin salvacog canqui?” nir.

⁶⁴Tsaynam Jesus nirgan: “Aumi, ningayquinö rasunpaypam cä. Nogata juc

junag ricayämanqui imaycawan munayyog Tayta Diospa derëcha cag lädunchö jamaraycagtam. Y tsaypitanam pucutay jananchö shamuycagta ricayämanqui”.

⁶⁵Tsaynö niptinnam mandacog sacerdoti rabyanaywan röpantapis rachirrä nirgan: “Cay runa tsaynö nicaptinga ¿imapänatä mas testigucunatapis munantsic? Gamcuna wiyayarguyquim quiquin Dios tucurna parlaycanganta. ⁶⁶Tsaynö cappinga gamcuna ¿imaniyanquitä?” nir.

Tsaynam tsaychö caycag runacunata niyargan: “iTayta Diospa contranmi parlashga! iTsaynö canganpita cay runaga wanutsun!”

⁶⁷Tsaynö nirmi cäranman togapäyargan y magayargan. Waquinnam lagyar ushayargan: ⁶⁸“Tayta Dios cachamungan salvacog carga mä, niyämäy ‘¿Pitä lagyashurguyqui?’” nirmin.

Jesusta Pedro

“Manam regitsu” ningan

(Marcos 14.66-72; Lucas 22.56-62;

Juan 18.15-18, 25-27)

⁶⁹Tsayyag Pedroga jamaraycargan wayi puncu cagllachömi. Tsaychö jamaraycagta ricarnam juc emplyäda jipash witiycur nirgan: “Gamtapis Jesuswan puriyacagtam ricargä” nir.

⁷⁰Tsaynam runacunata wiyaycaptin Pedro nirgan: “Manam musyätsu imata parlapaycämangayquitapis”.

⁷¹Tsaynö nisquirmi Pedroga puncu cagman witicuycurgan. Tsaychönam juc jipashpis payta ricaycur nirgan: “Nogapis cay runataga Jesuswan puriyacagtam ricargä”.

⁷²Tsaynö niptinnam Pedro jurar nirgan: “Nogaga manam regitsu tagay runataga” nir.

⁷³Tsaypita mas rätun ricogtanam tsaychö caycag runacunata Pedruman

witipar niyargan: “Gamga rasunpaypa tagay runawan puregmi canqui. Paypanömi parlacuytiquipis” nir.

⁷⁴Tsaynam Pedro jurar nirgan: “Tagay runaga pirä cacunpis. Manam regicullätsu”.

Tsaynö nicaptinmi gällu cantasquirgan. ⁷⁵Gällu cantasquiptinmi itsanga Pedro yarpasquirgan Jesus caynö ninganta: “Manarä gällu cantaptinmi quimsa cuti ñëgamanqui”. Tsayta ninganta yarpasquir Pedro wagtaman yargusquirmi pasaypa llaquicur wagargan.

Jesusta Pilatuman prësu apayangan

(*Marcos 15.1; Lucas 23.1,2; Juan 18.28-32*)

27 ¹Tsaypita patsa waräriptinnam mandacog sacerdötücuna y Israel runacunapa puëdeg autoridänincuna willanacuyargan Jesusta wanutsiyänanpä. ²Tsaynö cösa willanacurirnam maquipita watarcu Jesusta apatsiyargan Roma nacionpita mandacog *Pilatuman.

Judas Iscariote jurcacungan

(*Hechos 1.18,19*)

³Jesusta wanutsiyänanpä autoridäcuna willanacuyanganta musyasquirmam Judas Iscariote pasaypa llaquicurgan. Ranticunganta pësacurmi quimsa chunca (30) yurag gellëta chasquinganta cutitsipaycargan sacerdötücunaman.

⁴Tsaynö cutitsirnam paycunata nirgan: “Jutsamanmi jëgarpurgö jutsaynag runata gamcunata entëgarin”.

Tsaynö niptinnam niyargan: “iImanöpis cacuy! Nogacunataga

manam imapis gocayämantsu” nir.

⁵Tsaynö niyaptinmi Judasga tsay gellëta templuman jichariycu aywacurgan. Nircurnam jinan öra jurcacungan.

⁶Tsaynam mandacog sacerdötücuna tsay gellëta gorircu niyargan: “Cay gellëga runapa yawarninpa chaninmi. Tsaynö captin manam ofrenda gellëmanga tallushwantsu” nir.

⁷Tsaynam willanacur tsay gellëwan rantiyargan manca rurag runapa chacranta. Tsay chacrata rantiyargan juclä nacion runacuna wanur tsaychö pampacuyänanpämi. ⁸Jesuspa yawarninpa chanin captinmi tsay chacrata jutinta runacuna niyan “Yawar Pampa” nirnin. ⁹Mandacog sacerdötücuna chacrata tsaynö rantiyanganwanmi cumplirgan Tayta Diospa unay willacognin profëta Jeremias gellangan. Tsay gellganganga caynömi nican: “Paypa precin^d ayca cananpäpis Israel runacuna niyangannöllum quimsa chunca (30) gellëta chasquiyargan. ¹⁰Tsay gellëwanmi Tayta Dios ningannölla manca rurag runapa chacranta rantiyargan” nir.

Jesusta Pilatuman chätsiyangan

(*Marcos 15.2-5; Lucas 23.3-5; Juan 18.33-38*)

¹¹Tsaypita mandacog Pilatuman Jesusta prësu chaycatsiyaptinnam tapurgan: “¿Rasunpacu gamga canqui Israel runacunapa mandacog reynin?”

Tsaynö niptinnam Jesus nirgan: “Gam ningayquinöllum cä” nir.

¹²Tsaychö mandacog sacerdötücuna y puëdeg autoridäcuna imaycata

d 27.9 Zacarias 11.12,13. Maygan profëtacuna gellgayanganpäpis parlayta munar Israel runacunaga niyag Jeremias gellgangenllatam. Tsaymi Mateupis cayta gellgar Zacarias ninanpa rantinga Jeremias nirganlla. Y profëta Zacariasmi gellgargan Jesucristupä “Paypa precin” nir.

llullacurcur niyaptinpis Jesusga manam imatapis parlacurgantsu. ¹³Tsaynam Pilato nirgan: “¿Manacu imatapis ninqui gampa contrayqui imaycata niyāshuptiquipis?”

¹⁴Tsaynō niptinpis Jesusga manam imatapis parlacurgantsu. Tsaymi Pilatoga imaniytapis puëdirgannatsu.

**Jesusta wanutsiyānanpä
Pilato nigan**

(Marcos 15.6-15; Lucas 23.13-25;
Juan 18.39-19.16)

¹⁵Wata watam Pascua fiestachöga Pilato cachaycog juc prësuta runacuna mañayangan cagta. ¹⁶Tsaychömi prësü wichgaraycargan juc runa Barrabas jutiyo. Paypa mana alli rurag cayninga pipita maypitapis regishgam cargan. ^{17,18}Jesusta chiquipar payman prësü apayanganta musyarnam tsaychö goricashga caycag runacunata Pilato tapurgan: “¿Maygan prësutatä cachaycunäta munayanqui, Barrabastacu o reyniquicuna Jesustacu?” nir.

¹⁹Tsaypita Jesusta juzgar Pilato jamaraycaptinmi warmin willacascatsirgan caynō nir: “Jesus niyangan runaga jutsaynagmi. Ama paypa contran mëticuytsu. Canan pagas pasaypa mana allicunatam suëñupäcuycorgö tsay runata prësürätsiyaptin”.

²⁰Tsaynō warmin willacatsishga captin Pilato Jesusta cachariyta munaptinpis tsaychö caycag mandacog sacerdotícuna y llapan autoridäcunam runacunata aquishapâyargan: “Barrabasta cachariy. Jesusga wanutsun” niyānanpä.

²¹Tsaynō niyaptinmi yapay Pilato tapurgan: “¿Maygantatä cacharishä?” nir. Niptinnam runacuna gayarrä niyargan: “¡Barrabasta cachariycuya!” ninnin.

²²Tsaynō niyaptin Pilatunam nirgan: “Tsaynō captinga cay apayāmungayqui reyniquicuna nisha Jesustaga imatata rurashä?” nir.

Tsaynam llapan runacuna niyargan: “¡Payga *cruzchö wanutsun!” nir.

²³Tsaynam Pilato nirgan: “Cruzchö wanunanpäga ima mana allitatä rurashga?”

Tsaynō niptin runacuna masrämi gayarar niyargan: “¡Ari, cruzchö wanutsun!” ninnin.

²⁴Runacuna tsaynō masrä gayaraypa niyaptinnam ima ruraytapis manana puëdirgantsu. Tsaynō caycangantanam yacuta apascatsimur llapancunapa ñöpanchö maquina awicur nirgan: “Nogaga manam cuentayognatsu callä. ¡Cay runata gamcunana wanutsirpis mana wanutsirpis cacuyay!” nir.

²⁵Tsaynō niptinnam runacuna niyargan: “Nogacunam y wamräcunam cay runa wanunganpita cuentayog cayāshä” nir.

²⁶Runacuna tsaynō niyaptinnam Pilato Barrabasta cachaycorgan. Nircurnam Jesusta astarcatsir Roma soldäducunaman entregaycorgan crucificayānanpä.

Jesusta soldäducuna burlacuyangan
(Marcos 15.16-20; Juan 19.2,3)

²⁷Tsaypitanam soldäducuna Jesusta apayargan cuartelnincunaman. Tsayman llapan soldäducuna goricaycurmi maytsayninpa jirurupâyargan.

²⁸Nircurmi asipâyānan raycur rôpanta llogtiscatsir reypa puca mantuntanö agshutsiyargan. ²⁹Tsaynōmi cashapita corönatapis umanman churapâyargan. Derëcha cag maquinmanpis väratam aptapâyargan. Nircurmi ñöpanman gonguricog tucur asipar niyargan: “¡Alabashga catsun Israel runacunapa reynin!” nir.

³⁰Tsaynömi togaparpis ushayargan. Aptaraycangan värata gechurirmi juchrä juchrä uman umallan wiruyargan.

³¹Tsaynö imaycata rurar ajayasquirnam agshutsiyangan puca mantuta llogtiratsir cangan quiquinpa röpantana jatitsiyargan. Nircurmi crucificayänapä apayargan.

Jesusta cruzchö clavayangan
(*Marcos 15.21-32; Lucas 23.26-43; Juan 19.17-27*)

³²Tsaynö Jesusta cruzchö clavag apaycarnam tincuyargan Cirene marcapita Simon jutiyog juc runawan. Paytam Jesus apaycangan cruzta umrutsiyargan.

³³Nircurnam Jesusta chätsiyargan Golgotaman. Golgota ninanga cangan “calavëra sitiü” ninanmi. ³⁴Tsaychönam vinutawan juc usuncätsicog jumpita Jesus upunanta munayargan nanayta mana mayananpä. Tsaynam yawarcurga mana upuyta munargantsu.

³⁵Tsaypita Jesusta crucificasquirnam soldäducuna Jesuspa röpanta sortiyayargan mayganpis gänag cag apacunapä. ³⁶Nircurnam soldäducuna tsaychö täpar quëdayargan. ³⁷Tsaypita juc letrërutanam tablachö gellgarcur cruzpa puntanman clavayargan. Tsay letrëruchöga caynömi gellgayargan: “CAY JESUSGA ISRAEL RUNACUNAPA REYNINMI” nirin.

³⁸Jesusta crucificayangan lädunmannam ishcay ladroncunata crucificayargan, jucagta derëcha cag lädunman y jucagtana itsog cag lädunman. ³⁹Cruzchö Jesus caycagta ricarnin tsaypa pätag runacunapis asiparmi umancunata awirninrä niyargan: ⁴⁰“Templuta juchuscatsirmi quimsa junagllata sharcarsishä” nicarga mä salvacuy ari. Tayta Dios cachamungan

salvacog rasunpa carga ñimanirtä cruzpita yarparamunquitsu?” nirin.

⁴¹Tsaynömi mandacog sacerdotícuna, ley yachatsicogcuna, y puëdeg autoridäcunapis Jesusta asiparnin niyargan: ⁴²“Juccunataga salvarganchä. Canan ñimanirtä quiquinga salvacuyta puëdintsu? Israel runacunapa reynin caycarga, mä cruzpita yarparamutsun nogantsicpis paymanna criyicunantsicpä. ⁴³‘Tayta Diospa tsurinmi cä’ y ‘Paymanmi yäracü’ nimargantsicchä. Rasunpa tsurin captinga, mä Tayta Dios cuyapar salvatsun ari” nir.

⁴⁴Tsaynöllam ñöpanchö crucificaraycag ladroncunapis burlacuyargan.

Jesus wanungan
(*Marcos 15.33-41; Lucas 23.44-49; Juan 19.28-30*)

⁴⁵Tsay junagga pullan junagpitam patsapis tsacasquirgan tardi mallwayyag.

⁴⁶Tardi mallwaychö rupay caycaptinmi Jesus llapan callpanwan niran: “Eli, Eli, ¿lema sabactani?” nir. (Tsay ninanga “Tayta Diosllä, Tayta Diosllä, ñimanirtä dejariycamarguyqui?” ninanmi.)

⁴⁷Tsaynö niptin tsaychö caycag waquin runacunaga caynömi niyargan: “Diospa willacognin profëta Eliasmanmi gayacuycan” nir.

⁴⁸Tsaynam juc runa hisöputa gerupa puntanman watarcu upucuyänap ayag vinuman tullpurgan Jesusta shogutsinanpä. ⁴⁹Tsaynö ruraptinnam waquin runacuna niyargan: “Ama tsayta ruraytsu. Mä, ricashun Elias shamungacush cruzpita jipeg” nir.

⁵⁰Tsaypitaga Jesus yapay fuertipa gayarasquirmi wanusquirgan. ⁵¹Jesus wanusquingan öram templuchö alli awashga jatun cortinapis^e janapita

e 27.51 Tsay templu rurinchö alli awashga jatun cortinapä musyanayquipä liyinqui Exodo 26.31-33; Hebreos 9.1-10; 10.19,20.

urayninpa rachisquirgan. Tsaymi pasaypa patsa tsutsucyaptin gagacunapis paquicar ushargan.

^{52,53}Tsaypita Jesus cawascamuptinnam Tayta Dios munangannö alli rurag runacunapis pamparanganpita atscag cawariyämurgan. Nircur Jerusalem marcaman yaycuyaptinmi atsca runacuna paycunata ricayargan.

⁵⁴Jesusta täpaycag capitanpis soldäduñcunapis patsa pasaypa cuyuptin y imaycapis päsangancunata ricarnin pasaypam mantsacäyargan. Tsaymi niyargan: “iCay runaga rasunpam Tayta Diospa tsurin cashga!” nir.

⁵⁵Tsaychömi atsca warmicunapis carulällapita ricaräyargan. Tsay warmicunaga yanaparnin Galileapita gatriragcunam cayargan.

⁵⁶Paycunawanmi caycargan Maria Magdalena, Santiagupa y Josepa maman Maria, y Zebedeupa warmin.

Jesusta pampayangan

(*Marcos 15.42-47; Lucas 23.50-56; Juan 19.38-42*)

⁵⁷Tsaypita patsa tsacanaycaptinnam Pilatuman chargan Arimatea marcapita Jose. Payga ricu runam cargan. Y Jesucristuman criyicog runam carganpis. ⁵⁸Tsaynam Pilatuta mañargan Jesuspa ayanta cruzpita jipirir pampaycunapä. Tsaynö mañaptinnam Pilato soldäduñcunata nirgan Jesuspa ayanta cachapaycuyänapä. ⁵⁹Tsaynö cachapariyaptinnam linupita finu säbanaswan piturgan. ⁶⁰Nircurnam gagachö tsayrä uchcutsishga *sepultüraman Jesusta pampargan. Tsay sepultürataga quiquin pampacunapämi Jose uchcutsinä. Tsaypitanam jatuncaray rumiwan sepultürapa puncunta tsapaycur aywacurgan. ⁶¹Pay

aywacuptinpis Maria Magdalena mas jucag Mariaga Jesuspa sepultüran ñöpanchömi jina jamaraycäyargan.

Soldäducuna Jesuspa sepultüranta täpayangan

^{62,63}Jesus wanunganpita warayninga cargan säbadu jamapay junagmi. Tsaynam sacerdotícunapa mandagnincuna y fariseucuna Pilatuman aywar niyargan: “Taytay, tsay llullacog runa ningantam yarpasquiyargö. Paymi nirgan: ‘Wanungäpita quimsa junagllatam cawarimushä’ nirnin. ⁶⁴Tsaymi gamta niyällä soldäduyquicunawan sepultürata quimsa junag päsanganyag täpaycatsillänayquipä. Mana täpatsiptiquega tsacaypa discipuluncuna aywaycurmi Jesuspa ayanta suwasquiyanga. Nircurmi runacunata criyitsiyanga ‘Wanunganpitam Jesus cawariscamushga’ nirnin. Tsaynö nir llullacuyaptinga puntacunapitapis masrämi runawan mana allichö cashun” nir.

⁶⁵Tsaynö niyaptinnam Pilato nirgan: “Soldäducunata aywar churayämuy täpayänapä”.

⁶⁶Tsaynö niptinmi aywar sepultüra tsaparag rumipa juc cuchunta cërawan lagayargan pipis quichaptin imaptinga musyacänapä. Nircurnam soldäducunata täpayänapä dejaycur cutiriyargan.

Wanunganpita Jesus cawarimungan

(*Marcos 16.1-8; Lucas 24.1-12; Juan 20.1-10*)

28 ¹Säbadu jamapay junag jamapärirnam dominguman warämogga tsaca tsacallana Maria Magdalenawan jucag Maria aywayargan Jesuspa ayanman

perjümita wiñapäyananpä. ²Tsaynö aywaycäyaptinnam Tayta Dios cachamungan angel ciëlupita urämuptyin feyupa patsa cuyur gallaycorgan. Angel sepultüraman chaycur tsaparag rumita witiscatsirmi jananman jamaycorgan. ³Tsay angelga tillagucuyñörämi atsicyorgan. Röpanpis rashtanö yullagrämi corgan. ⁴Tsayta ricaycur Jesuspa ayan täpag soldädücunaga pasaypa mantsariywan wanushganömi jitacascäriyorgan. ⁵Warmicuna chaycuyaptinnam angel nirgan: “Ama mantsacäyaytsu. Musyämi crucificaypa wanutsiyangan Jesusta ricag shayämungayquita. ⁶Mananam caychönatsu caycan. Manarä wanur niyāshungayquinöllum cawamushgana. Mayman churayangantapis masqui ricaycuyay. Mananam cannatsu”.

⁷Tsaynö nisquirnam tsay warmicunata nirgan: “Canantä aywar discipuluncunata willayay Jesus cawarimunganta. Y nircur niyanqui Galileaman aywar tsaychö Jesuswan tincuyānanpä cagta”.

⁸Angel tsaynö nisquiptin warmicunaga mantsacashga caycäyanganta feyupa cushicurnam Jesuspa discipuluncunaman willag empëñu cuticuyorgan. ⁹Tsaynö aywacuycäyaptinmi paycunata Jesus yuripasquir saludargan. Tsaynam gonguricuycur chancanta macallacurcur adorayorgan.

¹⁰Tsaynam Jesus nirgan: “Ama mantsapäyämaytsu. Cananga discipuluncunata^f aywar willayay Galileaman juclla aywayānanpä y tsaychö paycunawan tincuyānāpä” nir.

**Pamparanganpita Jesus
illacanganta soldädücuna
willacuyangan**

¹¹Warmicuna cuticuriyaptinnam sepultürata täpag soldädücunapis Jerusalemman aywar mandacog sacerdöticunata willayorgan llapan ima päsangancunatapis. ¹²Tsaynö willayaptinnam mandacog sacerdöticunaga waquin autoridäcunawan willanacusrquir soldädücunata gellëta pägayorgan caynö nirmnin: ^{13,14}“Jesuspa ayan illacanganta Pilato musyaptinga nogacunam paywan parlayāshä gamcunata imatapis mana niyāshunayquipä. Gamcunanam runacunata niyanqui: ‘Jesuspa discipuluncuna tsacaypa shamuycurmi punucasquiyangäyag ayanta suwaypa apacuyashga’ nir”.

¹⁵Tsaynö gellëta chasquipacurir sacerdöticuna niyangannöllum soldädücunaga runacunata willacurnin gallaycuyorgan. Tsay manacagta willacuyanganpitam cananyagpis Israel runacunaga mana criyiyantsu Jesus cawamunganta.

**Discipuluncunata Jesus
alli willacuyñinta
willacuyānanpä ningan**

(*Marcos 16.14-18; Lucas 24.36-49;
Juan 20.19-23; Hechos 1.6-8*)

¹⁶Tsaypitaga Jesuspa chunca juc (11) discipuluncuna Galilea provinciaman aywarnam chäyorgan Jesus mayninchö tincuyānanpä ningan jircaman.

¹⁷Tsaychö Jesuswan tincurnam adorayorgan. Peru waquinga ricaycarpis manam criyiyarganrätsu cawarimunganta.

f 28.10 Griegu idiömachöga “Waugicunata aywar willayay” nirmi gellgaraycan. Discipuluncunapämi Jesusga waugicuna nirgan.

¹⁸Tsaynam Jesus discipuluncunata nirgan: “Cay patsachöpis y gloriachöpis imaycawan munayyog canäpämi Tayta Dios churamashga. ¹⁹Tsaymi gamcunata cachä maytsay nacionpapis aywar discipulücuna cayänapä pitapis maytapis yachatsiyämunayquipä. Nogaman criyicamogcunataga

bautizayanqui Tayta Diospa jutinchö, nogapa jutichö, y Espiritu Santupa jutinchö. ²⁰Tsaynö ari paycunata yachatsiyanqui llapan ningäcunata cäsucuyänapä. Manam ni imay gongayäshayquitsu ni jagiriyäshayquitsu cay patsa ushacäriptinpi”. [Tsaynö catsun.]